

РЕСПУБЛИКА МАЪНАВИЯТ ВА МАЪРИФАТ КЕНГАШИ
МИЛЛИЙ ФОЯ ВА МАФКУРА ИЛМИЙ-АМАЛИЙ МАРКАЗИ

АБДУРАҲИМ ЭРКАЕВ

ТАФАККУР
ЭРКИНЛИГИ

ТОШКЕНТ «МАЪНАВИЯТ» 2007

Ушбу китоб тафаккур эркинлиги масаласига бағишилган. Унда тафаккур эркинлиги нима, унга қандай эришилади, деган саволларга жавоб изланади, тафаккурнинг тарихий шакллари ва тадрижи, тафаккурға таъсир кўрсатувчи омиллар ҳақида сўз юритилади. Тафаккур эркинлиги мустақилликни мустахкамлаш, ижтимоий тараққиётни таъминлаш ҳамда тарбия масалалари билан боғлаб тадқиқ этилади.

Китоб олий ўкув юрти талабалари, академик лицей ва касбхунар коллежлари ўкувчилари, тафаккур, онг масалалари билан қизиқувчиларга мўлжалланган. Муаллиф ўз фикрларини мантикий далиллаш баробарида турли қизиқарли мисолларни келтиради.

Тақризчи:

филология фанлари доктори

Н. Жабборов

Б 45

Эркаев А.

Тафаккур эркинлиги / А. Эркаев; Миллий ғоя ва мағкура илмий-амалий маркази. – Т.: «Маънавият», 2007. – 160 б.

ББК 66.3(5У)
71.4(5У)

**Б 4702620204-49
M25(04)-07**

ISBN 978-9943-04-063-2

© «Маънавият», 2007

КИРИШ

Инсон табиати ҳақида гап кетганда, албатта, унинг тафаккурга эга, ақлли ва айни пайтда ижтимоий мавжудот эканлиги таъкидланади. Ҳақиқатан, унинг қайси жиҳатларини, фазилатлари-ю камчиликларини олмайлик (биологик томонидан ташқари), улар охироқибат инсоннинг ақли, тафаккурига, ижтимоийлиги-га бориб тақалади. Ўз навбатида инсоннинг ижтимоийлиги ва ақли, тафаккури узвий ўзаро боғлиқ, бир-бирини тақозо этади. Жамоа, гурух бўлиб яшаш, ов ва меҳнат жараёнида, химояланишида ўз хатти-ҳаракатларини мувофиқлаштириш, хавф-хатардан бир-бирини огохлантириш, бошқа турдаги ахборот алмашиш эҳтиёжлари, айниқса тўпланган билимларни, кўнгилларни саклаб қолиб ёш авлодга ўргатиш зарурияти тафаккурни, уни юзага чиқарувчи тилни ривожлантирди.

Ва аксинча. Тафаккур ривожланган сайин жамоанинг ички ва ташқи алоқалари ранг-баранглик касб эта бошлади, жамоа мустаҳкамланди, одамлар ўртасидаги, инсон ва табиат, турли уруғ-жамоалар ўртасидаги муносабатларни тартибга солувчи меъёрлар вужудга келди ва ривожланди.

Инсоният тарихи – бу ўзаро муштарак икки ходисанинг, бир томондан, инсон билимлари, тафаккурининг, иккинчи томондан, инсон ижтимоий фаолиятининг, алоқаларининг биргаликдаги тадрижидир. Бу тадриж давомида инсоннинг табиат, жамият ва ўзи

ҳақидаги билимлари ошиб, инсон эҳтиёжлари, манфаатлари тўлароқ хисобга олина бошлади, эркинлик даражаси ўси. Инсоният ўз тарихида турли оғир даврларни, уруш ва фалокатларни, куллик ва зулмни, иқтисодий қийинчиликлар ва инқизорзларни бошдан кечирди. Лекин улардан қутулиш йўлларини тафаккури ёрдамида топди, буюк илмий ва бадиий кашфиётларни амалга оширди, ижтимоий муносабатларни такомиллаштириди, тараққиётга интилди. Жамият билан бирга инсоннинг ўзи ҳам ўси, такомиллашди.

Хозирги даврда ҳам жамиятнинг барқарор тараққиёти, ижтимоий муносабатларнинг такомиллашуви ва инсонпарварлашуви, инсоннинг ўз имкониятларини янада тўлароқ руёбга чиқариб, комиллик сари одимлаши кўп жиҳатдан тафаккурнинг эркин ривожланишига боғлиқ. Зеро, тафаккур эркинлиги жамият ва инсон эркинлигининг маънавий, интеллектуал негизидир. Эркинликнинг ҳар қандай шакли: илмий-иқтисодий, технологик, сиёсий, хукукий ва бошқалар – энг аввало жамият ва инсон томонидан англаб олиниши лозим. Эркинликнинг моҳияти, мазмуни, структураси ва таркибий қисмлари, улар ўртасидаги боғланишлар, таъсирларни тўғри тушунтириш, таҳлил қилиб такомиллаштириш, халақит берувчи омилларни бартараф этиш йўлларини топиш тафаккурнинг иши. Бунинг учун эса тафаккурнинг ўзи эркин, холис ва ижодкор, турли мағкуравий ақидалардан, бузғунчи ғоялардан, эътиқодий мутаассиблиқдан холи бўлмоғи керак. Бу айниқса мустақилликка эришиб, янги жамият қураётган бизнинг ҳалқимиз учун ниҳоятда долзарб масала.

Шу сабабдан Президент Ислом Каримов мустақилликнинг биринчи кунлариданоқ ушбу масалага алоҳида эътибор қаратмоқда. У ўзининг «Ўзбекистон: бозор муносабатларига ўтишнинг ўзига хос йўли» аса-

рида шундай деб ёзган: «Тафаккурнинг мафкуравий ақидалардан холи бўлган, ҳар бир мамлакатнинг, бутун жаҳон маърифатпарварлигининг сифат жиҳатдан янги ҳолатларга ўтиш шакллари ва йўлларининг хилма-хиллигини кўрсатиб берадиган янги тури ва услубини яратиш зарурияти етилди»¹.

Омма онгини, тафаккурини коммунистик ақидапарастлик унсурларидан халос этиш, диний ақидапарастлик иллатлари илашиб кириб қолишидан муҳофаза қилиш, ислоҳотлар мазмунини, мақсадини чукур идрок этиб, уларни амалга ошириш учун жамият аъзоларини сафарбар қилиш, янгиланиш жараёнининг фаол иштирокчиларига айлантириш, шубҳасиз, эркин, ижодкор тафаккур тарзини тақозо этади.

Тафаккурни мустақиллик талабларига ҳамда ҳозирги ахборотлар технологияси ҳаётнинг барча соҳала-рига шиддат билан кириб келаётган, бутун дунёда глобаллашув тенденциялари кучайиб бораётган давр даъватларига мослаштирмасдан туриб, ислоҳотларни юқори суръатларда ва муваффақиятли давом эттириш қийин. Бундан ташқари, йилдан-йил кучаяётган рақобат, баъзи давлатларнинг жуғрофий-сиёсий ва мафкуравий тазииклари, ахборотлар хуружи, диний-экстремистик ташвиқотларнинг сусаймаётганлиги нафақат миллий мустақилликни, шунингдек, миллий ўзига хосликни, ҳатто миллий айниятни муҳофаза қилишни долзарб масалага айлантирмоқда. Ахолининг муайян қисми, айниқса, тажрибасиз ёшлар турли хил сохта шиорлар, чақириқлар, ҳалқимизга ёт, бузғунчи ғоялар таъсирига тушиб қолишининг олдини олиш учун аввало уларни мустақил, танқидий ва эркин фикрлашга ўргатиш, улар тафаккурини ижобий мазмунидаги бун-

¹ **Ислом Каримов.** Ўзбекистон: Миллий истиқлол, иктисол, сиёсат, мафкура. I жилд, Т., «Ўзбекистон», 1996 й, 275-б.

ёдкорликка йўналтириш лозим. Фақат эркин ва мустақил, танқидий ва ижодий фикрлай оладиган кишидагина мутаассибликка, турли бузғунчи ғояларга нисбатан мафкуравий иммунитет осон вужудга келади. Фақат шундай тафаккур әгасидагина инсонпарварлик, ватанпарварлик, тараққийпарварлик ички эътиқод ва ижтимоий мўлжал даражасига кўтарилади.

Мустақиллик йиллари халқимиз онги, тафаккури анча ўзгарди. Биринчи галда оламга, жамиятга, инсонга муносабатда, турли воқеа ва ҳодисаларни, ғоялар ва эътиқодларни идрок этишда, баҳолашда коммунистик тафаккурнинг тор партиявийлик, синфиийлик меъёрлари ва тамойилларидан, вульгар, жанговар атеизмдан воз кечилди ва ҳақиқий виждан эркинлигини таъминлашга киришилди. Коммунистик мутаассибликни келтириб чиқарадиган, яъни нокоммунистик бошқа ҳар қандай муқобил қарашларни инкор ва таъқиб қиласиган, ижтимоий онгни ўта мафкуралаштиришга, ҳатто иқтисодиётни мафкурага бўйсундиришга, мафкурунинг ўзини эса ўта сиёсийлаштиришга хизмат қиласиган бу уч меъёрдан воз кечиш тафаккурни кишандан озод этди. Лекин эркин ривожланиш учун кишандан халос бўлишнинг ўзи камлик қиласиди. Ривожланишнинг зарур объектив шарт-шароитлари ва субъектив омиллари ҳам яратилиши керак.

Шу боис мустақилликнинг биринчи кунлариданоқ тафаккурнинг воқелиги бўлмиш она тилини ривожлантиришга, бойитишга, маданий меросни, халқимизнинг урф-одатларини тиклашга, айни пайтда уларни умуминсоний қадриятлар билан бойитишга, умуман маънавий юксалиш масалаларига иқтисодиёт ва давлат қурилиши билан бир қаторда устуворлик берилди. Инсон эркинликлари, эътиқод ва виждан эркинлиги, мафкуравий плюрализм Ўзбекистон Конституциясида мустаҳкамлаб қўйилди.

Халқимизга аждодларимиздан қолган буюк илмий-интеллектуал, бадиий, маънавий мерос қайтарилди ва бу иш давом этмоқда. Тарихий хотирани тиклаш, замоннинг энг янги ютуқларини ўзлаштириш давомида миллий фурур ҳам тикланиб, мустаҳкамланмоқда. Айниқса янги авлодни барқамол этиб тарбиялаш, яъни жисмонан бакувват, маънан етук қилиб тарбиялаш масаласига жамият миқёсида устувор вазифа деб қаралди.

Янги авлод эркин, танқидий, ижодий ва мустақил тафаккурга эга, мустамлакачилик даврида ўсган авлоддан фарқли, ижтимоий қўрқувдан ва миллий но-мукаммаллик туйғусидан холи, сиёсий ва ижтимоий фаол, изланувчан ва омилкор, «боқимандаликнинг ҳар қандай кўринишини ўзига ор деб биладиган» кенг билимли, маърифатли бўлиб шаклланиши лозим, деган вазифа қўйилди. Кадрлар тайёрлаш миллий дастури қабул қилинди. Ушбу муносабат билан И. Каримов «Ўзбекистоннинг 16 йиллик мустақил тараққиёт йўли» маъруzasida қуидагиларни таъкидлайди: «Ўз-ўзидан аёнки, янги давлат барпо этишда миллий ва умуминсоний қадриятлар руҳида тарбияланган, мамлакатимизни модернизация қилиш ва замонавий демократик жамият қуриш йўлидаги мураккаб ва кенг кўламли вазифаларни ҳал этишга қодир бўлган янги авлод кадрларини тайёрлаш масаласи мухим принципиал ва ҳал қилувчи аҳамиятга эга»¹.

Шу боис мамлакатимизда янги давлат таълим стандартлари ишлаб чиқилди. Умумий таълим, ўрта маҳсус ва касб-хунар таълими, олий таълим тубдан ислоҳ қилинди. Таълимнинг барча бўғинларига ўнлаб янги предметлар, фанлар киритилди.

Аммо жамиятни янгилаш, ижтимоий, иқтисодий, маънавий-маданий ҳаётни қайта қуриш, янгича дунё-

¹ «Халқ сўзи», 2007 йил 31 август сони.

қарашни, тафаккурни шакллантириш осон бўлаётгани йўқ. Барча ижтимоий жараёнлар каби улар ҳам анча мураккаб ва зиддиятли кечмоқда, кутилмаган муаммолар чиқиб қолаётир. Масалан, эътиқод ва виждан эркинлигини амалда жорий қилишда асосий муаммо коммунистик тақиқларни ва чекловларни олиб ташлашдан, диний жамоалар учун етарли шароит яратишдан, яъни масжидларни рўйхатдан ўтказишдан, имом-хатиблар тайёрлаш учун диний ўкув юртлари фаолиятига рухсат беришдан, баъзи бир мутаассиб диндорларнинг қонунларни бузмаслигини назорат қилишдан иборат деб қаралган эди. Шу боис Ўзбекистонда дастлаб эътиқод ва виждан эркинлигини таъминловчи дунёдаги энг либерал меъёрларга эга қонунлардан бири қабул қилинди (кейинчалик қонуннинг айрим меъёрлари ўзгартирилди). Лекин ҳаёт бизга яна бир сабоқ берди. Жамиятнинг бир қисми бундай эркинлик даражасини ҳазм қилишга тайёр эмаслиги, ҳақиқий ислом билан исломни ниқоб қилиб олган диний-экстремизм, тажовузкор, сиёсийлашган диний терроризмни яхши фарқлай олмаслиги маълум бўлиб қолди.

Ҳақиқий мўмин мусулмоннинг эътиқодини, виждан эркинлигини энди коммунистик ақидапарастлардан эмас, балки диний ақидапарастлардан ҳимоя қилиш зарурати туғилди. Иқтисодиётни, давлат ва жамият қурилишини, ижтимоий ва мадаий ҳаётнинг бошқа соҳаларини ислоҳ қилишда ҳам эски тафаккурнинг инерция кучи, андозалари ва бошқа қолдиқлари тўсиқ ҳосил қила бошлади. Жамиятни демократлаштириш, фуқаролик жамияти асосларини мустаҳкамлаш, мустақил оммавий ахборот воситаларини ривожлантиришда ҳам масаланинг ташкилий, моддий-иқтисодий, хукукий, кадрлар билан боғлиқ жиҳатларини ҳал қилиш етарли эмаслиги, бу борада юз бераётган ўзгаришлар кенг

омманинг онги, тафаккури, психологияси, урф-одатлари ва умуман қадриятлар тизимиға мос бўлиши лозимлиги аёнлашди. Яқин ўтмишда мустамлакачилик ва коммунистик тоталитаризм шароитида яшаганимиз учун халқимиз онги ва қадриятлар тизимиға, турмуш тарзига, табиийки, фарбча тушуниладиган демократиянинг баъзи бир меъёрлари хос эмас эди.

Ўзбекистонда демократлаширишнинг ташкилий, ҳуқуқий, моддий-иқтисодий базасини яратиш, давлат бошқаруви ва жамиятнинг сиёсий тизимини ислоҳ қилиш изчил олиб борилмоқда. Аммо масала фақат бу билангина ечилмайди. Халқнинг онги, тафаккурида ва турмуш тарзида жиддий ўзгаришлар юз бериши лозим. Бу эса анча вақт талаб қиласди.

Мустақилликнинг дастлабки йилларида жамият аъзоларининг ва турли бўғин раҳбарларининг аксариятига хос бўлган озодликдан кайфичнолик, эйфория, ҳаётга романтик муносабат вақт ўтиши билан муаммолар таъсирида анча сусайди, муносабат реал ҳаётга мос бўлди. Биз мавжуд ва потенциал қийинчиликларни, турли-туман хавф-хатарларни теранроқ англай бошладик. Бунда Президент Ислом Каримовнинг 1997 йилда нашр қилинган «Ўзбекистон XXI аср бўсағасида: хавфсизликка таҳдид, барқарорлик шартлари, тараққиёт кафолатлари»¹ асари жуда катта роль ўйнади.

Халқимиз онги, тафаккурини ривожлантиришда, мустақиллик талабларига мос дунёқарашни шакллантиришда, турли тажовузкор мафкуравий ахборот хуружларидан огоҳ этишда миллий ғоя масаласининг давлатимиз раҳбари томонидан ўртага қўйилиши, бу борада олиб борилган тадқиқот ва тарғибот ишлари муҳим аҳамият касб этди.

¹ **Ислом Каримов.** Ўзбекистон XXI аср бўсағасида: хавфсизликка таҳдид, барқарорлик шартлари, тараққиёт кафолатлари. Т., «Ўзбекистон», 1997 й.

Маънавият, миллий ғоя, баркамол инсонни тарбиялаш масалаларини ҳар томонлама теран таҳлил этиш, ўрганиш, илмий, илмий-оммабоп, илмий-услубий, маърифий-тарғибий рисолалар, мақолалар чоп этиш кўпаймоқда. Бу иш давом этаверади. Чунки ҳаёт тўхтамайди, олдимизга янги муаммоларни қўяверади.

Сизнинг эътиборингизга ҳавола этилаётган ушбу рисола тафаккур эркинлиги (эркин тафаккур) масаласига бағишиланган. Биз олдимизга қўйган олий мақсадимиз – озод ва обод мамлакатда эркин ва фаровон яшаш учун, Ўзбекистоннинг буюк келажагини яратиш учун мураккаб, зиддиятли, мафкуравий ва информацион курашларга бой давр даъватларига жавоб беришимиз лозим. Бу биздан танқидий, ижодий фикрлашни, яъни эркин ва мустақил тафаккурни талаб қиласди.

Рисолада тафаккур эркинлиги нима, унга қандай эришилади, деган саволларга жавоб изланади, тафаккурнинг тарихий шакллари ва тадрижи, тафаккурга таъсир кўрсатувчи омиллар ҳақида сўз юритилади. Тафаккур эркинлиги мустақилликни мустаҳкамлаш, ижтимоий тараққиётни таъминлаш ҳамда тарбия масалалари билан боғлаб тадқиқ этилган.

Тафаккур эркинлиги – кўп киррали илмий-фалсафий (методологик), ижтимоий-сиёсий (политологик) масала. Унинг онтологик, аксиологик, психологик, педагогик жиҳатлари ҳам бор. Рисолада масаланинг бу томонлари таҳлил қилинмайди. Шунингдек, тафаккур тарзининг услублари бўлмиш метафизик ва диалектик тафаккур ҳам алоҳида қараб чиқилмаган. Чунки бу анчагина йирик ва нисбатан мустақил мавзу.

Рисола, табиийки, камчиликлардан, баҳсли фикрлардан холи эмас. Китобхон ўзига манзур жиҳатларини маъқуллаб, камчиликлар учун муаллифни маъзур тутар деган умиддамиз.

ТАФАККУР ЭРКИНЛИГИ ЗАРУРАТИ

Собиқ совет республикалари нафақат иқтисодиётни, ижтимоий-сиёсий тизимни тубдан янгиламоқда, шунингдек, аҳолисининг, фуқароларининг онгини, тафаккурини, дунёқарашини ҳам ўзгартириш заруратига дуч келмоқда.

Ўзбекистоннинг ривожланган мамлакатлар қаторига қўшилишга интилиши биздан ҳар қандай арзигулик илмий-техникавий, технологик, иқтисодий, маданий ва ижтимоий янгиликларга, ютуқларга очик бўлган жамият қуришни, ижтимоий онгни шунга яраша шакллантиришни талаб қиласди.

Миллий ғояни тўғри қабул қилиш, уни эътиқод унсурига айлантириш онгни, тафаккурни тобеликдан, кўркувдан, миллий номукаммаллик комплексидан кутултиришни такозо этади. Президент Ислом Каримов тўғри таъкидлаганидек: «Онгни, тафаккурни ўзгартирмасдан туриб... биз кўзлаган олий мақсад — озод ва обод жамиятни барпо этиб бўлмайди»¹.

Ҳақиқатан, ижтимоий тараққиётни таъминлаш, ўз миллий тараққиёт моделимизни яратиш, такомиллаштириш учун олий мақсадимизни англаш билан бир қаторда унга эришишга бутун халқимизнинг иродасини йўналтиришимиз, ўз ақлу заковатимизга, кучимизга

¹ **Ислом Каримов.** Адолатли жамият сари. Т., «Ўзбекистон», 1998 й., 17-б.

ишонишимиз, совет даврида қарор топган ҳадиксираш тафаккуридан, онгимизга сингиб кетган ижтимоий қўрқувдан тезроқ ҳалос бўлишимиз лозим. Жаҳон ҳалқлари билан самарали ва юксак савияда мулоқот қила олиш, ғоя алмашиш ҳалқимиз учун ҳаётй эҳтиёждир. Бунинг учун эса, аввало, дадил ва замонавий, эркин фикр юритишни ўрганишимиз керак. Биз миллий ўзлигимизни тиклаш нимадан иборат эканлигини аниқ ва яққол тасаввур этмоғимиз лозим. Чунки миллий уйғониш, маънавий тикланиш жараёнида ўз ўтмисхимизнинг, тафаккур ва дунёқарашдаги анъанавий-лигимизнинг (традиционализм) ва провинциал чекланганлигимизнинг тутқуни бўлиб қолишга ҳаққимиз йўқ.

Тафаккур эркинлиги тараққиёт модели тақозо этган энг долзарб муаммолардан биридир. Миллий истиқлол мағкураси яхлит концепциясида ва маънавий-маданий тарбия амалиётида эркин фикр юритиш масалаларига етарлича эътибор қаратилиши зарур. Чунки тафаккур қанчалик эркин ва ижодкор, изланувчан ва масъул бўлса, тараққиёт модели ҳам шунчалик қайишқоқ, ижодий янгиланишларга мойил ва ҳар жиҳатдан самарадор бўлади. Хўш, тафаккур эркинлиги нималарни англатади? Бу масала тўгрисида мулоҳаза юритишдан аввал икки нарсани таъкидлашни истардик.

Биринчидан, тилимизда «ҳурфикарлилик» деган тушунча мавжуд. Мазкур тушунча Фарбда Маърифатпарварлик даврида шаклланган. У диний дорматизмни ва черков маросимчилигини рационализм нуқтаи назаридан инкор қиласиган, ижод ва илм-фанинг диндан мустакиллигини ёқлайдиган тафаккур тарзини билдиради. Атаманинг ўзи эса XVIII аср бошида инглиз файласуфи А. Коллинз туфайли фанга кирган. Тўғри, ҳурфикарлилик унсурлари азалдан мавжуд. Лекин атама

Европада ўрта асрлар диний тафаккур тарзидан кутулиш жараёни тезлашиб, табиатшунослик ривожлана бошлаганидан кейин янгича фикрлаш зарурияти ва амалиётини ифодаловчи атама сифатида вужудга келди. Шундай қилиб, хурфикрлилик рационалистик ва дунёвий фикрлаш тарзини ифодалайди.

Тафаккур эркинлиги эса хурфикрлиликни ўз ичига олган ҳолда у билан чегараланиб қолмайди. Гап бу ерда тафаккурнинг диний ва дунёвий мазмуни устида эмас, балки унинг мустақиллиги, сифати, замонавий долзарблиги, камровининг кенглиги, таъбир жоиз бўлса, «жаҳон стандартлари»га мослиги хақида кетяпти.

Иккинчидан, тафаккур эркинлиги дунёқараш масаласининг хусусий кўринишларидан биридир. Албатта, дунёқараш асосида тафаккур ётади. Аммо дунёқараш тафаккурга нисбатан анча кенг ва мураккаб ҳамда унга нисбатан бошқа даражага оид, у билан бир сатҳда ёнма-ён турмайдиган тушунчадир.

Дунёқараш тафаккур асосида вужудга келса-да, оламга энг умумий муносабат сифатида тафаккурнинг ўзига хослигини, биринчи навбатда унинг услубини, ижодкорлик салоҳиятини ва ривожланиш йўналишини, имкониятларини белгилайди. Тафаккур қай даражада метафизик бирёқламаликдан, саёзликдан, догматизм ва мутаассиблик (фанатизм)дан, мистикадан холи ёки уларга мойил эканлиги, унинг қайишқоклиги (объектив талаб ва эҳтиёжларга, ўзгарувчан шароитга, ривожланиш заруриятига мослашувчанлиги) ва теранлиги дунёқарашга боғлиқ.

Дунёқарашнинг диний ёки дунёвий мазмуни ўзўзидан тафаккур имкониятларини бевосита белгилаб қўймайди. Масалан, диний дунёқараш доирасида тафаккур нисбатан узок давр мобайнода эркин ривожланиши мумкин. Қадимги юнон политеистик диний

дунёқараши ўз замонасида тафаккур эркинлигини таъминлай олди. Исломий дунёқараш ҳам VII–XI асрларда тафаккур эркинлигини анча кенг таъминлади. «Илм олиш учун Чинга бўлса-да, боринг», «Аллоҳ назарида қирқ йиллик тоат-ибодатдан бир кунлик адолат яхшидир» каби ҳадислар тафаккур эркинлигини таъминловчи меъёrlар эди.

Боз устига, янгидан вужудга келаётган дин ёки дунёвий таълимот тафаккур эркинлиги туфайлигина, янги авлодда аввалги таълимотни танқид қила олиш, қайта кўриб чиқиш имконияти жамиятда мавжудлиги туфайлигина шаклланиши, ўз тарафдорларини топиши мумкин. Шу боис ёш динлар ва таълимотлар ўзлари тафаккур эркинлиги мевасидирлар ва мавқеларини жамиятда мустаҳкамлаб олгунларича тафаккур эркинлигини ёқлайдилар.

Энди тафаккур эркинлиги масаласига қайтамиз. Миллий тафаккуrimиз қай даражада жаҳоннинг илғор мамлакатлари қаторига кира олиш, ватаннинг буюк келажагини таъминлаш талабларига мос? Миллий тафаккуrimизнинг энг кучли ва энг заиф жиҳатлари нималардан иборат?

Энг кучли жиҳатлари ҳақида гапирадиган бўлсак, фундаментал назарий фанларнинг кўпчилик соҳалари бўйича республикада анча салмоқли салоҳият барпо этилган. Айниқса, математика, биология, микробиология, кимё, физика ва медицинанинг баъзи тармоқларида олиб борилаётган тадқиқотлар жаҳон талабларига мос. Фундаментал ва табиатшуносликка оид тадқиқотларга нисбатан тараққиёт зарурати юзага келтирган ва келтириши мумкин бўлган талабларни тўлиқ қондириш учун республикамизда илмий салоҳият етарлича. У ҳатто нафакат ички эҳтиёжларимизни қондиришга, шунингдек, юксак ривожланган бошқа мамла-

катлар билан илмий интеграцияни кучайтиришга ҳам кодир. Демак, умуман олганда, миллатнинг табиий-илмий тафаккури анча ривожланган. Лекин ижтимоий-гуманитар фанларнинг кўпчилиги коммунистик дормалар — синфиийлик ва партиявиийлик қолиплари таъсирида бир томонлама ривожланди, ўта мафкуралашиб, сиёсийлашиб кетган. Ўтмишда диний мафкура хукмронлик қилган даврда шаръий илмларда факат тафсирга, шарҳлашга имкон берилган. Айникса асосий мазҳаблар шаклланиб бўлгандан кейин, ижтиход эшиклари ёпиб қўйилган. Бу, албатта, дунёвий илмлар услубига, методологиясига ҳам таъсир кўрсатган. Совет даврида марксизм-ленинизм дорматлаштирилган шароитда, яна ўша шарҳбозликдан нарига ўтилмаган, Шундай қилиб, ижтимоий-гуманитар фанларда ижодий изланишлар, эркин фикр юритиш чекланган эди. Бу ижтимоий-гуманитар фанлар билан шуғулланадиган олимларимиз савиясига ҳам, миллий тафаккури мизга ҳам сезиларли даражада салбий таъсир кўрсатмай қолмади. Хуллас, жамиятнинг ижтимоий-гуманитар соҳада илмий тафаккури савияси бир оз паст ва чекланган. Бу биздан жаҳоннинг илфор халқлари олимлари эришган ютуқларини ўзлаштиришни, уларнинг асарларини ўзбек тилига таржима қилишни, янги назариялар ва концепцияларни бўлажак мутахассисларимизга олий ўқув юртларида ўргатишни талаб қилади. Ўтган ўн олти йил давомида ижтимоий-гуманитар фанлар истиқлол, тараққиёт модели тақозо этган тадқиқотларни етарлича амалга ошира олмади. Кўпроқ тарғибот ва илмий публицистика даражасидаги ишлар чоп этилди.

Бадий тафаккурнинг ҳам баъзи шакллари ҳақида, айрим истиснолар билан, нисбатан яхши ривожланган дейиш мумкин (бадииятда умуминсонийлик билан бир

каторда миллийлик кучли ривожланган). Миллий бадиий-инъикос хусусиятлари, образлар тизими бадиий тафаккурга қаттиқ таъсир кўрсатади. Шу боис у илмий тафаккурдан фарқли миллийлик ҳам касб этади. Лекин бадиий адабиётнинг проза, драматургия жанрларида, тарихий мавзудаги якка-ярим асарларни ҳисобга олмагандা, жаҳонга кўз-кўз қиласиган дурдоналар деярли йўқ. Миллий драматургиянинг савияси ўзига яраша. Тасвирий санъат ва ижрочилик санъатида кейинги йилларда анча жиддий ва ижобий ўзгаришлар юз берди. Театр санъатида бир қанча йирик сиймолар ўтган, яхши мактаб яратилган. Айрим театрларимиз ва театр-студияларимиз халқаро кўриклар ва фестивалларда муваффакиятлар козонмоқда. Лекин республика даражасида ўртамиёналик кўпроқ. Мусиқа санъатида, айниқса мумтоз мусиқа ижрочилигига кейинги йилларда арзигулик ютуқларга эришилди.

Умуман, халқимизнинг бадиий диди, профессионал санъати жаҳоннинг кўпчилик юксак маданий халқлариники билан таққосланиши мумкин.

Ўзбекистонда умумий мажбурий ўрта таълим тўлиқ жорий этилган. Олий таълим ва маҳсус таълим тармоғи кенг тарқалган. Халқ таълими ислоҳ қилиниб, янада такомиллаштирилмоқда. Республика аҳолиси саводхонлик ва дипломли мутахассислари сони, билими, диди, маданий савияси жиҳатидан ҳам жаҳоннинг энг ривожланган халқлари билан таққосланиши мумкин. Тўғри, ўрта маҳсус ва олий таълимнинг ихтисослик номенклатуроси совет даврида уйғун эмас эди. Баъзи бир энг замонавий касблар ва бозор иқтисодиёти бўйича мутахассислар хозирча етишмаяпти. Аммо бу борадаги камчиликлар интенсив равишда барта-раф этиляпти.

Иқтисодий тафаккуримиз эса казарма социализми

шароитида мулкдан бегоналаштирилганимиз туфайли кучли деформацияга учради. Жаҳоннинг илғор мамлакатлари иқтисодий тафаккуридан ҳозирча анча орқада. Ушбу ҳолат ўзбек моделининг имкониятлари тўлароқ юзага чиқишига жуда халал бермоқда. Умуман ислоҳотлар йўлидаги энг катта ва энг оғир қийинчилик бу иқтисодий онгимизнинг, тафаккуримизнинг қолоқлигидир.

Конунлардаги, хуқуқий меъёрлардаги камчиликларни нисбатан тез бартараф қилиш мумкин. Зарур ҳолларда қонун лойиҳалари ва ҳаракатдаги қонунларни ҳатто ҳалқаро эксперtlар ёрдамида таҳлил қилиш, уларнинг тавсияларини ҳисобга олиб, такомиллаштириш мумкин. Техник ижодкорликдаги, технологиядаги камчиликларни чет мамлакатлардан лицензиялар ёки тайёр технологиялар сотиб олиш йўли билан қоплаш мумкин. Бошқарув ва ташкилотчилик ишларидағи камчиликларни ҳам кадрлар тайёрлаш, жой-жойига қўйишни яхшилаш орқали эртами-кечми бартараф этиш мумкин. Аммо янгила иқтисодий тафаккурни, меҳнатга тамомила бошқача муносабатни жамият миқёсида шақллантириш нисбатан узок муддатни талаб қиласди. Унинг ўрнини ҳеч нима билан қоплаб бўлмайди. Янгила иқтисодий тафаккур шаклланишини бир оз тезлаштириш мумкин, холос. Бунинг учун, биринчидан, бозор иқтисодиётини тезроқ ва мумкин қадар ижтимоий йўналтирилган кўринишда қарор топтириш, иқтисодий муносабатларни янада эркинлаштириш, ҳақиқий рақобат мухитини юзага келтириш, иккинчидан, таълим-тарбия жараённада иқтисодиёт илмига етарлича эътибор қаратилиши лозим.

Техник ижодкорлик тафаккуримиз ва индустрiali меҳнатга муносабатимиз ҳам ҳозирча юксак ривожланган мамлакатлар аҳолисиникидан ортда. Бу, ал-

батта, халқимизнинг қобилияти билан боғлиқ ҳоди-са эмас. Унинг тарихий объектив сабаблари бор. Биринчидан, совет иқтисодиётида ишлаб чиқариш корхонаси фаолиятидан то давлатнинг бюджет ва молия сиёсатигача иррационал унсурлар кўп эди. Корхона фаолияти тўлиқ калькуляция (хисоб-китоб) қилин-мас, кўзда тутилмаган ноишлаб чиқариш харажатла-ри, талон-торожжиклар, суистеъмолчиликлар бор эди. Бу иқтисодий тафаккуримизни деформацияга учратди.

Иккинчидан, совет даврида юртимиз кўпроқ хом ашё базасига айлантирилгани учун аҳолининг аксари-ят қисми қишлоқда қолиб кетди. Саноат ишлаб чиқа-ришига маҳаллий аҳоли етарлича жалб қилинмади. Янги завод ва фабрикаларга кўплаб русийзабон ишчи ва инженер-техниклар кўчириб келинди. Маҳаллий халқ вакиллари индустрисал меҳнатга унчалик лаёқат кўрсатмайди, ўз қишлоғига қаттиқ боғланиб қолган, ижтимоий инерт ва ҳ.к. деган баҳоналар рўкач қили-нар эди. Аммо мустақиллик шароитида барпо этилган энг замонавий мураккаб технологиялар асосида иш-лайдиган «Шўртангазкимё» мажмуаси, Асакадаги «ЎзДЭУ» автозаводида ишлайдиганларнинг деярли 95–98 фоизи туб халқ вакиллари эканлиги уларнинг ин-дустрисал меҳнатга, замонавий технологияларга лаё-қати юксаклигини исботлаб турибди.

Учинчидан, совет мамлакатининг ишлаб чиқариш технологияси жаҳон андозаларидан анча орқада қол-ган эди, яъни биз қолоқ технология шароитида ўсдик.

Тўртинчидан, социалистик муносабатларда текис-чилик тамойилининг салмоғи юқори бўлгани учун тех-ник ижодкорлик, изланишлар, инженер-техник мута-хассислар ва ишчиларнинг ўз меҳнати натижасидан манфаатдор бўлиши яхши рағбатлантирилмас эди.

Кейинги омил умуман меҳнатга муносабатнинг мутасил ижобий томонга юксалиб, ишчи ва хизматчиларнинг малакаси жадал ўсиб боришига тўсқинлик қилди ҳамда жамият аъзоларида даромадларни стихияли қайта тақсимлашга интилишни, ишлаб чикаришда ташмачиликни (ишчилар, хизматчиларнинг ишлаб чиқарилган маҳсулотдан ҳар куни бир қисмини уйига олиб кетиб, сотиши), қўшиб ёзишларни (бухгалтерия ва хўжалик хисоботларини, сарф-харажатларни сохталаштириш) ва оқибат-натижада яширин (соя) иқтисодиётни келтириб чиқарди.

Шахс манфаатларининг жамоа манфаатларига қурбон қилиниши, инсон шахси билан яхши ҳисоблашмаслик, инсонни ижтимоий келиб чиқишига қараб баҳолаш, инсон ҳукуқларидан, умуман, ҳукуқдан партия мағкурасининг устун қўйилиши ва ҳар қандай меъёрнинг партиявийликка бўйсундирилиши ҳукуқий тафаккуримизнинг яхши ривожланмаслигига сабаб бўлди.

Совет жамиятининг ўта мағкуралашганлиги, марксизм-ленинизм ақидаларига мос келмайдиган ҳар қандай фикр, ғоя ва қарашларнинг таъқиб қилиниши, совет тузумининг салкам қирқ йиллик биринчи даврида репрессиялар кўринишида сиёсий зўравонлик бошқарув услубининг таркибий қисми сифатида очиқласига қўлланилгани (кейинги 34 йилда ҳам у бутунлай бартараф этилмади) аҳоли онгига ижтимоий қўрқувни сингдирди. Тафаккурнинг ижодий имкониятларини, ташаббусини қаттиқ жиловлади. Одамлар эркин мулоҳаза юритишдан, мустақил фикр билдиришдан ҳадиксираб қолдилар. Бошқарув ўта марказлаштирилди. Демократия ва ҳукуқ меъёрларига фақат сиёсий мақсадга мувофиқлик нуқтаи назаридан ёндашилди. Оддий ишчи ўз меҳнати натижасидан, миллат ўз мил-

лий бойликларидан бегоналаштирилди. Ҳатто ҳар қандай мансабдор шахс ёки ижодкор арбоб ҳам «Марказ» (КПСС МК тимсолида) олдида хуқуқсиз бўлди. Совет даврида инсонга социализмнинг пурвиқор биносини барпо этишда оддий «мурватча», «қурилиш фишти» сифатида қаралди. Инсон ноиндивидуаллаштирилди, ўз шахсиятидан маҳрум қилинди. У, бир томондан, оддий буюмга, ижтимоий қурилиш материалига айланиб қолди. Иккинчи томондан, амалга оширилаётган «буюк қурилиш» инсон учун қилинаётгани, унга жамиятнинг, барча бунёд этилаётган бойликларнинг эгаси унинг ўзи эканлиги тинмай уқтирилди. Аммо инсон ўзининг чорасизлигини, ёлғизлигини, «буюк қурилишнинг» воситаси эканлигини ҳар қадамда, ҳар дақиқада сезар, ўзининг «мамлакатнинг эгаси» эканлигини эса ҳис қила олмас эди. Булар барчаси оқибатда ҳар бир алоҳида шахсда ҳам, бутун миллатда ҳам номукаммаллик туйғуларини, ўзига, ўз тафаккури кучига ишончсизликни шакллантириди.

Натижада Эрих Фромм аниқлаган ҳодиса юз берди: қўрқув шахс онгига пайдо бўладиган жамиятнинг хукмрон меъёрларига зид келувчи ҳар қандай оппозицион фикрни сўндириди ва иррационал қатламга, онг остига сиқиб чиқариб юборди. Бу аста-секин умуман янги ғоядан, ғоявий ташаббускорликдан қўрқишига айланди. Тафаккур эса тобеликка ўрганиб қолди, инертилик касб этди. Тафаккурнинг баъзи ижодий имкониятлари яхши рӯёбга чиқмади. Бу, биринчи навбатда, воқеликка, ўз мавжудлик холатига, ижтимоий муносабатларга танқидий ёндашиб, ўзга халқлар тажрибасини ўрганиб, мақбул жиҳатларини етарлича қабул қила олмасликда, ижтимоий муносабатларни, турмуш тарзини муттасил такомиллаштиришга

ожизликда намоён бўлди. Одамлар ўртасида ҳатто «инициатива наказуема» («ташаббусинг жазоланади, яъни ўз гарданингга тушади» мазмунида) деган накл юрарди.

Тузум шунчалик консервативлашиб, қайишқоқлигини йўқотиб, янгиликлар учун ёпиқ системага айланниб бордики, ҳатто ўз олимлари яратган илмий-техника ютуқларини, янги технологияларни яхши қабул қилолмади. Ушбу маънода ҳам тафаккурнинг ижодий имкониятларига ички рағбат бўлмади. (Социалистик реализм туфайли бадиий тафаккурнинг ички рағбати тўғрисида ҳам шундай дейиш лозим.)

Совет жамиятининг жаҳон халқларидан «темир парда» билан ажратилганлиги тафаккуrimизни маҳдудлаштириди. Унда мафкуравий хурофот унсурлари кўпайишига сабаб бўлди. Пировардида, халқимизнинг аксарияти тафаккурида провинциаллик, анъанавийлик, авомийлик белгилари устунлик қилди.

Истиқлол туфайли биз бу қусурлардан аста-секин холи бўлмоқдамиз. Жаҳонга юз тутдик. Таълим-тарбия тизими қайта кўриб чиқилмокда. Умуман, жамиятимиз тубдан қайта яратилмоқда, янгиланмокда. Жамият билан биргаликда халқ онги ва тафаккури ўсмокда, дунёқараши ўзгармокда. Аммо бу жараён, табиийки, тез ва силлиқ содир бўладиган жараён эмас. Чунки инсон онги учун ўзининг хато андозаларидан, кўникмаларидан озод бўлиш оғир ва секин кечади. Одатда тафаккур инерцияси бошқа ижтимоий ҳодисалар инерциясига нисбатан кучлироқ. Шу сабабдан комил инсон тарбиясининг яхлит назарий концепцияси жамият аъзоларининг, биринчи галда ёш авлоднинг тафаккури эркин, ҳар қандай мутаассиблик, догматизм ва қолоқликдан холи, идрок ва таҳлил этилаётган ҳодисаларга танқидий ёндашиш, воқеликка ижодий, яра-

түвчилик талабларидан келиб чиқиб муносабатда бўлиш масалаларини, тафаккур эркинлигини тарбиялашнинг методологик масалаларини ва асосий илмий-услубий, педагогик-психологик негизларини ўзида аксэттириши лозим.

Тафаккур провинциализми нима, унинг қандай белгилари ва хусусиятлари мавжуд?

Биринчидан, унга кескин контрастлик хос. У кўп ҳолларда маҳаллий ва бачкана муаммоларга ўралашиб қолади, уларнинг аҳамиятини ортиқча баҳолайди. Ёки, аксинча, ҳавои оламшумулликка интилади. У мулоҳаза юритаётган муаммолар бўйича дунёдаги янгиликларни, муқобил фикрларни, ечимларни яхши билмайди, шу боис, унинг мулоҳазалари масалага бир томонлама, тор ёндашиш асосида саёзлиги билан ажралиб туради. Хулосалари узил-кесил, қатъий бўлиб, муқобил фикрларга кўп ҳолларда ўрин қолдирмайди. Ёки, аксинча, муросагўйликка, келишувчиликка мойиллик кўрсатиб, обрўли шахс фикрини нотанқидий қабул қиласди. Бу белгилар унинг мустакил эмаслигини, тобелигини кўрсатади.

Иккинчидан, у маҳаллий муаммоларни минтақавий ва глобал муаммолар билан чуқур боғлай олмайди. Хусусий ҳодисаларда мавжуд бўлган умумий тенденцияларни яхши пайқамайди. Аммо хусусий ҳодисаларга умумий ҳодисаларнинг белгиларини кўчиради ва, аксинча, йирик, ҳатто глобал жараёнлар тўғрисида маҳаллий (локал) ҳодисаларга караб мулоҳаза юритади. Улардан бошқа қонуниятлар юзага чиқишини, йирик, мураккаб тизимнинг таркибий қисмлари орасидаги муносабатлар кичик, содда тизим унсурлари орасидаги муносабатлардан бошқачароқ кечишини яхши фахмламайди. (Илм-фанда бу дилетантизмнинг кўринишларидан биридир.) Шунинг учун хам бу

тафаккур маҳаллийчиликни ёқлаши, бошқаларга сал беписапд қарави, ҳайтнинг энг долзарб, янгиланишга алоқадор катта оқимидан ажралиб, четда кузатувчи ёки консерватив оппозицияда бўлиб қолганлиги билан ажралиб туради. Айни пайтда унга номукаммалик комплекси (бир томонлама идрок қилиш ва шунга яраша чекланган хатти-ҳаракат қилиш, ўзига ишонмаслик, ўз-ўзини камситиш, ўз холатидан уялиш, лекин уни тубдан ўзгартишидан чўчиш) хос, ана шу комплекс уни кўп ҳолларда тортинчоқ, журъатсиз, баъзан хаёлпараст, баъзан шаккок ва нигилистик бўлишга ундаиди.

Провинциал, авомча тафаккур барча даврларда ҳам учрайди. Лекин у кўпроқ анъанавий тафаккурнинг хусусий кўриниши сифатида кенг таркалган. Чунки унинг негизини худудлар, мамлакатлар, ижтимоий-иктисодий, маданий ва бошқа алоқалар ва ахборот тизими яхши ривожланмаган, ижтимоий ҳаёт сокин ва секин кечадиган турмуш тарзи ташкил қиласди. Ижтимоий-иктисодий алоқалар кучли ривожланган, сиёсий ҳаёт жўшиб, оммавий ахборот воситалари индивид ва жамият фикрини шакллантиришнинг асосий омилларидан бирига айланган даврда провинциал тафаккурнинг ижтимоий-иктисодий замини торайди, сабаблари камайди. Аммо у анъанавий тафаккурнинг қолдиги сифатида, анча заифлашган кўринишда бўлса-да, ҳалигача анча-мунча таркалган.

Провинциал, авомча тафаккур янгиликлардан, янгича ёндашувлардан қўрқади ва анъанавийлик доирасидан узилиб чиқа олмайди. Тафаккур анъанавийлиги оламга, ҳаётга докторатик муносабатда бўлиш, уни турли бичимлар, қолиплар, одатий ва доимий тус олган баҳолар, мезонлар орқали идрок этиш, ўз онги ва ижтимоий мавқеи баркарорлигидан теран қоникиш ҳосил

қилишдир. Анъанавий тафаккур дохийлар, раҳбарлар ва бошка обрўли шахслар, айниқса, ўтмиш обрўли зотлари мулоҳазаларини, фикрларини мутлақлаштиради. Русларнинг «Сен бошлиқ бўлсанг — мен аҳмоқман, мен бошлиқ бўлсам — сен аҳмоқсан» деган мақоли анъанавий тафаккурнинг айрим хусусиятларини яхши очиб беради. Анъанавий тафаккурнинг хусусиятлари, асосий белгилари ҳақида кейинги бобларда алоҳида тўхталамиз.

Тафаккур анъанавийлиги устунлик қилган жамиятда нафақат маънавий маданият, ҳалқ таълими, тарбия, шунингдек, иқтисодиёт ва давлат сиёсати ҳам дорматик мағкурага бўйсуниб қолади, объектив зарурат кўпинча инкор қилинади, мағкурунинг ўзи эса маросимчиликнинг, анъананинг бир турига айланади, замон талабларига мослашиб, ривожланиш, янгиланиш ўрнига, ижтимоий ҳаётни ўзига мослаштиради. Тафаккур анъанавийлиги устун жамиятда шахсга сифинишга мойиллик кучлироқ бўлади. Совет давридан бизга яхши маълумки, консервативлик, фармонбардорлик, марказга содиқлик, аммо маҳаллий раҳбарият устидан шикоятбозлик унинг яна бир характерли белгисидир. Унинг анъана кучига ва марказга нисбатан ишончи иррационал мазмун касб этади. У кўпинча марказнинг ҳар қандай қарорини қўллаб-кувватлайди. Марказий ҳокимиятга нисбатан норозилик ҳисси, оппозицияда бўлиш унга ёт, қоидадан истисно. Анъанавий провинциал тафаккур соҳиблари ўз ҳаёти, турмуш даражаси ҳақида марказий ҳокимият вакили сўраса, мудом қониқиши ҳиссини билдиради. Бу, аслида, асрлар давомида Оллоҳ ва подшоҳ олдида ҳар нарсага шукур қилиб яшашга, куч олдида ҳурмат кўрсатишга ўрганиб қолган кўникманинг бир кўринишидир, холос.

Мазкур тафаккурнинг қарама-қаршиликлардан иборатлиги ундан нафақат консерватив бўлишни, балки маълум вазиятларда ўта радикал, ҳамма нарсани инкор этувчи бўлишни талаб қиласди. Масалага танқидий ёндашишнинг, танқидий таҳлилиниң ўрнини, одатда, танқидбозлик ёки метафизик инкор, нигилизм эгаллади.

Ўзбекистонда демократик ислоҳотлар бошланган дастлабки йилларда радикал чакириклар, баъзи сиёсатбозларнинг халқ ҳокимияти (демократия) тушунчасини оломон ҳокимияти (охлократия) тушунчаси билан алмаштиришга уринишларининг ёхуд диний-экстремистик сафсатабозликнинг, демагогиянинг айримлар томонидан нотанқидий қабул қилингани провинциал тафаккур радикализмига мисолдир. Маданий меросга муносабат масаласида, совет давридаги ижодкорлардан фақат Сталин қатағонларига учраган адид ва санъаткорларнинг асарларини тан олиш, бошқаларни инкор қилиш хақидаги баъзиларнинг кескин даъватлари провинциал тафаккур нигилизмидан ўзга ҳодиса эмас. Лекин бу хилдаги радикализм унчалик кенг тарқалган эмас, у кўпроқ истисно тарзида намоён бўлади.

Шундай қилиб, мазкур тафаккур моҳиятини аслида масалага ҳар томонлама ёндашмаслик, теран тахлил қила олмаслик, ижодий мустақиллик етишмаслиги, тобелик, турли тамойилларни чалкаштириб юбориш, умумлаштириш маданияти пастлиги, обрули фикрни нотанқидий қабул қилиш, зиммасига масъулият олишдан қўрқиш, воқеликни ва ҳодисаларни ўзига хос тарзда муқаддаслаштириш ташкил этади. Бизнинг тобе тафаккуримиз совет даврида марксизм-ленинизмни муқаддаслаштириди. Расман дахрийликни қабул қилди. Аммо совет даврида жамият аъзолари бир қис-

ми яширинча ибодат ва бошқа баъзи маросимларни бажариб келди, яна бир қисмининг онги тубида исломга нисбатан психологик эътиқод сакланиб қолган эди. Бугун худди шундай марксизм-ленинизмга нисбатан психологик тобеликдан баъзи бирларимиз тўла кутула олганимиз йўқ.

Совет жамиятида гуёки ҳамма бир хил «илмий-материалистик» фикр юритса-да, дин тарихи ва диний таълимотларнинг ҳақиқий илмий-танқидий таҳлилига бағишланган асарлар бармоқ билан санаарли эди. Жамият сиртдан диндан юз ўғиргани, дин пешволарини сўкиб, ҳақоратлаб, диннинг ўзини бемаънигарчилик деб эълон қилгани билан ичидан дин танқидига тақиқланган, муқаддас (сакрал) ҳодиса сифатида ёндашар эди.

Истиқлолга эришилгандан кейин виждон эркинлиги қонун орқали кафолатланибгина қолмай, амалда диннинг ривожланишига шарт-шароит яратилди. Оммавий ахборот воситаларида илгари совет давридаги қўпол, жанговар атеистик тарбибот ўрнини динни эъзозлаш эгаллади. Ҳатто қўпчилик собиқ жанговар атеистларнинг бир қисми фаол художўйларга айланди. Бу ҳам тобе тафаккурнинг бир кескинликдан иккинчи кескинликка ташланишига маълум даражада мос келади. Истиқлолдан кейин эса марксизм-ленинизмнинг чукур илмий танқидига бағишланган фундаментал асарлар ижтимоий фанларнинг бирор йўналишида чоп этилмади. Чунки фанлар вакиллари унга нисбатан ўзларидаги сакрал муносабатни, ички психологик тобеликни дастлаб тўла енга олмадилар. Факат юзаки танқид ва инкор билан чегараландилар. Бугун эса мазкур масала ўзининг долзарблигини анча йўқотди.

Бизни қизиқтирадиган нарса дунёқараш ва иймон-

эътиқод масаласи эмас, балки тафаккур эркинлигидир. Провинциал тафаккур тўпорилиги, психологик жихатдан мустақил бўлмагани учун унга доимо етакчи ёки тақлидга яроқли намуна керак. Етакчи сифатида нисбатан кенг тарқалган ғоя ва унинг тарғиботчиси ёки бирор соҳада катта ютуқларга эришган конкрет шахс бўлиши мумкин. Бу хусусият нафақат провинциал, маҳдуд тафаккурга, умуман, кенг авом тафаккурига, шу жумладан фарб мамлакатлари авом оммаси тафаккурига ҳам хос.

Авом тафаккури ўзига сигиниш, тақлид қилиш учун «санам» яратишга уста. Фарбда қўпинча бу эҳтиёж спорт ва санъат юлдузларига ихлос қилиш орқали қондирилади. Аммо аҳён-аҳёнда ҳар хил сиёсий авантюристлар, қаллоблар, мансабпаастлар бу эҳтиёждан ўзларининг ғаразли худбин мақсадларида фойдаланадилар. Майший даражада турли алдоқчилар, фирибгарлар, сохта табиблар, экстрасенслар ва шу кабилар пайдо бўлиб туради. Улар маълум объектив шарт-шароит туғдирган эҳтиёжларнинг мевасидир. Мана шундай эҳтиёжлардан бири тафаккурнинг тобелиги, унга етакчи зарурлиги, унинг мустақил хulosса чикара билмаслигидир. У жон-жон деб бошқанинг иродасига бўйсунади ва зиммасидан ҳар қандай масъулиятни сокит қиласиди.

Тобе тафаккур, масъулиятдан қўрқадиган тафаккур Ўзбекистон истиқоли эҳтиёжларига, тараққиёт модели талабларига зид келади. Чунки бу тафаккур эгалари илмий-техникавий, иқтисодий янгиликларни етарлича қабул қила олмайди, ижтимоий-сиёсий ва иқтисодий муносабатларни такомиллаштиришдан кўра кўпроқ уларни турғунлаштиришга мойиллик кўрсатадилар. Тобе тафаккур эгалари, шунингдек, турли сиёсий кўпорувчилар, диний экстремистлар тарғиботига,

найрангларига учишлари, уларнинг ортидан эргашишлари мумкин. Бундан ташқари, улар ўз умрини ўтаб бўлган, тарихий анохронизмга, замонавийлик нуктаи назаридан сохта қадриятга айланган ғояларни, ҳодисаларни тиклашга мойиллик билдирадилар.

Бунга мисол қилиб Афғонистондаги толиблар хукмронлиги даврида Буюқ Хуросонни, баъзи рус шовинистлари орасида Россия империясини, ўта кескин коммунистик реваншистлар орасида СССРни, «Хизб ут-тахрир ал-исломия» тарафдорларида Ислом халифалигини, вахҳобийларда пайғамбар давридаги ислом синкетизми ва теократик жамиятини тиклаш каби ғоялар машҳурлигини кўрсатиш мумкин. Афсуски, бундай сохта ғояларга Ўзбекистонда ҳам баъзи бир кишилар учмоқда.

Миллий қадриятларни тиклаш, маданий меросга муносабат масаласида ниҳоятда нозик дид, фуқаровий етуклиқ, танқидий таҳлил ва айни пайтда эҳтиёткорлик талаб қилинади. Истиқлол туфайли маданий меросимизнинг, шу жумладан, диний меросимизнинг халқдан яширилган ёки нотӯғри талқин қилиб келинган бебаҳо намуналари халққа қайтарилди.

Кенг халқ оммаси ёппасига саводхон бўлишига қарамасдан, Беруний, Ибн Сино ва қисман Ал-Хоразмий, Форобий ва Улуғбекдан ташқари табиатшунослик илми даҳолари бўлган буюк аждодларининг, Ал-Бухорий, Исаат-Термизий, Нақшбанд каби диний даҳоларнинг фақат номини биларди. Аҳмад Фарғоний, Али Қушчи, Фиёсиддин Жамшид Коший, Қозизода Румий, Нажмиддин Насафий, Нажмиддин Кубро, Азизиддин Насафий, Бурҳониддин Марғиноний, имом Мотурудий каби дунёвий ва диний илм даҳоларини қўя турайлик, ҳатто яқиндагина ўтган, Сталин қатағонлари курбонлари – жадидларнинг нафакат ижодини биларди, балки кўпчи-

лигининг номини ҳам XXасрнинг иккинчи ярмида шаклланган авлоднинг аксарият вакиллари эшитмаган эди. Маданий меросимизни бугун қайтадан кашф этмоқдамиз. Уни холис ва илмий шарҳлашга эътибор катта. Олимларимиз хайрли ишлар қиляптилар. Аммо баъзи бир кескинликдан қарама-қарши иккинчи кескинликка интилиш ҳоллари йўқ эмас. Бу ҳам провинциал тафаккуримизнинг усулда ва услубда андозаларга, қолипларга ўрганиб қолганлиги асоратидир.

Тафаккур тобелигидан кутулиш учун, биринчидан, жамият аъзоларининг онги ва онгостидан ижтимоий қўрқув сарқитларини сиқиб чиқариш керак. Бунинг асосийchorаси ижтимоий ҳаётнинг барча соҳаларида инсон ҳуқуқлари устуворлигини қатъий таъминлаш, демократик муносабатларни ривожлантириш, жамият ҳаётини барча йўналишларда эркинлаштиришdir. Инсон ўзининг шахсий ҳуқуқлари дахлсизлигига, кафолатланишига қаттиқ ишониши, амалда, кундалик турмушда бунга амин бўлиши лозим. Жамиятда демократия тамойиллари тўла қарор топиб, маълум инерция кучи ҳосил қилса ва ўзини турли тасодифлардан муҳофаза қила олса, иқтисодий ва ижтимоий ҳаёт йилдан-йил либераллашиб бора-верса, онгдаги ва онгостидағи қўрқув сарқитлари бартараф бўлади.

Иккинчидан, провинциалларча фикр юритишдан кутулиш зарур. Бунинг учун эса миллий маҳдудликнинг кўринишлари барҳам топиши, жамиятимизнинг очиқлик даражаси янада кучайиши, хориж мамлакатлари билан иқтисодий, илмий, маданий, туристик, информацион ва бошқа алоқалар кенгайиши, ривожланиши, Ўзбекистон жаҳон ҳамжамиятига ҳар томонлама tengҳукукли ва фаол интеграция бўлиши лозим. Фақат замонавий илмий-техникавий ва инфор-

мацион тараққиётнинг қудратли оқимиға тушиб олиб, миллий маданиятимизнинг бошқа халқлар маданияти билан самарали алоқаларини, уларнинг энг илфор ютуқлари ҳисобига бойишини, ўз ютуқларини жаҳонга чиқаришини таъминлаш орқали тафаккур маҳдудлигини, анъанавийлигини ва провинциализмини, миллий номукаммаллик комплексини тўла енга оламиз. Бу, ўз навбатида, ўзбек модели имкониятларини яхшироқ юзага чиқаради ва доимий такомиллашиб бориши учун керакли ақлий-интеллектуал ва ҳиссий-эмоционал муҳит ва воситалар яратади, зарурат туғдиради.

Учинчидан, таълим-тарбия жараёнида ёш авлодда воқеликка, ўзининг ва жамиятнинг мавжудлик ҳолатига танқидий ва ижодий муносабатни тарбиялаш керак. Танқидий ва ижодий рух етарлича шаклланмаган шахс ҳам, бутун авлод ҳам тафаккур тобелигидан тўла халос бўлолмайди. Бундай шахс ва авлод кашшофоникка, жамиятни янгилашга, ўз мавжудлик ҳолатини яхшилашга анча-мунча лоқайд қарайди, дадил фикр юритишдан, муқобил карор қабул қилишдан чўчийди, анъанавийликка мойиллик кўрсатади.

Шу боис таълим-тарбиянинг барча босқичларида ёш авлоднинг ҳар бир вакилида мустақил, танқидий фикрлайдиган шахсни вояга етказиш, аввало у билан шахс сифатида ҳисоблашиш, унга катталарни хурмат қилиш, урф-одатларга риоя қилиш баҳонасида тазиик қилмаслик шарт. Урф-одатларга, маданий меросга ёш авлодда, бир томондан, чуқур иззат-хурматни, эъзозли муносабатни, иккинчи томондан — танқидий муносабатни тарбиялаш зарур.

Авлодларнинг табиий-тариҳий алмашуви жараёнида бугун шаклланаётган ёшлар халқимизнинг асосий иқтисодий-ишлиб чиқариш, ижодий-интеллектуал ку-

чиға айланади. Уларнинг дунёқараши, тафаккури қай даражада илғор бўлиши, жаҳоннинг энг юксак талабларини ўзига мўлжал қилиб олиши ўзбек моделининг истиқболларини, мамлакатимизнинг жаҳон ҳамжамиятидаги ўрнини белгилайди.

Шу боис тафаккур ривожланиши, жамиятнинг ақлий-интеллектуал салоҳияти янада кучайиши, унда илғор тараққийпарварлик меъёрларининг ортиб бориши, ёшлар дунёқараши қандай идеалларнинг таъсирида шаклланиши жуда долзарб масала. У миллий истиқлол мағкурасининг марказида туради ва устувор йўналишларидан бирини ташкил этади.

Халқ таълими, илм-фан, санъат, маданият масалаларида қўлга киритилган ютуқларимиздан айрилиб, орқага кетишга ҳаққимиз йўқ.

Ўтиш даврининг муқаррар объектив ва субъектив қийинчиликлари ижтимоий онг инерцияси билан биргаликда тафаккур эркинлигини ривожлантириш йўлида муайян тўсиқлар ҳосил қилмоқда. Улар орасида биринчи навбатда катта ёшдаги аҳоли онгининг ўзига хос маргиналлигини ажратиб кўрсатиш керак. Бу ҳақда ҳам кейинги бобларда алоҳида тўхтамиз.

Маргиналлик кўп ҳолларда ижтимоий пассивликни, баъзан лоқайдликни ва жамият ҳаётида вужудга келган қийинчиликлар олдида эсанкираб қолишини келтириб чиқаради, шу жумладан тарбия борасида ҳам. Бунда меҳнат ва касб тарбияси, меҳнат бозори талабларига мослашишни шакллантириш, ишбилармонлик билан шуғулланиш кўнікмаларига ўргатишдан тортиб, то сиёсий ва хуқуқий маданиятни ўстиришгача бўлган тарбиянинг барча йўналишлари ва шакллари назарда тутилмоқда.

Фақат янги шароитда вояга етган авлод онги мар-

гиналликдан халос бўлади. Авлодларнинг табиий-тариҳий алмашинуви жараёнида янги шароитда шаклланган авлоднинг нисбий улуши корхона, ташкилот, муассасаларда, умуман халқ хўжалигида, айниқса, бошқарувнинг турли бўғинларида маргинал онг соҳибларига нисбатан устунлик қиласа, ўзбек модели имкониятлари юзага чиқиши, жамият ҳаётини демократлаштириш тезлашади.

Тарбия орқали шаклланадиган иқтисодий, сиёсий тафаккур, касбий ва ижтимоий фаоллик таракқиёт модели ва салоҳиятига бевосита таъсир кўрсатувчи субъектив омиллардир.

Тафаккур эркинлигини ривожлантириш, халқимизни бунёдкорлик салоҳиятини тўлароқ юзага чиқариш учун ички ва ташқи таҳдидлардан огоҳ бўлиб, ижтимоий қўркувни туғдирувчи ёки озиқлантирувчи ҳар қандай омилларга қарши фаол курашмок, демократияни ва фуқаролик жамияти асосларини мустаҳкамламоқ зарур. Эртанги кунга ва ўзига ишонч аҳоли онгигда ислоҳотлар самараси ошган сайин ўсиб бориши муқаррар. Айнан келажакка ва ўзига ишонч турли хил номукаммаллик туйгуларидан халос бўлишга ёрдам беради. «Биз ҳеч кимдан кам эмасмиз, кам бўлмаймиз» ғоясини ёшлар онгига сингдириш, соғлом миллий фурурни шакллантириш жуда муҳим.

Тафаккур эркинлигини таъминлаш Ўзбекистон учун, биринчидан, миллий мустақилликни мустаҳкамлашни, иккинчидан, плюралистик қарашларни, ўзаро фарқ қиласиган партиявий мафкураларни вужудга келтириш орқали жамиятни демократлаштиришни, учинчидан, инсон хуқуқлари ва инсон шахси қадрининг янада ўсишини, тўртинчидан, иқтисодий ислоҳотларни чуқурлаштиришни, илмий-техника таракқиётини тезлаштиришни, бешинчидан, жаҳон

хамжамияти билан интеграцияни кучайтиришни билдиради. Шу боис доктор, тобе тафаккур саркитларидан, тафаккур анъанавийлиги ва провинциализмдан тезроқ қутулиш истиқлол ва миллат истиқболига, тараққиёт моделимизнинг самарадорлигига дахлдор масаладир.

ТАФАККУР ЭРКИНЛИГИ

1. Умумий мулоҳазалар

Тафаккур эркинлиги масаласи ўзининг илмий-фалсафий жиҳатидан ташқари, аниқ амалий йўналишига ҳам эга. Чунки Ўзбекистонда янги жамият барпо этиш ижтимоий онгни, одамларнинг оламга, инсонга ва жамиятга муносабатини ўзгартиришни тақозо этади. Ислом Каримов адолатли таъкидлаганидек: «Тафаккур озод бўлмаса, онг ва шуур тазиикдан, қулликдан кутулмаса, инсон тўла озод бўлолмайди. Таракқиёт тақдирини маънавий жиҳатдан етук одамлар ҳал қиласди»¹.

Иқтисодиёт эркинлашиб, ҳақиқий бозор муносабатлари қарор топиши учун ҳам, ижтимоий ва шахслараро муносабатлар юксак ахлоқийлик, адолат ва инсонпарварлик тамойиллари асосида ривожланиши учун ҳам, демократик меъёрлар жамият ҳаётининг, фуқаролар онгининг ажралмас ва зарурий қадриятларига айланиши учун ҳам тафаккур эркинлиги зарур.

Турли чекланишлар домидаги тобе, қотиб қолган догматик, ёки ижтимоий қўрқувдан сохта фаоллик, тоталитар яқдиллик хусусияти касб этган тафаккур ёхуд диний-экстремизм ғояларига муккасидан кетиб мутаассибликка айланган тафаккур инсон камолотига, жамият тараққиётига салбий ва бирёқлама таъсир

¹ **Ислом Каримов.** Ватан саждагоҳ каби муқаддасдир. Т.: «Ўзбекистон», 1996, 34-б.

кўрсатади. Жамият ҳаёти, фан, санъат, маданият тарихини ўргангандага шу нарсага амин бўламизки, қачон ва қаерда тафаккур нисбатан эркин ривожланган бўлса, ўша ерда тараққиёт юз берган. Аксинча, қаерда ва қачон доктринализм кучайиб, тафаккурда турғунлик бошланган бўлса, ўша ерда ижтимоий тараққиёт секинлашган, тўхтаган, хатто ортга кетган. Буни қадимги тамаддунлар тақдири, ўз халқимизнинг неча минг йиллик тарихи ҳам кўрсатиб турибди.

Мамлакатимиз жаҳон ҳамжамиятига тобора чуқур интеграциялашиб бораётгани, халқимизнинг жаҳондаги ривожланган миллатлар қаторидан жой олишга интилиши моддий-иктисодий омиллар, юксак технологиялар билан бир қаторда, маънавий омилларни ривожлантиришни ҳам тақозо этади. Лекин ҳар икки гурух омилларни ривожлантиришнинг ўзи инсон тафаккури ўсишига, ижодий яратувчилик салоҳияти кучайишига боғлиқ. Туб ислоҳотларнинг чуқурлашиши жараёнида ижтимоий онгдаги ўтмишдан қолган баъзи қолок тушунчалар, маъмурий-буйрукбозлик иллатлари, боқимандалик кайфиятларининг секин барҳам топаётгани ёки баъзи ёшларга бузғунчи, ёт ғоялар таъсир кўрсатаётгани, мафкуравий иммунитет етишмаслиги тафаккур эркинлиги масаласининг дол зарблигини оширмоқда.

Тафаккур эркинлиги умумназарий томондан фалсафанинг энг мураккаб масалаларидан биридир. У оқибатда фалсафий илмнинг барча таркибий қисмлари – онтология, гносеология, методология, логика, аксиология, этика, эстетика ва х.к. ҳамда психология билан, хусусий илмий жиҳатдан эса барча фанлар билан, образли мушоҳадаси орқали бадиий ижоднинг барча турлари билан у ёки бу даражада боғланади. Бинобарин, уни атрофлича фалсафий таҳлил қилиш

амалда мазкур йўналишлар, таркибий қисмлар, илмий тизимлар тамойиллари ва мезонларини ҳам назарда тутиб, масалани тадқиқ этишни ёки ҳеч бўлмагандан, умумий фалсафий таҳлилда турлича ёндашувлар, нуктai назарлар, тамойиллар мавжудлигини кўзда тутишни ва сўнг умумлаштиришни тақозо этади. Лекин шунда ҳам барчага маъқул, ички зиддиятсиз ва уйғулашган хуносаларга келиш қийин. Чунки тафаккур эркинлиги масаласи ҳаётнинг, жамият ва инсоннинг ўзи каби мураккаб, зиддиятли, серқирра ва битмас туганмасдир. Унинг мезонлари ҳам жамият юксалиши, тараққий этиши жараёнида ўзгариб, янги талаблар хисобига бойиб боради.

Тафаккур тарзи, бир томондан, илм-фан, мантиқ, адабиёт ва санъат эришган савия, яъни оламни илмий ва бадиий билиш даражаси билан боғлиқ бўлса, иккинчи томондан – ижтимоий амалиётга, яъни қарор топган шахслараро, шахс ва давлат, шахс ва жамият, шахс ва табиат ўртасидаги муносабатлар мазмунига, шаклларига, ижтимоий ишлаб чиқариш ва технологиялар даражасига боғлиқ. Омоч билан ер хайдаб, дехкончилик қиласидиган, урчук билан ип йигириб, бўз тўқийдиган, уйини кора чирок ёрдамида ёритадиган, дунё воқеаларини-ку қўя турайлик, ҳатто қўшни қишлоқда нима бўлаётганидан, агар бориб кўрмаса ёки бирор киши келиб гапириб бермаса, бехабар коладиган давр қишининг онги, дунёқарashi, интилишлари ва идеалларидан, фикр-мулохаза юритишидан қишлоқ хўжалиги механизацияшган, саноатда автоматик дастгоҳлар ва кибернетик курилмалар қўлланиладиган, ОАВ бир зумда ҳар кандай ахборотни бутун дунёга тарқатадиган давр қишининг онги, дунёқарashi, қадриятлар тизими ва тафаккури кескин фарқ қиласиди, албатта. Ижтимоий тараққиёт даражаси та-

факкурнинг ривожланиш даражасини ҳам, эркинлик даражасини ҳам белгилайди. Ва, аксинча, тафакур кучи, имкониятлари, оламни билиш меҳнат куролларини, ишлаб чиқариш технологияларини, фан ва техникани, адабиёт ва санъатни ривожлантириш орқали жамият тараққиётига, инсон камолотига бевосита таъсир кўрсатади.

Тафакур эркинлиги нисбий ва тарихий характерга эга. Тафакур эркинлигини белгиловчи ҳар бир тарихий даврнинг ўз ўлчовлари, мезонлари бор. Улар ўзгариб, ривожланиб туради.

Тафакур эркинлиги инсон эркинлигининг ажralmas қисми ва негизидир. У, юкорида айтилганидек, жамият инсонга яратиб берган имкониятлар ва эркинликларнинг маҳсули ва инъикосидир. Айни пайтда эса у инсон эркинлигининг ақлий пойдеворидир. Оқибат натижада тафакур эркинлиги ҳар қандай эркинликнинг (виждон эркинлигининг, сиёсий, хукукий, иқтисодий эркинликларнинг, умуман дунёқараш эркинлигининг ва х.к.) маънавий негизини, интеллектуал шарт-шароитини ташкил этади. Тўғри, эркин тафакур бевосита виждон эркинлигини ёки сиёсий, иқтисодий эркинликларни юзага чиқармайди. Аммо тафаккури қарам киши, ҳатто виждон эркинлиги тўла таъминланган жамиятда ҳам, субъектив тушунчадаги тўлаконли эътиқод эркинлигига эриша олмайди. Жамиятда мафкуравий ва сиёсий эркинлик вужудга келса-да, тафаккури қарам кишилар, гурухлар жанговар атеизмга ёки диний радикализмга (ҳар иккаласи ҳам ғоявий мутаассиблиқдир) оғиб кетиши мумкин. Чунки тафаккури қарам шахсда ғоявий иммунитет ва ирода заиф бўлади. У мустақил хулоса қилиш, ходисалар ва жараёнларни холис баҳолаш масъулиятидан чўчийди.

Эркинликнинг бошқа шакллари, хусусан, шахснинг сиёсий ва хуқукий эркинлиги тўғрисида ҳам шундай дейиш мумкин. Сиёсий эркинлик нима? Объектив нуктаи назардан у муайян давлат конституцияси, қонунлар мажмуи томонидан алоҳида фуқаролар ва турли сиёсий, жамоат ва нодавлат ташкилотларига ўзларининг ҳокимиятга (хар учала бўғинига) ва умуман сиёсий тузумга нисбатан муносабатларини эркин ифода қила олиш (сайлор, ОАВ, турли оғзаки ёки ёзма мурожаатлар, таклифлар орқали) учун яратилган хуқукий ва амалий имкониятлардир. Субъектив нуктаи назардан эса фуқаролар, партиялар ва ш.к.ларнинг бу имкониятлардан онгли равишда ва самарали фойдалана олишидир. Тафаккури тобе шахс ҳам, илмий жиҳатдан хато, дорматик ёки эклектик таълимотга таянган партия ҳам яратилган объектив сиёсий эркинлик имкониятларидан самарали фойдалана олмайди: ё ўз хукуқларини тўла, охиригача англаб, амалда қўллай олмайди, ё ўз хукуқларини ортиқча баҳолаб, ҳокимиятга ва жамиятга асоссиз талаблар кўя бошлайди, тазийк ўтказишга ҳаракат қиласди.

Тафаккури бирорга қарам ёки чекланган киши ўз экзистенциал ҳолатини ва эҳтиёжларини ҳам, ижтимоий-тариҳий заруратни ҳам тўлиқ англаб ололмайди, бир ёқлама тушунади. Ҳодисалар ва вазиятни таҳлил этиб, мустақил қарор қабул қилишда, эркин танлашда қийналиб қолади. Ўзга фикрларни танқидий баҳолашда қийналиш уни бошқалар ортидан кўр-кўронада эргашишга ёки интуитив ҳаракат қилишга ундейди. Бу эса доим ҳам яхши натижаларга олиб келавермайди, инсон эркинлигини чеклаб, тасодифларга ёки ўзга иродага қарам қилиб кўяди. Турли ижтимоий гурухлар, диний экстремистик секталар ва оқимлар таъсирiga кўпроқ ҳаётий билимлари ва тажрибаси кам,

иродаси заиф ва тафаккури ҳам унчалик эркин бўлмаган кишилар, айниқса ёшлар тушиб қолади.

Бундай кишилар, одатда, кўпинча оддий ижрочи-лар бўлиб, улар мустақил қарор қабул қилишга ўрган-маган, аксинча, раҳбарларнинг, бошликларнинг кўрсат-маларини бажаришга ўрганиб қолган билим даражаси паст кишилардир. Ўзгалар таъсирига тушувчиларнинг иккинчи гурухи ўсмирлар ва ёшлардир. Улар ота-она-сининг қарамоғидан энди мустақил ҳаётга чиқаётган (бинобарин, шу пайтгача мустақил қарор қабул қилиш, мустақил хulosса чиқаришдан йироқ бўлган), ота-она-си, ўқитувчилари ёки обрўли шахс (кўпинча ўзидан катта ёшдаги болалар) иродасига бўйсунишга одат-ланган.

Ўсмирликдан ёшликка ўтиш даврида уларда инди-видуал мустақилликка интилиш пайдо бўлади. Даст-лаб ота-онаси ва қариндошлари, сўнgra ўқитувчилари фикрини танқидий қабул қила бошлайди. Баъзи ҳолларда танқидий қарашлар ўзига хос ички норози-лик, ҳатто оилада ёки мактабда «катталар» билан ке-лишмовчиликка айланиши мумкин, Айнан ўсмирлик-дан ёшликка ўтиш даврида (14–18 ёшлар) улар оила ва мактабдаги меъдага тегиб қолган панд-насиҳат-лар ва аллақачон такрорланавериб таъсирини йўқо-тиб қўйган чакириклардан муқобил қарашларниifo-далайдиган ғояларга қизиқадилар. Аслида эса янги таъсирга интиладилар. Ҳаётий тажрибаси, билими етишмайдиган, мустақил фикрлаш малакасига эга бўлмаган, ҳеч қачон масъулиятли қарор қабул қилиб кўрмаган ёш йигит ёки қиз ўзга фикрни осонгина қабул қилади. Унинг ташки жиҳатдан жозибали, бузғунчи, сохта ғоя таъсирига тушиб қолиши осон, айниқса бу ғоя адолат, Ватан, миллат, халқ манфаа-ти, имон-эътиқод, ҳалоллик каби тушунчалар билан

ниқбланиб тортиқ қилинса. Шу боис ўсмирлар ва ёшлар қайси мухитда, қандай кишиларнинг таъсирида эканлиги мухим аҳамиятга эга. Бундан оила ва жамият огоҳ бўлишлари керак.

Юкоридагиларни умумлаштириб дастлабки хуло-сага келадиган бўлсак, тафаккур эркинлиги бирламчи шаклда шахснинг мустақил мулоҳаза юритиш ва баҳолаш масъулиятини ўз зиммасига олишидир.

Ўз экзистенциал ҳолатини, эҳтиёжларини ва ижтимоий-тарихий заруратни яхши англаган киши учун вазиятни ва истиқболни тўғри баҳолай олиш, масала ечимининг, ҳаракатнинг мавжуд вариантларидан ўзига энг маъқули ва мақбулини танлаш имкони туғилади. Лекин ўз-ўзидан бу имконият юзага чиқиб қолмайди. Чунки эркин тафаккур объектив шарт-шароитлар, субъектив интилишлардан (маълум мақсадга), хоҳиш-истакдан ташқари фикрлаш маданиятини ҳам тақозо этади. Фикрлаш маданияти, оддий қилиб айтганда, икки жиҳатни ўз ичига олади. Бир томондан, у билимлардан иборат, яъни муҳокама ва таҳлил қилинаётган нарса, ҳодиса ёки фикр тўғрисидаги тушунчаларни, мавжуд қарашларни (шу жумладан илмий, назарий қарашларни) билишдан, иккинчи томондан, мантикий нуқтаи назардан (формал ва диалектик) тўғри таҳлил қила олиш ва хулоса чиқаришдан иборатdir. Бу тафаккур (фикрлаш) маданиятининг субъектив мавжудлигидир. Унинг объектив мавжудлиги предметлашувда, яъни фикрнинг, ғоянинг ҳаётга, амалиётга айланишида намоён бўлади. Бошқача айтганда, тафаккур эркинлигининг объектив мавжудлиги шахснинг (умуман социумнинг барча кўринишларининг) хулқ-атворида, амалиётида, ижодий яратувчилигига акс этади.

Билими кам киши баҳсда ёки сухбатда эшитган гап-

ларини тўғри, холис баҳолай олмайди. У иккиланиши, сұхбатдоши далилларининг тўғрилигига шубҳа қилиши мумкин, аммо асослар ёрдамида рад этишга ожиз. Агар ички туйғу уни «оғоҳлантирмаса», у сұхбатдош фикрини тўлиқ ёки қисман қабул қилиши ҳеч гап эмас. Лекин тафаккур маданиятига билимнинг ўзи камлик қиласи. Билим кўпроқ пассив эрудициядан, ахборотлар мажмуидан иборат бўлиб қолса, унда тахлил қилиш, мустақил холосалар чиқариб янги фикр яратиш орқали янги нарса ижод қилиш, яъни амалиётга айланиш салоҳияти етишмаса, у тафаккур маданиятига айланмайди. Билим ижодкорлик салоҳияти билан қўшилганда гина тафаккур маданияти юзага келади. Фикрлаш маданиятисиз тафаккур эркинлиги юзага чиқмайди.

Эркинлик, маълумки, онгли, бутун масъулиятни хис этиб танланган ва амалга оширилган қарорда вое бўлади. Шу боис Гегель эркинлик англаб олинган зарурат, деганида тафаккур эркинлигининг ёки Гегель атамаси бўйича, рух эркинлигининг моҳиятини ифодалаган эди. Энгельс эса, унга қўшимча қилиб, эркинлик англаб олинган зарурат бўйича ҳаракат қилиш, деганида ушбу моҳиятнинг ҳодисага айланишига, қандай юзага чиқишига урғу берган эди.

Инсон унга жамият сиёсатда, иқтисодиётда, маданиятда ва ҳ.к. бера олиши мумкин бўлган эркинлик даражасидан ортиқ эркинликни кўлга кирита олмайди. Ҳатто реал ҳаётда кўпинча у (конкрет шахс ва индивид мисолида) ўша имкониятдан ҳам тўлиқ фойдалана олмайди.

Тафаккур соҳасида ҳам бундай боғлиқлик умумий ҳолда мавжуд, лекин сиёсий ва ижтимоий-иктисодий, маданий ҳаётга нисбатан анча заиф. Бу тафаккурнинг нисбатан муҳторий характеристидан келиб чиқади. Иқти-

содий жиҳатдан ночор яшайдиган, хизмат поғоналари бўйлаб юқорига кўтарила олмаган, аммо чукур тафаккурга, кенг дунёқарашга эга бўлган кишилар ҳаётда кам учрамайди (гап ҳавои ҳаёлпастлар ҳақида кетмаяпти). Баъзи бир ижодкор шахслар эса ўз замонасидан анча илгарилаб кетган ғояларни олға суришлари, буюк қашфиётлар қилишлари тарихдан маълум. Абу Райхон ал-Беруний, Леонардо да Винчи каби буюк даҳолар ижоди бунга ёрқин мисолдир. Лекин жамиятнинг тайёргарлик даражаси, бу ғояларни, қашфиётларни ҳазм қила олиш, ҳатто қабул қила олиш имкониятлари уларни юзага чиқаришга йўл қўймайди. Боз устига, жамият бундай ғоялар муаллифини сал ғала-тироқ инсон, баъзан эса савдои деб баҳолашгача боради (агар улар ўз ғояларини, қашфиётларини амалга оширишга ҳаддан зиёд киришиб кетсалар).

Шундай қилиб, тафаккур эркинлиги ўта мураккаб ва зиддиятли масаладир. Уни бир томонлама узил-ке-сил ҳал қилиш, тафаккур эркинлигини тақозо этувчи ягона омилни ёки омиллар гурухини ажратиб кўрса-тиш мумкин эмас.

Тафаккур эркинлиги инсон эркинлигининг негизини ва намоён бўлиш шаклларидан бирини ташкил этади, дедик. Айни пайтда инсон эркинлиги ҳам тафаккур эркинлигининг асосий шартларидан бирини ташкил этади. Инсон эркин бўлмаган жамиятда тафаккур эркинлиги аксарият учун чекланади, фақат юқори табақалар, ижодкорларнинг бир қисми эркин фикр юритиш имтиёзига (ҳукуқига) эга бўлади. Гап бу ерда алоҳида шахс тафаккури устида бормаяпти. Эзоп қул бўлса-да, эркин фикрлаган. Қуллар ва крепостнойлар орасидан атоқли санъаткорлар, ихтирочилар, ижодкорлар етишиб чиқсан ва х.к. Алоҳида шахс тафаккури истисно тарикасида ўз даври учун илгор ва нисба-

тан эркин бўлиши мумкин. Гап жамиятдаги эркинлик даражасининг ижтимоий тафаккур йўналишига, унинг танқидийлиги ва мустақиллигига, ижодий ёки догматик характерига таъсири ҳақида кетмоқда.

Жамиятнинг инсон учун яратган реал иқтисодий қулайликлари ва имкониятлари, юридик ҳақ-хукуқлари, қарор топган ахлокий ва маънавий муҳити унинг тафаккури эркин, илфор, юксак идеалларни кўзлаган ёки чекланган, қолоқ, мутаассибликка мойил бўлишига таъсир кўрсатади.

Тафаккур эркинлигини белгиловчи умумижтимоий (умумтамаддуний), хусусий, ижтимоий (ёки ижтимоий-сиёсий), маданий-маърифий омиллар гурухи каторида маънавий-эътиқодий, илмий-фалсафий омиллар гурухи ажralиб туради. Тафаккур эркинлигига, шунингдек, инсоннинг ҳиссий-психологик мойилликлари, хатти-харакатини, қарорларини баҳолашда ички ҳиссиётларини жиловлай олиши, ўз-ўзига танқидий муносабатда бўла олиши ҳам таъсир кўрсатади. Маънавий-эътиқодий, илмий-фалсафий омилларнинг мустақиллиги анча нисбий бўлиб, умумтамаддуний ва ижтимоий-сиёсий омилларга боғлиқ. Кўпинча бу мустақиллик ижтимоий онг даражасида эмас, балки индивидуал онг даражасида намоён бўлади.

Умумижтимоий омиллар – бу жамиятнинг умумтараккий, тамаддуний даражасидан келиб чиқадиган омиллардир. Масалан, бундан ҳатто чорак аср илгари яшаган киши билан хозирги ахборотлар технологияси, глобаллашув асрида яшаётган қишисининг қарашлари, табиат ва жамият ҳодисаларини, инсон қадркимматини баҳолаши ўртасида сезиларли тафовут мавжуд. Тўғри, баъзи бир умуминсоний қадриятларни, талабларни тушунишда муайян фарқ бўлса-да, баҳолаш тамойиллари ва мезонлари асрлар давомида мо-

ҳиятан ўзгармаслиги мумкин. Лекин турли даврларда инсоннинг тафаккур тарзи, тафаккур ва эркинликнинг конкрет илмий-гносеологик, аксиологик таомойиллари ва мезонлари сезиларли ўзгаради. Ушбу маънода, бир томондан, тафаккур ўзининг барқарорлигини ва умуминсоний характерини, яъни давр ва ижтимоий тузумдан нисбатан мустақиллигини намоён қилса, иккинчи томондан – у ўзининг конкрет тарихийлигини, ижтимоий ва шаклий детерминлашганини ошкор қиласи. Ижтимоий-сиёсий омиллар таъсири умумижтимоий омилларни тўлдиради ва тафаккурни бевосита давлат тузуми талаблари, сиёсий эркинлик, хуқуқ, ахлоқ ва бошқа ҳаётий масалалар билан боғлади.

Тафаккурнинг ижтимоий тақозо этилиши (детерминлашгани) шу икки омилга: биринчидан, жамиятнинг умумий ривожланганлик даражасига, санъат, илм-фан, ишлаб чиқариш технологияси хусусиятларига, яъни тарихий-тамаддуний тараққиёт босқичига, иккинчидан, давлат тузумига, унинг эркин, демократик бошқарув тамойилларга, хуқуқий меъёрлари илғорлиги ва амалда таъминланишига ёки унда нодемократик, волюнтаристик тамойиллар, ногуманистик мазмундаги қолоқ хуқуқий ва ахлоқий меъёрлар, анъаналар устунлик қилишига боғлиқ. Тоталитар жамиятда кўпчиликнинг, айниқса, авомнинг онги ва тафаккури у ёки бу даражада тоталитар мазмун касб этади. Ва, аксинча, ҳақиқий демократик жамиятда кенг омманинг онги, саёз ва зиддиятли бўлганда ҳам, эркинлика мойиллик кўрсатади, ўзга фикрларга нисбатан ўта бетоқат бўлмайди.

Омманинг назарий тафаккури теран бўлмаса-да, доимо тузум хусусиятларини акс эттиради. Оддий омма ҳар қандай барқарор тузумнинг хукмрон мафкурасига

нисбатан содиқлик кўрсатади. Шу боис тузумга нисбатан оммавий норозиликлар тарихда жуда кам учрайди. Кўпинча ижтимоий идеология (тафаккур) даражасида эмас, балки ижтимоий психология (кайфият, хисхаяжон) даражасида юзага чиқади, амалиётда, вазиятга қараб, стихияли ғалаёнлар, қўзғолонлар, инклибий харакатни қўллаб-кувватлашга айланиб кетиши мумкин. Ушбу ҳолатлар тафаккур эркинлигини эмас, аксинча, қарамлигини кўрсатади.

Демократия яхши ривожланган мамлакатларда ҳам омма тафаккури жамиятда мавжуд меъёрларга, ижтимоий қадриятларга содиқлик кўрсатади. Унда ҳам очиқласига муҳолифлик кенг тарқалмайди (муҳолифлик кенг омма учун эмас, балки сиёсий партияларга уюшган гуруҳлар ёки баъзи масалаларда, айтайлик, табиатни муҳофаза қилиш каби масалаларда, айрим жамоат ташкилотлари ва харакатларига хос бўлади). Аммо ижтимоий онгнинг, тафаккурнинг мавжуд қадриятларни химоя қилишдаги фаоллиги нодемократик мамлакатлардагига нисбатан кучли бўлади. Бу борада у ҳатто ҳукуматга, давлат ҳокимиятига ҳам қарши чиқиши мумкин (аммо тузумга эмас). Бундай фаоллик демократик жамиятда инсон ҳуқуqlари ва эркинлигининг тафаккур эркинлигига намоён бўлишидир.

Турли тузумларда, агар улар тарихий бир даврга мансуб бўлсалар, омма тафаккури, воқеликни формал объектив-назарий акс эттиришига кўра, ўзаро бир-биридан фарқ қилмаслиги, ҳатто тоталитар тузумда бироз устун бўлиши ҳам мумкин. Масалан, собиқ СССР, ІДР, Чехословакия каби давлатларда аҳолининг умумий саводхонлиги, ўрта-маҳсус ва олий маълумотга эга нисбий улуши, умумий илмий-маданий савияси юксак ривожланган демократик ғарб мамлакатлари аҳолисиникига нисбатан сезиларли даражада устун эди.

Аммо тафаккури эркин эмаслиги, тоталитарлиги бу устунликни йўқقا чиқариб юборар, жамиятга, ҳатто ўз манфаатига нисбатан нотўғри, иррационал, кўпинча ногуманистик муносабатни шакллантирас эди. Тоталитар мамлакат фуқаролари кўп билимли бўлганда ҳам (баъзи социалистик мамлакатлардаги каби) инсон эркинлиги, иқтисодий, сиёсий ва умуман ижтимоий муносабатларда тор фикрлигича қолаверадилар. Агар тоталитар мамлакатда ҳалқ таълими, илм-фан яхши ривожланмаган, фуқароларининг саводхонлик даражаси паст бўлса, унда ижтимоий тафаккурда доктризам унсурлари кўпайиб, мафкуравий мутаассиблика мойиллик кучайиб кетади. Бундай мамлакатда ўзгача фикрлайдиган фуқароларга нисбатан ҳалқ номидан очиқласига репрессив сиёсат олиб бориши мумкин бўлади. Собиқ СССРда XX асрнинг 20–50-йиллар бошида шундай сиёсат олиб борилган эди.

Ҳалқаро алоқаларда бундай мамлакатлар, бир томондан, жаҳон ҳамжамиятидан нисбатан мафкуравий ва маданий маҳдудлашишга интилса, иккинчи томондан – имкон топса, тажовузкорликка, ўз таъсир доирасини кенгайтиришга, мафкурасини жаҳон миқёсида ёйишга интилади. Бунинг учун у ўз жонини фидо қилишга тайёр ғоявий мутаассибларни тарбиялайди ва омма орасидан излаб топади, уларни моддий, маънавий-психологик жиҳатдан қўллаб-қувватлайди.

Маънавий-маърифий омилларнинг умумижтимоий ва ижтимоий-сиёсий омилларга боғликлиги жамиятда ҳалқ таълими, олий мактаб ва илм-фан қандай ривожлангани мисолида аниқ кўринади. Масалан, феодал жамиятда, индустрисал жамиятда (XIX аср – XX аср биринчи ярмида ғарб мамлакатлари), ностииндустриал ва замонавий ахборотлар технологияси жамиятида ҳалқ таълими, олий мактаб ва илм-фанни ташкил

этишнинг ўзи, уларнинг жамият томонидан (давлат, хусусий бизнес ва жамоат ташкилотлари) кўллаб-куватланиши ва назорат қилинишида катта фарқ кўзга ташланади. Буни собиқ СССР мисолида қарайдиган бўлсак (истаган давлат мисолида кўриш мумкин), таълимнинг ўта мафкуралашганини, гуманитар фанлар, адабиёт ва санъат коммунистик мафкурага тўлиқ бўйсундирилганини, табиий фанлар ривожланиши ҳам бир томонлама юз берганини, жанговар атеизм ва тор материалистик қарашларга мос келмайдиган (ўша даврда) тадқиқотлар тўхтатиб қўйилганини кўрамиз (генетика, кибернетика). Ҳаттоқи ўзини эркин, демократик деб ҳисоблайдиган ғарб мамлакатларида ҳам ижтимоий-сиёсий омиллар халқ таълимини ёки илмий тадқиқотчиликни тўлиқ ўзига бўйсундирмаса-да, унга кучли таъсир қўрсатади. Лекин бундай мамлакатларда баъзи бир хусусий мактаблар, ўкув муассасалари, йирик корпорацияларга қарашли илмий-тадқиқот муассасалари, эркин матбуот ва илмий нашрлар орқали таълим ва тадқиқот сиёсатининг бевосита ва билвоши назоратини, чекловларини четлаб ўтиш имконини топади.

Тафаккур эркинлигига, айниқса индивидуал тафаккурга хиссий-психологик мойилликларнинг таъсири тўғрисида алоҳида тўхталиш зарур. Ўзига ишончи кам, иккиланишга ортиқча мойил, иродаси заиф, психикаси бўшроқ киши теран билимга, таҳлилий ақлга эга бўлса-да, тафаккур имкониятларини тўла рўёбга чиқара олмайди, чунки узил-кесил хулосага келиб, қарор қабул қилиш масъулиятидан чўчийди. Билими, фикрлаши саёз, иродасиз кишини эса истаган томонга етаклаш, унинг онгини истаган тарзда бошқариш (манипуляция қилиш) имкони туғилади.

Иккиланишни, ҳар нарсага маълум даражада шуб-

ха билан қарашни факат салбий баҳолаш ярамайди. Соғлом шубҳа, хулоса қилишда шошма-шошарликка йўл кўймасдан, яна бир бор далилларни текшириб, акл тарозисидан ўтказиш инсон тафаккурига хос, уни хатолардан саклайдиган омилдир. Ижтимоий онгнинг кўйи даражасида (ижтимоий психологияда) соғлом шубҳа кўпчиликни турли радикал тарғиботчилар, сиёсий авантюристлар ва шу кабиларнинг сафсалаларига учишдан саклайди. Аммо, бошқа бир ҳолларда, омманинг баъзи бир фойдали ташаббусларга, ҳаракатларга нисбатан ҳам инертлигини (лоқайдлигини) белгилайди.

Ўзига нисбатан ишончи ортиқча, манманликка, кибру ҳавога, худбинликка мойил, ўз хатти-ҳаракатларига нисбатан танқидий қарашга одатланмаган кишилар, агар уларнинг умумий маданий савияси унчалик юқори бўлмаса, муайян масалада ҳаётий тажрибаси ва билимлари етишмаса, турли радикал тарғибот-ташвиқотларнинг таъсирига осон тушиб қолади. Улар янгитдан қабул қилган ғояларининг фаол ташувчиларига, амалга оширувчиларига айланади. Айнан шундай кишилар орасидан мутаассиблар кўпроқ чиқади. Худбинликка, кибрга мойил билимли, иродали кишилар тафаккури кўпинча дорматизмга (кам ҳолларда эклектика ва релятивизмга), амалиётда авторитаризмга ён босади. Худбинлик, манманлик, кибрга мубтало кимсаларга, билими даражасидан қатъи назар, уларнинг психологияси ўз хатосини тан олишга халақит беради. Улар ўзлари ишонган ёки янгитдан қабул қилган ғояларининг «барча фойдали имкониятларини» юзага чиқариш учун охиригача уринадилар. Улар учун ўз хатоларини тан олиш гўёки ўзининг заифлигини, мағлубиятини тан олиш билан баробардир. Бундай кишилар, агар бунёдкор ғояларга ихлос қўйса, жамиятга анча

фойда келтиришлари ва, аксинча, бузғунчи ғояларга хизмат қилса, анча ташвиш туғдиришлари, деструктив радикал ҳаракатлар сафини тўлдириб туришлари мумкин.

Инсон тафаккурига нафакат унинг билимлари, ақлиниң таҳлилий ва умумлаштириш салоҳияти, мустақил хулоса қилиш масъулиятидан чўчимаслиги, соғлом скепсис, хиссий-психологик хусусиятлари, шунингдек, эътиқоди муайян диний-фалсафий, эстетик, ахлоқий қадриятлар тизимиға муносабати ҳам таъсир қўрсатади. Масалан, имом Фаззолий ўз даврининг фалсафий ва табиий-илмий билимларидан яхши хабардор бўлган. Унинг тафаккури инсоният тарихида энг ноёб ва кучли салоҳиятлардан бирига эга бўлган. Аммо унинг эътиқоди диний догмаларга ҳатто билвосита зид келадиган илмий далилларни, хулосаларни инкор қилишга унданган. Шундай мисолни келтириш мумкин: Фаззолий ҳаётда ҳам, илм-фанда, фалсафада ҳам тан олинган кўплаб назарий ва амалий далиллар билан исботланган сабаб-оқибат қонуниятини инкор қилади. Унинг фикрича, сабаб-оқибат қонуниятини тўлиқ тан олиш, яъни ҳар бир ҳодисанинг сабаби борлигини, бу сабаб бошқа бир ҳодисанинг (сабабнинг) ўз навбатида оқибати сифатида қаралиши жоизлиги тан олинса ва бу занжир чексиз давом эттирилса, ҳаёт жараёнида Оллох иродасига ҳеч қандай ўрин қолмайди. У факат бирламчи яратувчи даражасида қолиб кетади. Фаззолий ушбу қонуниятни асослайдиган фанларни, биринчи галда фалсафа илмини инкор қилган. Шундай буюк мутафаккир ушбу масалада бир томонлама хулоса чиқарган.

Ҳатто баъзи бир атоқли диний мутафаккирлар ўзларининг салафлари олға сурған айрим ғояларни ҳеч қандай илмий ёки мантиқий далилларсиз ҳакиқат деб

қабул қилғанлар, салафлари тафаккурининг ғайришуурый (илохий) ҳақиқатни кашф эта олишларига, яъни ақл кучи билан эмас, балки қалб кўзи билан ҳақиқатни кўра олишларига ишонгандар. Биз бундай мисолларни нафақат тасаввуф шайхлари ижодида, сал бошқачароқ шаклда хатто қалом илми мутафаккирлари қарашларида ҳам учратамиз. Масалан, Мотуридийнинг ақл билан бир қаторда наклга ҳам таяниш зарурлиги тўғрисидаги тамойилини эсланг.

Тафаккур табиати ва моҳияти шунчалик мураккабки, унда рационализм иррационализм билан, рационал эвристик хulosалар, умумлаштиришлар трансцендент ва интуитив кашфиёт ва топқирлик билан, ҳодисаларни метафизик, статитик ўрганиш динамикада ўрганиб, диалектик таҳлил қилишлар билан чамбарчас боғланиб кетган. Тафаккурнинг табиати ва моҳиятини очиш учун масалага аввало диалектик ёндашиш зарур. Диалектик ёндашув ўрганилаётган ҳодисани бир нуқтаи назардан эмас, балки турлича нуқтаи назарлардан, шу жумладан ўзаро зид келадиган, бирбирини инкор қиладиган алоқалардан туриб ҳар томонлама текширади, таҳлил қиласи, унга яхлит тизим сифатида қарайди (яъни турли таркибий қисмлардан иборат бус-бутун ҳодиса сифатида ундаги ички алоқаларни, қарама-қаршиликларни, зиддиятларни аниқлайди). Лекин диалектик ёндашув баъзи бир ҳолларда қарама-қаршиликлар ўртасидаги конфликтни ҳал қилиш жараёни билан эмас, балки инкор ва инкорни инкор этиш жараёнида янги сифат туғилиши билан, яъни оқибат натижа билан кўпроқ қизиқади. Бу эса амалиётда ҳар доим ҳам маъқул эмас. Чунки янги сифат туғилишида стихияли ибтидо кучлилик қилса, жамият ва инсон учун катта нокулайликларни келтириб чиқариши мумкин. Ёки большевикларга ўхшаб,

янги сифат (янги жамият) тезрок қарор топишига «ёрдамлашиш» учун унга қаршилик қиладиган ҳамма нарсани «супуриб ташлашга», миллионлаб одамларни қурбон қилишга, тараққиётдаги ворисийликни бузишга турткى бўлиши мумкин. Бу аслида амалиётда диалектикани изчил ўзлаштира олмаслик, ўтмишни метафизик инкор қилишдан устун бўла билмасликдир.

Тафаккур ва онгда ҳам бундай ҳоллар кузатилади. Эътиқод қўйилган аввалги событ ғоялар, қарашлар, қадриятлар тизими емирилиши (динамик стереотипнинг синиши) айрим кишиларни депрессияга мубтало қилиши, айримларни аввалги хулқ-авторига нисбатан тескари хулқ-авторни танлашга ундаши мумкин. Собиқ коммунистлар ва атеистлар ўртасида бугун фаол диндорларнинг кўпайиб кетганлиги динамик стереотипнинг синиши туфайли тескари позицияга ўтиб кетишга мисолдир.

Шу сабабдан тафаккур масаласига, ақлий тарбияга нафакат диалектик, шунингдек синергетик ёндашувлар ҳам зарур. Бундай ҳолда конфликтнинг объектив оқибатидан ташқари, уни ҳал қилиш, енгиб ўтиш жараёнига эътибор кучаяди. Синергетик ёндашув диалектик ёндашувни тўлдиради ва тафаккурнинг бунёдкорлик салоҳиятини оширади.

Шундай қилиб, тафаккур эркинлиги масаласи ҳар томонлама: қиёсий ва тизимли, мантикий ва тарихий, социологик ва культурологик, политологик ва аксиологик, рационалистик ва трансцендентлик, диалектик ва синергетик ёндашувларни тақозо этади.

Масалага бевосита ўтишдан аввал айрим қўшимча фикрларни қайд этмоқчимиз. Онг каби тафаккурнинг ҳам икки даражасини ажратиш мақсадга мувофик: амалий ва назарий тафаккурни.

Амалий тафаккур инсоннинг меҳнат, ишлаб чиқариш фаолияти, оилавий ва ижтимоий алоқалари билан ёки кенг маънода турмуш тарзи билан боғлиқ. У мудом ва асосан ақлирасоликка, ҳаётий эҳтиёжларни, объектив талабларни оқилона ва тежамли қондиришда вужудга келадиган турмуш муаммоларини имкон қадар тӯғри ечишга қаратилган. Унга ҳам, назарий онг каби, экспликация (энг умумий гояларни, тамоилиларни хусусийлари ва иккинчи даражалиларидан ажратиб олиш), умумлаштириш, системалаштириш хос. Лекин унда назарий тафаккурдан фарқли ўлароқ абстрактлаштириш ва таҳлил обьекти ҳақидаги хуласаларни қатъий назарий тушунчалар тизимиға айлантириш кучли намоён бўлмайди. У кўпроқ конкрет-мантикий, амалий-рационал характерга эга. Масалан, ахлоқ-одобнинг амалий меъёрлари, турмуш қоидалари, урф-одатлар, истеъмол, савдо-сотик, майший ва бошқа амалий муносабатларни тартибга солувчи қоидалар инсоннинг минг йиллар давомида тўплаган тажрибасининг амалий тафаккур томонидан экспликация қилиш, рационаллаштириш (мантикий – тушунчавий шаклда ифодалаш) ва тизимлаштириш жараёнида шаклланган ва қабул қилинган.

Турли меъёрларнинг нафақат шаклланиши, шунингдек, омма томонидан қабул қилиниши ва уларга аксариятнинг ихтиёрий итоат этиши ҳам амалий тафаккур маҳсулидир. Амалий тафаккур ҳар доим ҳам турмушнинг барча муаммоларининг энг мақбул ечимини топавермаган. Баъзан адашган, хато қилган. Аммо инсон ҳаётда қоқиниб, манглайнини ғурра қилиб, боши берк кўчага кириб қолса-да, ақлинини ишлатиб, янги чоралар, янги йўллар кидирган.

Яшаш учун кураш, меҳнат қуролларини такомиллаштириб, тўқроқ яшашга, оила ва уруғ-жамоада ўзага

ро муносабатларни яхшилашга, янги авлодга тажрибасини ўргатишга интилиш – кенг маънодаги ижтимоий амалиёт инсон аклини чархлаган, тушунчаларини бойитган, тафаккурини ривожлантирган. У нарса ва ходисаларнинг, мураккаб жараёнларнинг ички моҳиятини англашга ҳаракат қила бошлаган. Амалий онгдан назарий онг ўсиб чиққан. Назарий онг коинот, табиат, жамият, инсоннинг ўзи, унинг ички олами, онги тўғрисидаги, яъни зоҳирий ва ботиний олам тўғрисидаги билимларни, тасавурларни, қарашларни тахлил этиб, умумлаштиради ва уларни ўзаро мувофиқлаштиради. Үнга яққол намоён бўладиган танқидийлик, соғлом скепсис (шубха), экспликация, рационаллаштириш ва системалаштириш хос.

Албатта, назарий тафаккур бирданига ривожланган, етук ҳолда шаклланиб қолмайди. У инсоннинг аниқ мақсадларга йўналтирилган ижодий фаолияти билан боғлиқ. Тадқиқот, ижод эса ҳамма вақт жамият тараққиёт даражаси такозо этган конкрет-тариҳий вазифаларга, имкониятларга, тўпланган тажрибага бевосита ёки билвосита бориб тақалади. Шу сабабдан назарий тафаккур ҳам, қанчалик абстрактлашган бўлмасин, конкрет-тариҳий ҳодисадир.

Яна бир фикрни таъкидлаб ўтишни зарур деб биламиз. Тафаккур, актуал намоён бўлишига кўра, факт ижтимоий ҳодиса эмас, у шунингдек алоҳида шахс тафаккури сифатида ҳам, яъни индивидуал ҳодиса сифатида ҳам мавжуд.

Алоҳида шахс тафаккури ижтимоий тафаккурнинг умумий ва тариҳий хусусиятларини, функционал ва ривожланиш қонуниятларини, асосий тамоийилларини, тушунчаларини акс эттираса-да, мухторий ҳодисадир. Айнан теран, ижодий фикрловчи атоқли шахслар тафаккури турли янгиликларни кашф этади, ил-

Фор тажрибани умумлаштиради, янги меҳнат қуроллари, ижтимоий ахлоқ меъёрлари ва ш.к. янги қадриятлар пайдо бўлишига ва аста-секин жамият миқёсида тарқалишига хизмат қилади.

2. Тафаккурниңг тарихий шакллари

Тафаккурниңг илк тарихий шакли асотирий тафаккурдир. Ибтидоий жамият кишиси оламни билишда, турли ҳодисалар, жараёнлар ўртасидаги ҳақиқий ёки хаёлий боғлиқликни, уларниңг бир-бирига ва ердаги ҳаётга, одамлар тақдирига таъсирларини аниқлашда ва ифодалашда асотирлардан (мифологиядан) фойдаланган.

Асотир оламни кенг қамровли, умумлашган, системали ва айни пайтда конкрет-образли идрок қилишнинг ибтидоий универсал, синкретик шаклидир. Асотирлар тизимини оламнинг ибтидоий аждодларимиз томонидан яратилган илк модели дейиш мумкин.

Асотирлар оламни билишнинг ва тўпланган билимларни акс эттиришнинг мустақил илмий ва бадиий шакллари пайдо бўлмаган, инсоннинг ахлоқий, эстетик, диний, илмий ва бошқа билимлари жуда кам, жўн бўлгани учун уларнинг ҳар қайси йўналиши алоҳида тизимларга бирлашмаган даврда вужудга келган. Асотирлар ибтидоий инсон онгининг, тафаккурниңг негизини, услубини ва ривожланиш воситасини ташкил этган. Оламни асотирлар орқали идрок этиб, акс эттириш фанда ибтидоий синкретизм, тафаккур услуби эса синкретик тафаккур, асотирий тафаккур дейилади.

Асотирий тафаккур хусусиятлари:

1. У оламни яхлит тарзда, бир бутунликда идрок этади. Жамият ва инсонни табиатдан, коинотдан аж-

ратмайди, балки уларнинг узвий бир унсури, бўлаги деб билади. Шу сабабдан унинг ўзига ҳам олам инъикоси сифатида ҳам, инсон хулқ-атвори, фаолиятининг пойдевори ва ҳаракатлантирувчи кучи сифатида ҳам ички бус-бутунлик, муштараклик, яъни синкетизм хос.

2. Барча предметларни, ҳодисаларни ўз рухига эга мавжудот деб ҳисоблади. Яъни табиатни «жонлантиради». Бу ҳодиса анимизм дейилади. Воқеликни бундай идрок этиш асотирий тафаккурнинг ҳаётга магиявий (магия – тилсим, сеҳр-жоду) муносабатини тақозо этади ва шакллантиради. Нарса ва ҳодисалар, предметлар ўртасидаги, шу жумладан, инсон ва табиат, инсон ва жамият, инсон ва инсон ўртасидаги алоқалар негизида турли тилсимлар, ғайритабиий кучлар, таъсирлар, конуниятлар ётади, деб ҳисобланади. Ҳаётга тилсимий (магиявий) муносабат маълум предметларни фетишга айлантириб, уларга сифинишга, у ёки бу жониворни (ёки ўсимликни) тотем ҳайвон (уругнинг асосчиси, манбаи), деб эълон қилишга ва унга сифинишга олиб келади. Тилсимий муносабат табу (тақиқ)га таянади. Магияда табу сакрал (муқаддас) аҳамият касб этади ва турмуш меъёрига, коидасига айланади. Ибтидоий одамнинг табиат ва ҳаёт тилсимларидан, сирларидан қўркуви табуда намоён бўлади.

3. Табиий ва ғайритабиий, реал ва фантастик (ўйлаб топилган) ҳодисаларни муштараклика, ўзаро алоқадорликда, боғлиқликда кўради. Асотир ибтидоий одам учун – ҳақиқат. У авторитар мазмунга эга.

4. У оламни образли, конкрет акс эттиради. Анимизм асотирий тафаккурнинг «онтологик» тамойили бўлса, конкрет образлилик эса унинг асосий инъикос (акс эттириш ва ифодалаш) воситасидир.

Шундай қилиб, асотирий тафаккурда олам реал ва фантастик, нореал унсурларнинг мураккаб тилсимий

алоқалар билан боғланган муштарак тизими сифатида ўзига хос тарзда конкрет-образли акс этади. Асотирий тафаккур ўзгармас, котиб қолган ҳодиса эмас. У ибтидоий инсон билан бирга ўсган, ривожланган. Янги тош асрига келиб шаклан ва мазмунан анча мураккаблашган. Фетишизмдан анимизмга, ундан политеизмга ўтиш асотирий тафаккурнинг ўзига хос тарихий босқичларини ифодалайди. Агар мазкур фаразга таянилса, унда асотирий тафаккур ўзининг энг ривожланган босқичини ибтидоий жамият емирилиши, аклий меҳнатнинг жисмоний меҳнатдан ажralиб чиқиши, эътиқодда политеистик қарашлар қарор топиши даврида бошдан кечирган. Айнан худди шу даврда астасекин асотирий тафаккурдан янгича тафаккурга ўтиш бошланган.

Эътироф этиш лозимки, фетишизм, анимизм, политеизм ўртасида аниқ чегара йўқ, хеч қачон бўлмаган. Политеизм даврида анимизм ўз аҳамиятини деярли йўқотмаган, фетишизм эса анча сақланиб қолган, айниқса майший даражада (хатто ҳозир ҳам учрайди: масалан, кўзмунчоқ ва ҳ.к. иримлар сифатида).

Асотирий тафаккур жамоавий барқарор тафаккур ифодасидир, у жамият аъзолари томонидан аксиома каби қабул килинади. Унга танқидийлик, ички зиддиятлар, иккиланишлар, инкор этишлар яққол хос эмас. Асотир бир неча вариантли бўлиши мумкин. Аммо унда ички зиддият, скептицизм, танқидийлик яққол кўзга ташланмайди, чунки унда жамоавий синкетик тафаккурнинг тартибга солиш (бошқариш), билиш ва баҳолашда ҳукмрон меъёрлар обрўйи мужассамланган. Ижодкорлик унсурлари эса асотирларнинг баъзи бир қабилавий хусусиятлар ва заруратларни акс эттирувчи маҳаллий варианatlарида намоён бўлади. Кўп вариантлилик асотирий тафаккурни давр талаблари-

га, ўзгарувчан, ривожланаётган хаёт заруратларига ҳам мослаштириб борган.

Уруг-қабилалар бирлашиб, йириклашиб бориши жараёнида асотирларнинг маҳаллий варианatlари ҳам камайиб, умумий вариант кучайиб, бирлашган қабилалар учун ягона мафкуравий асосга айланган. Аксинча, йирик қабилаларнинг бўлиниб, бир-биридан миграция жараёнида узоқлашиб, узилиб кетиши умумий асотирларнинг янги варианtlарини вужудга келтирган. Янги варианtlарда айрим образларни баҳолаш ва талқин қилиш тубдан ўзгарган. Қабилалар мутлако ўзаро узилиб, алоҳида тарихий-этник, ижтимоий-маданий бирлик сифатида ривожлана бошласа, асотирларнинг мазмуни ҳам анча ўзгарган. Масалан, Авестода девлар – салбий образлар, ёвузлик тимсоллариdir. Ахуралар эса – худолар, маъбудлардир. Ҳиндларда эса дев(а)лар – худолар, асуралар эса – демонлардир (иблислар). Фараз қилиш мумкинки, ҳинд-арий қабилалари бўлиниб кетмасдан аввал, бу образлар қарама-қарши талқин қилинмаган, қабилавий маъбудлар ҳисобланган. Бир-биридан ажралиб кетган ҳинд ва арий қабилалари (балки уларнинг ажралиб кетиши узоқ давом этган ички низолар ва тўқнашувлариз кечмагандир) собиқ биродарларининг худоларини ёвуз кучларга тенглаштириб, баҳоларини қарама-қарши томонга ўзгартиргандир. Авесто ва Ведалардаги асотирлар тизими мазмунан ва шаклан бири-биридан жуда фарқ қиласди. Айтиш мумкинки, уларни аслида келиб чиқиш илдизлари бир, аммо кейинчалик алоҳида этносларга айланган мустақил ҳалқлар яратган. Ҳинд ва арий ҳалқлари маънавияти ва асотирларининг келиб чиқиш илдизи бир бўлганлиги илохий кучларнинг (ижобий ёки салбий баҳолашларини ҳисобга олмаганда) умумий атамалари ўхшашлигига сақланиб қолган.

Аслида асотир оламни билиш жараёнида инсон тафаккури ва воқелик ўртасида вужудга келган зиддиятларнинг ўзига хос тарзда ечилиши маҳсулидир. У инсоннинг олам манзараси, табиат ва ҳаёт, улардаги сабабий боғланишлар, алоқалар тўғрисидаги ўз тасаввурида етишмаган унсурларни, ҳалқаларни, инсон билмаган объектив қонунларни фантастик тарзда ўйлаб топилган образлар ёрдамида тўлдириш ва тушунтириш оқибатида вужудга келади. Худди шундай ибтидоий инсон ўзини, ўз уруғ-қабиласи ва бошқа этносларнинг келиб чиқиши, ҳаёт кечириши, ўзаро алоқалари, тарихий ўтмиши ва келажак тақдирини, табиатда рўй берган йирик ўзгаришлар, катаклизмлар ёки уруғ-қабилалар турмушида содир бўлган ўта муҳим, улар тақдирини белгилаган воқеаларни асотир ёрдамида англашга, тушунтиришга ёки олдиндан башорат қилишга интилган.

Асотирий тафаккур инсон индивидуализмини, алоҳида инсон манфаатларини мустақил ижтимоий қадрият сифатида тан олмайди. У шунингдек, табиат ва жамиятдаги тасодифларни инкор этади. Фатализм (қисмат, инсон тақдир, воқеа ва ҳодисалар азалдан белгилаб қўйилгани) асотирий тафаккурнинг муҳим белгиларидан биридир.

Алоҳида ибтидоий одам яшаш учун курашда муваффакиятсизликка маҳкум эди. У факат жамоа бўлиб хавф-хатарларни бартараф этиши, ҳаёти учун керакли нарсаларни қўлга киритиши, сақлаб қолиши мумкин эди. Унинг тафаккури ўша давр заруратини ўзида акс эттирган. Лекин асотирий тафаккур доирасида шахс ўзлигини, ўз манфаатларини мутлақо англамаган, деган хулоса келиб чиқмаслиги керак. Ўзликни англаш ақлли ва бунёдкор мавжудот сифатида инсон учун доимо у ёки бу даражада хос бўлган. Аммо инди-

видуализм тўлиқ ёки қисман чекланган, чунки уруғжамоанинг яшаб қолишини таъминлайдиган зарурат билан бевосита боғланмаган. Баъзи бир индивидуал фазилатлар: жасурлик, топқирлик, овда ва жангдаги моҳирлик юқори баҳоланган. Айнан шундай кишилардан оқсоқоллар, бошликлар сайланган. Лекин шахсий манфаатга интилиш шаклидаги индивидуализм тан олинмаган. Боз устига индивидуал «айб» учун жамоа жавоб берган, ўзига хос «жамоавий жавобгарлик» та-мойили қарор топган ва ўрта асрларгача баъзи бир масалаларда сақланиб қолган.

Аслида жамоавий жавобгарлик илдизлари жуда қадим замонларга, тотемистик қарашларга бориб та-қалади. Маълумки, ҳар бир уруғнинг асотирий асосчиси – уруғбошиси ҳисобланган муқаддас ҳайвони – тотеми бўлган. Тотем ҳайвонга сифинилган. Унга зарар етказиш, ов қилиш, ҳатто унинг номини тилга олиш гуноҳ саналган. Лекин ибтидоий уруғ бир йилда бир марта тотем ҳайвонни қурбонликка келтирган, унинг гўштини уруғнинг барча аъзолари биргаликда истеъмол қилишган. Бу уларга муқаддас тотем томонидан рухий ва жисмоний куч-кудрат, овда, хаётда омад ва бошқа уруғлар билан курашда зафар ато эта-ди деб ишонилган. Тотем ҳайвонни қурбонликка келтиргани учун уруғ аъзолари ҳаммаси бирдай жамоавий жавобгарликни бўйнига олган. Қурбонликнинг муқаддас куч-кудратидан ҳам бирдай баҳраманд бўлган.

«Жамоавий жавобгарлик» меъёри негизида ўтмишда билиб ёки билмасдан бирор уруғ вакили бошқа уруғ вакилини ўлдириб қўйса ёки оғир жароҳат етказса, ўша уруғдан қасос олиш одати вужудга келган: бундай пайтда бевосита айборни жазолаш муҳим ҳисобланмаган, «айбдор» оиланинг, уруғнинг ҳар қандай вакилини жазолаш мумкин ҳисобланган. Оғир-

роқ айб учун ҳатто бутун уруғ жазога тортилган. Асотирий тафаккур маҳсули бўлган бу меъёр анча трансформациялашган шаклда анъанавий тафаккурда ҳам сақланиб қолган. Ўрта асрларда уруш пайтлари баъзи бир шаҳарлар ахолисининг тўлиқ қириб ташланиши (қатли ом) ўша меъёренинг бошқа шароитда намоён бўлишидир.

Анъанавий тафаккурда бу меъёренинг иллатлари тўлиқ бартараф этилмайди. У қайсиdir кўринишда ахён-ахёнда бўй кўрсатиб колади. Масалан, совет даврида катор ҳалкларнинг ўз юритидан бадарға (депортация) қилингани ёки бирор ташкилотда кимдир сиёсий ёки ахлоқий ножӯя иш қилиб қўйса, ташкилотнинг раҳбарлари ҳам партиявий жазо олиши (хайфсан), ҳатто лавозимидан айрилиб қолиши жамоавий жавобгарликнинг янгича шароитда намоён бўлишидан бошқа нарса эмас.

Тараққиёт даражаси ва у туғдирган объективизмурат ибтидоий тузум шароитида ижтимоий эркинлини ҳам, ижтимоий қарамликни ҳам бирдай инкор этган. Оламни харакатлантирувчи кучлар сифатида турли рухлар, худолар иродаси, тақдири азал тан олинган. Инсон тақдирини белгиловчи ва ундан устун турувчи кучлар реал мавжуд, инсон ўз тақдирини ўзгартиришга, ундан қочиб кутулишга ожиз деб ҳисобланган. Олам харакати, ҳар қандай воеа ва ҳодиса олдиндан белгилаб қўйилган. Мисол тарикасида ўзбек томошабинларига яхши таниш бўлган қадимги хинд эпоси бўйича экранлаштирилган «Рамаяна», «Маҳабхарат» фильмларини, Софоклнинг Ўзбек миллий академик театри сахналаштирган «Шоҳ Эдип», «Антигона» фожиаларини келтириш мумкин. Тўғри, улар ибтидоий синкетизм парчалангандан кейинги давр таъсирида анча ўзгарган, аммо тақдири азал ва бошқа баъзи масала-

ларда асотирий тафаккур белгиларини анча сақлаб қолган.

Асотирий тафаккурнинг энг муҳим хусусиятларидан яна бири унинг сиёсий мазмундаги дунёвий ва диний мағкурадан холи эканлигидир. Асотирий тафаккур тор ижтимоий гурухлар, синфлар манфаатларини акс эттиrmайди, зеро бу даврда одамлар ўртасида ижтимоий-синфий табақаланиш юз бермаган эди. Давлат ҳокимияти ҳам йўқ эди. Шу боис ҳокимият учун кураш, ҳокимиятни қўллаб-қувватлаш ёки муҳолифлик ғояларини олга суриш зарурати пайдо бўлмаган эди. Асотирий тафаккур сиёsat, сиёсий онг, давлат ва ҳукуқ пайдо бўлишидан анча аввал шаклланган. Диний онг элементлари ибтидоий инсонга хос бўлса-да, лекин диний таълимот, диний ташкилот ва у билан боғлиқ қатъий ибодат маросимчилиги шаклланмаган. Диний эҳтиёжлар шомончилик ва ш.к.лар орқали қондирилган. Шу боис асотирий тафаккурда яққол диний мазмун қўзга ташланмайди.

Ижтимоий амалиёт ривожланиб, илм-фан, адабиёт ва санъат ижоднинг алоҳида турларига айланиши, давлат ва ҳукуқнинг вужудга келиши, ҳукуқнинг ахлоқдан ажralиб чиқиши, диний эътиқод ва амалиёт ҳам алоҳида тизимга айланиши ибтидоий синкретизми парчалаб юборди. Натижада асотирий тафаккур оламни идрок этишнинг асосий шакли сифатидаги мавқеидан ажralди. Аммо тўлиқ, беиз йўқолмади. Унинг қолдиқлари, аввало асотирларнинг ўzlари адабиёт ва санъатда, диний тафаккурда бутун антик ва ўрта асрлар давомида анча-мунча сезиларли бўлди, кўп ҳолларда «қурилиш материали» вазифасини ўтади.

Энди асотирлар оламни билишнинг асосий воситаси, олам тўғрисида бирдан-бир ҳақиқат деб қабул қилинmas, кўпроқ мажозий мазмунда талқин қилинار,

ундан ибратли ахлоқий хулосалар чиқарилар эди, ҳатто бугунги кунда ҳам диний тасаввурларда асотирлар катта ўрин тутади. Муқаддас китоблар – Таврот, Инжил, Қуръон ва бошқаларниг негизини, пойдеворини диний асотирлар ташкил этади. Уларсиз яхудий, христиан ва ислом дини таълимотлари, мураккаб фалсафаси вужудга келмас эди. Биз юкорида «Рамаяна», «Махабҳарат», «Шоҳ Эдип», «Антигона» асарлари кейинги давр таъсирида анча ўзгарган деган эдик. Ушбу фикрни давом эттириб, таъкидламоқчимизки, энг аввало уларда кўшимча сиёсий мазмун, ҳокимиятга муносабат ва тахтга нисбатан ҳуқуқ масалалари акс этган. Шу жиҳатдан бу асарлар фақатгина асотирий тафаккур маҳсули эмас. Уларда ахлоқий мазмун билан бир қаторда, яққол сиёсий, ҳуқуқий ва диний мазмун кўзга ташланади. Ўша даврда сиёсий ва диний манфаатлар кўпинча ўзаро мос келган. Илк пайдо бўлган давлатлар ҳукмдорлари (дастлаб шаҳар-давлат, кейинчалик нисбатан кенгроқ ҳудуд, воҳа, водий миқёсида ва х.к.) ҳокимиятнинг илоҳий эканлиги, худолар томонидан берилишини, шу боис ҳокимиятга қарши чиқиш худолар иродасига қарши чиқиш билан тенг эканлигини халқ онгига сингдиришга уринган. Шу сабабли ўз мавқеини мустаҳкамлаш учун ҳокимият диндан фойдаланган. Ўз навбатида диний ташкилот ҳам давлат томонидан қўллаб-куватланишга, ибодатхоналар, маъбудлар қуришга, шаккоклиқ қиласиганларни давлат ёрдамида жазолашга муҳтож бўлган.

Давлат бошқа ҳудудларни босиб олишдан, диний ташкилот эса ўз таълимотини янги ҳудуд ахолиси ўртасида тарқатишдан бирдай манфаатдор бўлганлар. Энди асотирлар дин ёрдамида сиёсийлаштирилган ва мафкуралаштирилган қулдорлик жамиятида асотирлар сақланиб қолган бўлса-да, асотирий тафаккур аста-

секин дастлаб юқори табақалар ва илм-фан ахли орасида, кейинроқ бошқа табақалар орасида ҳам барҳам топди. Илмий, фалсафий, диний, эстетик, ахлоқий, хуқуқий қарашлар ижтимоий онгнинг алоҳида шакллари сифатида юзага чиқиши тегишли назарий қарашларни ва умуман назарий тафаккурни вужудга келтирди.

Назарий, илмий тафаккур, моҳиятига кўра, асотирий тафаккурни инкор қилади. Маълумки, илм-фан аниқ далилларга ёки мантиқий исботларга таянади. У далил кам бўлса ҳам тадқиқот ибтидосида ривоятга эмас, балки илмий фараз (гипотеза) га таянади. Ривоятдан илмий фараз мантиқий асослангани, табиат ва жамият қонун-қоидаларига зид келмаслиги, ҳақиқатга айланиши эҳтимоли юқорилиги, конкрет илмий муаммо билан боғлиқлиги билан кескин фарқ қилади.

Илмий тафаккур ривоятдан фойдаланганида ҳам уни қўшимча, иккинчи даражали сабаб ёки қиёсий образли далил сифатида келтиради. Ушбу маънода тарих фанининг отаси Ҳеродот томонидан форслар ва эллинлар ўртасидаги урушнинг сабабларини гўёки асослайдиган ривоятларнинг келтирилиши характерлидир. Ҳеродот ривоятларни келтирас экан, аниқ исботланган факт, сабаб деб талқин қилмайди, балки авлодлардан авлодларга оғзаки ўтиб келаётган, хар икки томондан, фақат айбларни бир-бирига тўнкаб, сабаб сифатида қабул қилинганини эътироф этади ва аслида урушларга сабаб бўлган воқеалар шундай кечганми ёки йўқми, бу номаълумлигини бир неча бор таъкидлайди. Эътироф этиш лозимки, Ҳеродот ижоди тарих фанининг туғилиши давридир. Ҳали тарихга оид илмий тафаккур яхши ривожланмаган, энди тетапоя бўла бошлаган давр эди. Фукидид ва Ксенофонт ижодида биз

сабабиятга муносабат янада жиддийлашганининг, анча илмийлашганининг гувохи бўламиз.

Илк цивилизациялар даврида кенг омма онги, тафаккури асотирий эди. Буни давлатнинг хукмрон мафкурасига айланган диний таълимотлар ҳисобга олган. Биринчидан, уларнинг ўзи эски асотирий ақидаларнинг қайта ишланган, бойитилган, ўзгартирилган негизида вужудга келган; иккинчидан, юқорида таъкидланганидек, сиёсий ва эътиқодий мажбурийлик вазифасини юклаган. Диний таълимотларда асотирий тафаккур унсурлари мантиқий-назарий тафаккур унсурлари билан эклектик тарзда қоришиб кетган.

Ибтидоий жамиятда халқ оғзаки ижодининг аксарият жанрлари – ривоят, афсона, эртак, масал, қабилалар иттифоқлари вужудга келганда, қаҳрамонлик эпослари шаклланган. Кулдорлик жамиятига, илк цивилизацияларга ўтиш даврида ғоявий-сиёсий ва диний-эътиқодий мазмун касб этган асотирлар давлат ҳокимияти ва диний ташкилотлар томонидан ҳимоя қилинган. Ҳукмрон мафкурага зид қарашлар, мафкуравий анъанага айланган асотирларни ихтиёрий, ўзбошимчалик билан талқин қилиш ман этилган. Бунга жазм қилганлар эса қувғинга учраган ёки қаттиқ жазолangan. Ушбу муносабат билан яна Сукрот қисматини эслаш жоиз.

Антик даврда ёқ йирик империяларнинг вужудга келиши уларнинг диний мафкурасини (давлат мафкурасини) империя таркибига кирувчи турли этнослар орасида ёйилишига олиб келган. Шундай қилиб, дунё миқёсида тарқалувчи диний мафкуралар пайдо бўлиши учун шарт-шароит туғилган. Тўғри, тан олиш лозимки, реал хаёт, жамият тараққиёти жуда мураккаб кечган, у ҳеч қачон бир чизиқли бўлмаган. Турли истиснолар кўп учраган. Жамият тараққиётини жўн,

қотиб қолган ва бир хил андозада талқин қилиш мумкин эмас. Биз бу ерда факат умумий тенденцияни эътироф этмоқдамиз, холос. Аҳмонийлар диний эътиқод масаласида мажбурлаш сиёсатини олиб бормаган бўлса-да, зардуштийлик бутун империя худудида астасекин тарқала бошлаган. Искандар Мақдуний империясида, ундан кейин пайдо бўлган Салавкийлар, Птолемейлар давлатида, Рим империясида юонон политеистик қарашлари тарқалган.

Асотирий тафаккур ҳозирги замон инсони, ижтимоий-сиёсий, илмий ҳаёти учун хос бўлмаса-да, асотирларнинг ўзи юксак қадрият, маънавий мерос дурдоналари ҳисобланади. Асотирлар инсоният яратган маданий мероснинг илк ва эскирмас қатлами, умуминсоний ва миллий бадиий меросда тематика, сюжет ва ифода воситалари борасида улкан манба вазифасини ўтаган ва бундан кейин ҳам ўташи мумкин бўлган омил сифатида юксак қадрланади. Замонавий адабиётда ва санъатда асотирга мурожаат этиш ҳоллари кўплаб учрайди. Масалан, Чингиз Айтматовнинг «Оқ кема», «Асрга татигулик кун», «Қиёмат» асарларида асотирий унсурлардан фойдаланилган. Замонавий ижодда асотир оламни идрок этиш усули сифатида эмас, балки бадиий восита – сюжет унсuri ёки ифода воситаси сифатида қўлланилади. Габриэл Гарсиа Маркес ва бошқа лотин американлик айрим ёзувчилар хақида ҳам шундай дейиш мумкин. Айниқса ўз ёзувига нисбатан кеч эга бўлган, қабила-уругчилик муносабатларидан замонавий ҳаётга баъзи тарихий босқичларни четлаб ўтган халқлар адабиётида, санъатида асотирлардан, асотирий моделлардан фойдаланиш кенг тарқалган. Бунга мисол қилиб Чет Шимол ва Узоқ Шарқ ёзувчилари ижодини келтириш мумкин. Чукчаларнинг атоқли ёзувчиси Юрий Ритхэу, манси Юван Шесталов, ҳаёт-

дан жуда эрта кўз юмган юкагир Семён Курилов, нивх Владимир Санги ва бошқалар асарларида ўз халқларининг оғзаки ижоди, ривоятлари, афсоналари, асотирларидан унумли фойдаланилганинг гувоҳи бўйламиз.

Асотирий тафаккур ибтидоий синкетизм парчаланиши жараёнида ўз ўрнини аста-секин жамият миқёсида анъанавий тафаккур тарзига бўшатиб берди. Лекин анъанавий тафаккур қарор топиб, мустаҳкамланиб олгунга қадар, жамиятнинг иқтисодий, ижтимоий ва маънавий ҳаётида туб ўзгаришлар юз берди: мулкий нотенглик, ижтимоий табақалар, синфлар, рангбаранг ижтимоий институтлар юзага келди. Ижтимоий онг шакллари нисбатан алоҳидалашди. Илм-фан, адабиёт ва санъат, фалсафа, илоҳиёт каби ақлий меҳнатнинг юксак шакллари – ижод турлари вужудга келди. Булар ҳаммаси тафаккур тарзини ҳархолда жамият аъзолари юқори табақалари тафаккур тарзини тубдан ўзгартирди. Тафаккурга ижодкорлик ва эркин изланышлар бахш этди. Жаҳоннинг турли минтақаларида қадимги цивилизация ўчоклари ва мамлакатлари ривожланди.

Қадимги цивилизациялар шаклланиши узок давом этди. Зеро, иқтисодий ривожланиш, олам ҳақида ижобий янги билимларнинг тўпланиши анча қийин ва секин кечди. Аммо қадимги цивилизациялар шаклланиб бўлиб, ўз ривожланиш чўккисига чикқач, турғунликка юз тутиб, аста-секин емирила бошлади. Чунки қадимги цивилизациялар асосида ётган хукмрон мафкура тафаккур изланышларини, эркинлигини чеклай бошлади. Мавжуд меъёрлар, анъаналар дормалаштирилди.

Бундай ҳолатни биз деярли барча минтақаларда кузатамиз. Антик юон тафаккурида турғунлик, анъа-

навийлик вужудга келаётганининг илк кўринишларидан бири – Афинада Сукротнинг қатл қилинишидир. Сукротга қўйилган айб сиёсий айб эмас, балки маънавий маъбудлари ва қадриятларини эъзозлашга эмас, балки янгиларига сифинишга даъват этиш айби эди. Афинада ўша вактлар суд ҳукми эркин фуқароларнинг тўғридан-тўғри ва яширин овоз бериши орқали чиқарилишини ҳисобга олсақ, хатто юқори табақалар тафаккури маълум даражада турғунлик ва анъанавийлик касб этганига ишонч ҳосил қиласиз.

Илк ўрта асрлар ва кейинги даврларда тафаккурда эркинлик ва ижодий юксалиш жамиятда кескин ўзгаришлар, энг аввало, янги динлар пайдо бўлиши билан боғлиқ. Шарқда янги пайдо бўлган ва тезда турли минтақаларга тарқалган ислом дини тафаккурга кудратли ижодий рағбат бахш этди ва буюк цивилизация яратди. Фарбда ўрта асрлар сўнгида протестантизм худди шундай роль ўйнади. Лекин ислом мамлакатларида аста-секин мафкуравий дорматизм тафаккур эркинлигини чеклаб, анъанавий тафаккурни яна тиклади. Феодализм ривожланган сайн ғоявий мутаассиблик кучаяди. Давлат ва диний ташкилот (черков, масжид ва ш.к.) биргаликда ҳукмрон мафкурани қатъий ҳимоя килади ва тафаккур эркинлигига динга зид келмайдиган доирадагина рухсат этади. Ушбу муносабат билан Фаззолийнинг илм-фанга муносабатини эслаш ўринидир. Фаззолий фанларни динга бевосита ва билвосита таъсиридан келиб чиқиб, уч тоифага бўлган. Динга хизмат қилувчи илмлар (яъни шаръий илмлар), динга зид илмлар (улар каторига фалсафани ҳам киритган ва мутаассибларча курашган) ва динга «фойдаси ҳам, зарари ҳам тегмайдиган» илмлар. Сўнгги тоифага у факат математик фанларни киритган. Ҳар қандай дунё-

вий фанларга қарши бўлиб, фақат шаръий илмларга рухсат бериш лозим деган ўша пайтдаги бошқа диний мутаассибларни математик илмларга (арифметика, геометрия, астрономия) қарши чиқмасликка чақирган. XVI асрдан бошлаб ислом мамлакатлари тараққиётда ортда қолиб, ҳатто аввалги ютуқларини ҳам сақлаб қололмади. Фарбда эса вужудга келган капитализм диний мафкуранинг ҳукмронлигини бекор қилди. Бу тафаккур эркинлигига янги уфқлар очди.

Европада капитализм ривожланишининг илк давридан бошлаб давлат мафкураси черков таъсиридан чиқа бошлади. Охир-оқибатда давлат мафкураси дунёвий мафкурага айланди. У давлат ҳокимияти ва буржуазия манфаатини миллий манфаат сифатида талкин қилди, зодагонларнинг, аристократиянинг манфатларини химоя қилувчи эски мафкурага қарши курашди. Бундай вазиятда оқибатда католик черков ҳам ўзини ислоҳ қилишдан ва қарор топаётган янги воқеликка мослашишдан бошқа чора топа олмади. У протестантизм билан узоқ ва муваффақиятсиз курашиб ўзининг баъзи бир даъволаридан воз кечишга, аввал инвизиция судлари (диний дормаларга зид қарашларга, эркин тафаккур услубига, илм-фан, санъатнинг черковдан мустақил ривожланишига қарши қўлланилган католик черкови суди) фаолиятини тўхтатиб қўйишга, кейинроқ уларни тамомила тарқатиб юборишига, дунёқараш ва эътиқод масалаларида анча-мунча либераллашишга мажбур бўлган эди. Айни пайтда капитализм оёкқа туриб, кучая борган сайин ёш давлатлар мафкурасида миллатчилик ва шовинизм кучая борди. У мустамлакачилик сиёсатини ёқлаб, тажовузкор мафкурага айланди. Шарқ ва Фарбни, Шимол ва Жанубни бир бирига қарама-қарши қўядиган ирқий ва синфий нотенгликни «асослайдиган» назариялар пай-

до бўлди. Лекин капиталистик рақобат, илм-фан ва техника ютуқларини ишлаб чиқаришга, ҳарбий соҳага (мустамлакаларни итоатда сақлаш ва янгиларини кўпайтириш, ўзга рақобатчи давлатларга уларни бериб қўймаслик учун) жорий қилиш зарурати, бир томондан, тафаккурни муттасил рационаллаштириди, иккинчи томондан – турғунлик ва догматизм қарор топишига қарши тўсиқлардан бири бўлиб хизмат қилди.

Тафаккурнинг цивилизация тараққиёти билан узвий боғликлиги ҳақида бир оз кенгроқ тўхталиш мақсадга мувофик. Цивилизация юксалиши давомида тафаккур тез бойиб, изланишлар олиб беради. Илм-фандада, адабиёт ва санъатда, фалсафа ва диний илмларда кашфиётлар юз беради, услублар ракобати кўзга ташланади. Цивилизация ўз юксалишининг юкори нуқтасидан ўтгандан кейин, ижоднинг айрим соҳаларида хусусий ютуқлар қўлга киритилса-да, аста-секин ўзини-ўзи такрорлаш, тақлидчилик ва турғунлик аломатлари пайдо бўла бошлайди. Тафаккурда догматизм ва авторитар фикрга мослашиш кучаяди. Маънавий ҳаётда илм-фан ва санъатда янги изланишлар сўниб, мазмунан ва шаклан ранг-баранглик ўрнига бир хиллик, эпигонлик тарқалади. Маънавий ҳаётда, тафаккурда дастлаб турғунлик, сўнгра инқироз юз беради. Бу оқибатда жамиятнинг барча соҳаларини – сиёсий ҳокимият фаолиятини, иқтисодни, ижтимоий алоқаларни, маданиятни қамраб олади. Мавжуд цивилизация ички ва ташқи зарбаларга дош беролмасдан, ўз ўрнини бошқа цивилизацияга бўшатиб беради. Тафаккур янги ижтимоий-сиёсий ва маънавий-маданий негизга кўчади.

Янги негизга кўчган тафаккур маънавий ҳаётда ама-

лий ва назарий жиҳатдан дастлаб аввалги негиздаги тафаккурга нисбатан самарасиз бўлиши мумкин. Лекин бир нарсадан устун бўлади: у янги мулкий ва иқтисодий муносабатларга йўл очадики, бу жамият аъзолари аксариятигининг манфаатларига тўлиқ ёки қисман мос келади. Масалан, исломга асосланган тафаккур Эрон ва Марказий Осиёга кириб келганда, зардустийликка асосланган тафаккур тарзидан илм-фан, адабиёт ва санъатни ривожлантириш бобида актуал жиҳатдан анча заиф эди. Аммо салоҳият жиҳатдан жамиятни ривожлантириш бобида устун эди. Илм-фани ривожлантириш бобида эса салоҳияти (потенциал имкониятлари) кам эмас эди. Илк исломга хос демократизм, эгалитаризм, илмга нисбатан бағрикенглик ва чанқоқлик тезда ўз самарасини берди. Ислом дастлаб эски тузумни нафақат ҳарбий куч ёрдамида, шунингдек иқтисодий ва ижтимоий турмушда яратган нисбатан эркинлиги билан енгди. Кейин эса илм-фандада уни ортда қолдирди. Фақат санъатнинг баъзи биртурлари инқирозга учради.

Илк христианлик мафкурасига асосланган тафаккур тарзи антик даврнинг политеизм негизидаги тафаккур тарзига нисбатан илм-фани, адабиёт ва санъатни, маънавий маданиятни ривожлантириш имкониятлари бўйича дастлаб жуда ноҷор эди. Европаликларнинг ўзлари Уйғониш давригача христиан оламини зулмат ва қора кучлар васвасаси даври деб баҳолаши бежиз эмас. Европада бу даврда на Платон, Аристотель, Пифагор, Эвклид, Птолемей, Архимед, Цельс, Гален (Жолинус) сингари илм-фан даҳоларини, на Ҳомер, Эсхил, Софокл, Еврипид, Аристофан, Вергилий, Овидий, Гораций сингари буюк шоир ва драматургларни, на номлари келтирилмаган буюк рассомлар, хайкалтарошлар, меъморларни кўрамиз.

Лекин илк христианликка асосланган тафаккур худо олдида барча бандалар тенглигини, қуллар ҳам кулдорлар сингари худонинг бандаси эканлигини, икти-содиётда эгалитаризм ва бошка янги тамойилларни олға сурди. Оқибатда қулдорлик тузумига нисбатан бир оз устун бўлган европача феодализмга йўл очди. Жамият тараккиётини зимдан тайёрлай бошлади. Христианлик исломга нисбатан 6 аср илгари вужудга келган бўлса-да, исломдан 9 аср кейин ижтимоий тараққиётга йўл оча олди. Ва у очган янги имкониятлар, тан олиш жоизки, 7–8-асрларда ислом очган имкониятлардан кучлироқ эди. Бу даврга келиб эса (XVI аср) ислом мафкурасига асосланган тафаккур анъанавий тафаккурга айланиб бўлган эди.

Ренессанс (Европа Уйғониш даври) христиан динининг инсонга, жамиятга муносабатини, христиан ахлоқини, эстетик қарашларини қаттиқ танқид остига олди, гуманизм (инсонпарварлик) ғоясини олға сурди, шахс майдаатларини, идивидуализмни маънавий ва ахлоқий жиҳатдан оклади. Антик даврнинг гедонизм ва эвдемонизм тамойилларини янгича шароитга мослаб тиклади. Тафаккур эркинлигига, илм-фан, санъат ва адабиёт ривожланишига, жамият дунёқарashi, ахлоқий ва эстетик меъёрлари ўзгаришига йўл очди. Оқибатда Реформацияга, черков ислохига, протестантизм пайдо бўлишига маънавий замин яратди. Протестантизм ўз навбатида туғилиб келаётган капитализмнинг маънавий-ахлоқий таянчига айланди, унинг қарор топишини тезлаштирди. Ривожланиши мобайнида анъанавий тафаккур бир неча тарихий босқичлардан ўтган. Улар орасида шартли равища қулдорлик даври (анттик) босқичи, феодализм даври босқичи, фашистик ва расистик ҳамда социалистик давр босқичларини ажратиб кўрсатиш мумкин.

Анъанавий тафаккурнинг биринчи босқичида жамият аъзолари онгида асотирий тафаккур қолдиқлари анча кўп сақланиб қолган, айниқса қуий, авом табақалар онгида. Бу даврда анъанавий тафаккур анча сиёсийлашган ва динийлашган бўлса-да, тўлиқ клерикаллашмаган, яъни диний мафкурага тўлиқ бўйсундирилмаган. Чунки оламшумул динлар ҳали ёш бўлган, уларнинг илоҳиёт таълимотлари, маросимчилик удумлари шаклланиши давом этаётган эди. Шу сабабли улар жамият маънавий ҳаётини тўлиқ қамраб ололмаган, динларнинг ичида ҳам турли мазҳаблар, оқимлар, фирқалар, ўзаро фарқ қиласидан мактаблар шаклланиши давом этаётган эди. Ҳали оламшумул динлар жамият маънавий ҳаётида якка хукмрон бўлишга ултурмаган, одамлар тарихий хотирасида миллий ва маҳаллий динлар, эски эътиқодлар тўлиқ унутилмаган, уларнинг жамият ҳаётига таъсири анча-мунча сақланиб қолган эди.

Феодализм даври босқичида анъанавий тафаккурнинг классик шакли вужудга келади. Ушбу босқичда жамият аъзолари онгида асотирий тафаккур таъсири жуда заифлашиб, кўп ҳолларда умуман барҳам топиб кетган (асотирларнинг ўзлари эмас. Улар энди диний асотирлар кўринишида тафаккурнинг универсал модели эмас, балки кўпчилик воситаларидан бирига айланган). Анъанавий тафаккурнинг классик шакли мазмунида диний ақидалар, догматлар, умуман теология (илоҳиёт илми) ва клерикализмнинг таъсири кучли намоён бўлади. Айниқса ўрта табакалар онгида клерикализм дунёвийликка устунлик киласиди. Ижтимоий ҳаёт ҳам, майший турмуш ҳам диний қоидалар, ақидалар ва меъёрлар негизида кечган.

Анъанавий тафаккурнинг тарихан қисқа умр кўрган XX аср диктатуралари билан боғлиқ тоталитар боски-

чи. Бу босқичда турли шаклдаги фашистик (Муссолини, Гитлер, Франко, Салазар ҳокимияти пайтидаги Италия, Германия, Испания, Португалия), расистик (апартеид пайтидаги Жанубий Африка Республикаси, собиқ жанубий Родезия ва ш.к.), социалистик тафаккур шакллари вужудга келган. Улар бир-биридан кескин фарқ қылсалар-да, аммо тоталитар ва репрессив моҳиятига кўра ўзаро яқин бўлган. Улар диний эмас, балки дунёвийлиги, ҳатто атеистик характери (социалистик тафаккур) билан ажралиб турган. Фашистик тафаккур ўта миллатчиликка, шовинизмга, амалиётда баъзи бир ғайриинсоний тамойилларга таянса, социалистик тафаккур, аксинча, кўп ҳолларда инсонпарварлик, байналмилачлилик, халклар дўстлиги, тенглик каби энг жозибадор ғояларни шиор қилиб олган ва амалда ҳаётга жорий қилишга уринган (социализмнинг уларни ҳаётга жорий қилолмагани – бу бошқа масала). Ташқи жиҳатдан бир-бирига қарама-қарши бўлсада, ҳар иккала тузум ҳам инсонни ўzlари режалаштирган жамиятни қуришда оддий бир мурват, «қурилиш материали» деб билган. Давлат манфаати нафақат алоҳида инсон манфаатига, зарур бўлса, бутун жамият манфаатига қарши қўйилган. Ҳар иккала тузум жамиятда казармача тартиб, интизом ўрнатишга, фуқароларни бир хил фикрлайдиган қилиб тарбиялашга интилган. Қаршилик кўрсатганларни аёвсиз қатағон қилган.

Авторитар бошқарув (диктатура) ва авторитар фикр-га тобелик иккала тузумда ҳам дохийпарастликни, шахсга сифинишни келтириб чиқарган. Дохий фикри, тўғри ёки нотўғрилигидан қатъи назар, олий хақиқат деб қабул қилинган, чунки дохийга табиат гениал акл ва ички сезги ато этганлиги боис, у ҳар қандай олимга, фанга нисбатан ҳақиқатни эртароқ, теранроқ пайқайди,

деб хисобланган. Фан, олимлар адашишлари мумкин, зеро улар ўз даври имкониятлари билан чегараланади, дохий эса, албатта, даврдан анча илгарила б кетади деб ишонилган. Бундай тарзда фикрлаш, дохий аклини файриинсоний, файритабиий қудратга эга деб баҳолаш мистицизмнинг нақ ўзгинасиdir.

Ҳар иккала тузум гуманитар илмларни ўта сиёсийлаштирган ва мафкуралаштирган, ижтимоий фикрни қудратли ташвиқот ва ОАВ орқали ўзларига керакли йўналишда шакллантирган ва бошқарган. Табиатшунослик фанлари ривожланиши учун, айниқса техника ва технологиялар билан боғлиқ тадқиқотлар учун шароит яратган. Аммо уларни ҳам, иложи топилса, ўз мафкураларига хизмат қилдиришга уринган. Масалан, фашистлар Германиясида евгеникадан арий ирқининг бошқалардан устунлигини, баъзи бир халқларнинг табиатан туғма ноқобиллигини исботлашда фойдаланмокчи бўлишган. Собиқ СССР да эса бунинг тескариси рўй берган: евгеника умуман фан эмас деб эълон қилинган ва тақиқланган.

Бугунги кунда ривожланаётган мамлакатлардаги тафаккур шакли ниҳоятда мураккаб, зиддиятли ҳодисадир. Гарчи кенг омма онгида эски тафаккур қолдиклари сезиларли даражада сакланиб қолган бўлса-да, уни анъанавий тафаккур дейиш мумкин эмас. Айни пайтда у либерал, демократик эркин тафаккур ҳам эмас. Ривожланаётган мамлакатлар ахолиси тафаккури эклектик деб баҳоланса, тўғрироқ бўлади. Унда феодализмдан қолган анъанавий унсурлар, анъанавий қадриятлар ва баҳолар тизими, постколониализм зиддиятлари ва неоколониализм хавфи туғдирган тушунчалар, баҳолар, қарашлар, ижтимоий мўлжаллар минтақавий ва ички этник можаролар туфайли вужудга келган маҳаллийчилик, миллатчилик, социалистик,

тоталитар, диний-экстремистик ҳамда либерал-демократик тафаккур унсурлари эклектик тарзда қоришиб кетган. Турли мамлакатлар ахолиси, айниқса ўрта табакалари онгига бу унсурлар нисбати турлича. Шунга қараб уларнинг ижтимоий-сиёсий вазияти, турмуш фаровонлиги ва ривожланиш даражаси ўзаро фарқ қиласди. Тўғри, кейинги холатга бу мамлакатларнинг табиий захиралари, қазилма бойликлари ҳам кучли таъсир кўрсатади. Лекин ижтимоий-сиёсий барқарорлик йўқ жойда катта бойликлар ҳам тўқ, фаровон турмушга асос бўла олмайди.

Иқтисодий тафаккурда ва муносабатларда эркинликка, бозор тамоилларига, ишлаб чиқаришда илмий-техника тараққиётини жорий қилишга мўлжал олган мамлакатлар нисбатан тез юксалди. Уларнинг айримлари (Жанубий Корея, Сингапур, Малайзия, Тайвань, Таиланд ва ш.к.) кўп кўрсаткичлари, ахолисиниг турмуш даражаси бўйича ривожланган Фарб мамлакатларига яқинлашиб қолди. Лекин иқтисодий муносабатларни диний қадриятларга мослаштиришга уринаётган, нафақат иқтисодий қарашларни, концепцияларни, умуман тафаккурни диний ёки бошқа дорматик қарашлар, назариялар билан чеклаб қўйган мамлакатларнинг айримлари эса ўз ахолисини очлиқдан саклашда ҳам қийналиб қолмоқдалар (Шимолий Корея, баъзи бир Осиё ва Африка мамлакатлари).

Анъанавий тафаккур – анча мураккаб, ранг-баранг конкрет йўналишлардан иборат ҳодиса. Унда нисбатан алоҳидалашган фалсафий, илмий, диний, ахлоқий, хуқуқий, эстетик қарашлар, назариялар, таълимотлар ажралиб туради. Унда ички зиддиятлар яққол кўзга ташланади. Анъанавий тафаккур оламни идрок этишнинг, олам инъикосининг ички яхлит, универсал модели эмас. Лекин унга тизим сифатида муштараклик,

ўзига хос умумийлик, «универсаллик» бахш этувчи тамойиллар мавжуд. Бу энг аввало хукмрон мафкуранинг дормалари ва фундаментал тушунчалари дир. Ўрта асрларда улар диний мазмундаги, социалистик мамлакатларда дунёвий мазмундаги тушунчалар бўлган. Анъанавий тафаккурниң «универсаллиги» шартлидир.

Бу тамойиллар, бизнинг назаримизда, қуйидагилардан ташкил топган:

1. Анъанавий тафаккур ҳам, асотирий тафаккур сингари, мазмунан авторитардир. Унда обрўли шахс ва жамоа фикри, давлат ва диний институтларниң мафкуравий талаблари, қарашлари, қоидалари хукмронлик қиласди. Бу нафакат сиёсий, ижтимоий-иктисадий ва маънавий-маданий ҳаётда, ҳатто илм-фанда, шу жумладан, баъзан табиатшуносликда ҳам намоён бўлади (илм-фанда, албатта, сал бошқачароқ кўринишда. Совет даврида XX асрнинг 60-йилларига қадар мафкуравий талаблардан келиб чиқиб генетика ва кибернетика фанларининг чекланганини эслаш кифоядир. Худди шундай чеклашлардан физика фанини атом ва термоядро қуролларини яратиш, икки система ўртасида авж олган қуролланиш пойгаси сақлаб қолган). Лекин анъанавий тафаккурдаги авторитаризм асотирий тафаккур авторитаризмидан фарқ қиласди. Анъанавий тафаккурда турли фалсафий, диний оқимлар, мазхаблар, бадиий услублар вужудга келиб, тафаккур ранг-баранглик сари ривожланади. Аммо ҳар бир янги таълимотнинг ўзи мазмунан авторитарликка, дорматизмга, мантикий далиллашда схоластика ва софистикага асосланади ёки муайян даврдан кейин шунга интилади. Айниқса бу ҳолат янги таълимотларниң асосчилари қарашлари ва гояларида ҳам кўпроқ уларниң давомчилари тафаккурига хос. Таълимот асосчисининг қарашлари, тафаккури камчиликлардан, тарихий чек-

ланганликдан холи бўлмаса-да, ўз даври учун анча илғор, танқидий, ижодий янгиликларга бойлиги, доктризмдан йироқлиги билан ажралиб туриши мумкин. Аммо унинг давомчилари, эпигонларига танқидийлик ва ижодий муносабат етишмайди. Натижада янги таълимот бирдан-бир хақиқат сифатида талқин қилинади, унинг кучли томонлари ҳам, мавжуд камчиликлари ва тарихий чегараланганлиги ҳам ўзаро фарқланмасдан докматлаштирилади. Таълимот ижодий ривожлантирилиш ўрнига ҳайтнинг турли масалаларига боғлаб тафсир қилинади ва шарҳланади.

Платон ва Аристотель қарашлари, таълимотлари бутун ўрта асрлар давомида (Платон, айниқса, Аристотель таълимоти ислом фани ва маданияти юксалишиб даврида буюк аждодларимиз томонидан анча ривожлантирилди. Бу энг аввало Форобий, Ибн Сино ва Ибн Рушдга тааллуқли. Лекин ўша даврда ҳам ислом олимлари орасида ҳам докматиклар кўп эди), марксизм-ленинизм совет даврида докматлаштирилганини, энг обручи таълимотлар деб қабул қилингани бежиз эмас. Анъанавий тафаккур даражасида бир таълимот иккинчи мухолиф таълимотни танқид қилиши мумкин ва амалда шундай бўлади. Лекин танқидинг ўзи, баҳслар кўпинча холислик, илмийлик нуқтаи назаридан эмас, мафкуравий мақсадга мувофиқлик ва авторитаризм нуқтаи назаридан олиб борилади. Баъзан эса ғоявий мутаассибликка айланади.

Асотирий тафаккур учун ғоявий мутаассиблик хос эмас. Бир-бирига мос келмаган асотирий дунёқарашлар тўқнашган жойда кўпинча эклектик қоришув натижасида янги қарашлар вужудга келгани маданият тарихидан маълум. Анъанавий тафаккурда ғоявий мутаассиблик потенциал тарзда яширин. Ўзига кулай шароитда у юзага чиқиши ва жамиятга катта зарар

келтириши мумкин. Ўрта асрларда ҳатто бир дин дои-расида турли мазҳаблар, оқимлар ўртасида юз берган қонли тўқнашувлар, ғоявий муросасизлик бунга мисол бўла олади.

Марксизм дастлаб анъанавий тафаккур тарзи сифатида эмас, аксинча, танқидий таълимот сифатида юзага келди. Маркс ҳатто файласуфлар шу пайтгача оламни турлича тушунтириб келдилар, аслида вазифа оламни ўзгартиришдир, деганида ўз таълимотининг пировард максади ва тарихий даъвосини ифодалаган эди. Аммо Октябрь тўнташидан аввалги Россия шароитида, кейин совет даврида марксизмнинг ўзи анъанавий тафаккурнинг янгича шаклига айланди. Марксизмга хос синфий ёндашув, муроса билмаслик, авторитаризмга мойиллик оқибат-натижада унинг дастлабки шаклланиш даври учун хос бўлган танқидий, ижодий рухни сўндириди. Унинг деформациялашган, ўта сиёсийлаштирилган ленинизм, троцкизм, сталинизм, маоизм ва бошқа ш.к. шакллари нафақат авторитар мазмун касб этди, шунингдек, ўзга қараш вакилларини сиёсий репрессия қилишни ёқлади ва амалда қўллади. Бундай шароитда тафаккур эркинлиги ҳақида гапиришнинг ўзи ортиқча.

Хуллас, марксизм ва унинг турли миллий мактаблари анъанавий тафаккурнинг тажовузкор шаклига айланди. Бугунги кунда ваҳҳобийлик, хизбут таҳrir ва уларга ўхшаш диний-экстремистик оқимлар асосида ётган фикрлаш услуги ҳам анъанавий тафаккурнинг бошқача кўринишдаги тажовузкор шакллариридир.

2. Догматизм анъанавий тафаккурнинг асосий белгиларидан биридир. Анъанавий тафаккурда биринчи навбатда анъаналар доктриноми ҳукмронлик қиласи – бу ижтимоий турмуш анъаналарими (урф-одатлар, удумлар ва ш.к.), сиёсий бошқарув анъаналарими,

илмий ёки бадиий-эстетик анъаналарми – бундан қатъи назар. Анъана эса бирданига тайёр ҳолда вужудга келиб қолмайди. У барқарор шакл ва мазмунга эга бўлгунга қадар, жамиятда нисбатан кенг тарқалиб, энг обрўли гурухлар, оқсоқоллар, раҳбарлар, олимлар (илмий анъаналар) томонидан юқори баҳоланиб, эътироф этилгунга қадар анча узоқ вақт давомида «такомиллашади», «сайқал топади», эволюцион ўзгаради. Мана шу даврда у жамият ривожланишига сезиларли ижобий таъсир кўрсатади, янгиликлар яратади.

Ўрта асрлар Шарқ адабиётида, ижтимоий фикрлар эволюцияси жараёнида анъаналар шаклланиб, қатъий авторитар андозаларга айланишига кўплаб мисоллар келтириш мумкин. Совет адабиётида (социалистик реализм услуби, ижобий қаҳрамон масаласи ва х.к.) ва ижтимоий фанларида ҳам XX аср 30-йилларидан эътиборан биз анъаналар авторитаризмига дуч келамиз.

Шу боис анъанавий тафаккурни бир чизиқли, жўн тафаккур шакли сифатида тасаввур қилиш ярамайди. У анча зиддиятли. У ҳар бир янги соҳада, айниқса жамиятда кескин бурилишлар юз бераётган пайтда ҳатто баъзан новаторлик унсурларини қўллаб, эски дорматик қарашларни анча-мунча янгилаши мумкин. Аммо оқибатда янги ютуқлар ва қашфиётлар ортиқча баҳоланиб, тақлид учун намунага, андозага айлантирилади, дорматлаштирилади.

3. Асотирий тафаккур ҳукмронлик қилган даврда шахс индивидуализми куртаклари пайдо бўлган, лекин ривожланмаган, иккинчи ўринда турган. Шу боис асотирий тафаккур очиқасига шахс манфаатларига қарши курашмаган, зеро бунга ҳеч қандай эҳтиёж йўқ эди. Анъанавий тафаккур даврида алоҳида шахс ман-

фаатлари яққол намоён бўлди. Баъзан ҳатто бутун жамиятга буюк шахс иродасини ўтказиш даражасига бориб етди. Миср фирмавнлари, қадимги деспотик давлатлар хукмдорлари, Искандар Макдуний кабилар фаолиятини эслаш жоиз. Лекин қадимги деспотлар тезда илохийлаштирилди, улар шахсига сифиниш ўрнатилди (яна ўша доктриналигинг, анъана андозасининг эътиқоддаги бир кўриниши). Илм-фандада ҳам буюк асарлар, таълимотлар доктриналигинг, юкорида Аристотель ва Платонни эслаган эдик). Масалан, Конфуций таълимоти ҳатто аста-секин динга айлантирилди. Атоқли буюк шахслар билан боғлик бўлмаган ҳолларда шахс манфаати нафақат инкор қилинди, ҳатто унга қарши ғоявий кураш олиб борилди. Асотирий тафаккурда биз бундай курашни кузатмаймиз. Умуман олганда, алоҳида шахс манфаатлари анъанавий тафаккур томонидан инкор қилинади, жамоавий ва корпоратив манфаатларга тўлиқ бўйсундирилади (аслида эса улар ўзаро мувофиқлаштирилиши, уйғунлаштирилиши керак. Бу эса демократик жамиятда, эркин тафаккур шароитида амалга ошади). Анъанавий тафаккур томонидан алоҳида шахс манфаатларининг инкор қилинишини жамият тараққиётининг паст даражаси тақозо этади. Биринчидан, одамлар фақат ҳамжихат бўлиб, биргаликда табиат қийинчиликларини енгиши, ўзларининг ишлаб чиқариш ва турмуш эҳтиёжларини қондиришлари мумкин эди. Дехқонлар ариқ ёки канал қазиб келишлари учун бирлашишга мажбур эдилар. Келтирилган сувни адолатли, экин майдонига караб teng улушда тақсимлаш зарурати алоҳида кишилар манфаатига устуворлик бермасликини «мафкуравий жиҳатдан» асослар эди (мулкий нотенглик туфайли унга қай даражада қатъий риоя қилингани – бу бошқа масала).

Шаҳарларда ҳам хунармандлар маҳсулотларини келишилган нархда сотишдан, бозорда нархни барқарор сақлаб туришдан манфаатдор. Хунармандлар оиласида имкониятлари, одатда, бир хил бўлмайди. Масалан, қайсиdir хунарманднинг 4 ўғли, 3 қизи бор. Ўғиллари отаси билан бирга анча буюм ишлаб чиқаришлири мумкин. Иккинчи бир хунарманднинг эса 2 ўғли ва 6 та қизи бор. Рўзгор харажатлари иккинчисиникида кўпроқ, лекин ишлаб чиқарадиган маҳсулоти камроқ. Агар биринчи хунарманд маҳсулотларини бир оз арzonлаштиrsa, иккинчisi синиб қолиши ҳеч гап эмас. Бундан ташқари, ҳеч бир оила касаллик ёки бошқа шунга ўхшаш фавқулодда ташвишлардан кафолатланмаган. Агар оиланинг асосий боқувчиси – оила бошлиғи, бош уста маълум муддатга ишга яроксиз бўлиб қолса, оила иқтисодий қийин ахволга тушиб қолган. Шу сабабли хунармандлар, косиблар корпоратив манфаатларидан келиб чиқиб, маҳсулот нархини ва кўп ҳолларда сифатини ҳам бир хил сақлашга уринганлар. Кимнингдир бошқалардан ўзиб кетишига, ўз манфаатларини устун қўйишига йўл берилмаган. Энг яхши усталар алоҳида буюртмалар бўйича ўз дурдона буюмларини ясаганлар, бошқа ҳолларда касбдошларидан фарқ қилмаган.

Иқтисодий ночорлик аҳолининг аксарият қисмида ҳамжиҳат бўлишни, жамоавийликни, ўзаро бир-бирини қўллаб-куватлашни рағбатлантириб, ўзбошимчаликни, индивидуализм ва шахсий мустақилликни қоралайдиган қараашларни вужудга келтирган, жамоа манфаатларига хизмат қилувчи меъёрлар ва ғояларнинг устунлигини таъминлаган.

Балки бу аслида одамлар онгидаги сақланиб қолган йиртқич ҳайвонлардан ўзини химоя қилишда, озиқовқат топишда уруғ аъзоларининг жамоавий жавоб-

гарлигини акс эттирувчи архетипнинг қолдиғидир. Лекин ушбу ҳодисани онгдаги архетип қолдиғи деб баҳолаганда ҳам, унинг юзага чиқишининг асосий сабабларидан бири қашшоқлик, иқтисодий ночорликдир. Айни пайтда иқтисодий қолоқлик, ночорлик индивидуал номукаммаллик туйғусини шакллантирган, жамоа олдида шахсни ожиз, хуқуқсиз қилиб қўйган ҳар икки ҳолат ҳам инсон онгиға, қарашлари ва тафаккурига чекловчи таъсир кўрсатган. У муросагўй, жамоа қоидалари ва анъаналарига содик бўлиб тарбия топган ва турмуш кечирган. Тафаккурда турғунлик узоқ даврлар давомида хукм сурган. Тафаккурнинг янги унсурлар билан бойиши жуда секин кечган.

Маълумки, жамиятда қарор топган таълим-тарбия, ахлоқ-одоб тизими, дин мавжуд воқеликка инсонни мослаштиришга, умумқабул қилинган меъёр ва қоидаларни ўзлаштиришда кўмаклашишга хизмат қиласи. Бундай ҳолат барча тузумлар учун хос. Инсонни ҳётга мослаштириш, унга бу борада зарур билимлар ва маънавий мўлжаллар бериш таълим-тарбия, дин ва бошқа ижтимоий институтларнинг бош вазифасидир. Ижтимоий институтлар фаолияти мавжуд тузумни ўзгартиришга эмас, балки мустаҳкамлаш орқали такомилаштиришга қаратилган. Фақат муҳолифат сифатида пайдо бўладиган янги эътиқодлар, динлар, сиёсий ташкилотлар ва улар туфайли вужудга келадиган янги тузилмалар таълим-тарбия, ахлоқ-одоб, умуман қадриятлар тизимини ўзгартиришга ҳаракат қиласи.

Анъанавий жамиятда таълим-тарбия ва дин инсондаги реал етишмовчиликларни, шахсий номукаммаллик туфайли вужудга келган кемтиклар ўрнини тўлдиришга ҳам хизмат қиласи. Айниқса динда компенсаторлик вазифаси яққол кўзга ташланади. Агар ўтмиш анъанавий жамиятларида аҳолининг аксар қисми са-

водсиз, маориф ва маърифат даражаси паст бўлганини, мактабнинг устидан диний ташкилот тўлиқ ҳукмронлик қилганини хисобга олсан, шахс манфаатларини тан олиш факат юкори табақаларгагина (қисман) тааалуқли бўлиши аёнлашади.

Анъанавий тафаккурнинг баъзи бир буюк шахслар қарашларини, ғояларини догматлаштириши индивидуализмни ўзига хос кўринишда тан олишни билдирамайди. Аксинча, догматлаштириш орқали уни ижодкорлик моҳиятидан жудо қиласи ва аслида жамоавийликнинг қондаларидан бирига айлантиради.

4. Анъанавий тафаккур, коида тариқасида, бир томондан, ижтимоий ва мулкий нотенглик вужудга келган ва ҳукмронлик қилган давр учун, иккинчи томондан эса – ердан жамоа бўлиб фойдаланиш, саноат ишлаб чиқариши оиласиблик даражасидан ўсиб чиқмаган, давлат ва черков бир-биридан ажралмаган (ёки диний мафкура ҳукмронлик қилган) даврлар учун хос. Бошқача айтганда, у қулдорлик ва феодал жамиятлардаги ижтимоий тафаккур тарзидир. (Собиқ Совет Иттифоки ва бошқа социалистик мамлакатларда анъанавий тафаккур тарзининг қайта тикланиши аслида Шимолий Америкада XVIII ва XIX аср биринчи ярмидаги қулдорлик тузуми каби тарихий анахронизм эди). Социалистик мамлакатлардаги анъанавий тафаккур қулдорлик ва феодализм давридаги ўтмишдошлидан мазмунининг замонавийлиги ва шаклан бойлиги билан, илм-фанда, айниқса фундаментал фанларда тадқиқот ва умумлаштириш усулларининг юксак профессионализми, баъзи масалаларда анча илғорлиги билан ажралиб туради.

Анъанавий тафаккурнинг социалистик шакли кўп жиҳатдан пародоксал характерга эга. Унда бир-бирини инкор этувчи илгор илмий услублар (табиатшу-

нослик илмида), теран таҳлиллар (гуманитар илмда), жамиятни бошқаришда докторатик андозавий услублар, юзаки, саёз умумлаштиришлар сиёсийлаштирилган ва мағкуралаштирилган хуносалар билан чатишиб, коришиб кетган.

Кулдорлик ва феодал жамиятларини кўп жихатдан анъанавий жамият, уларнинг тафаккурини анъанавий тафаккур дейиш жоиз. Лекин қулдорлик тузумида ҳам, феодал тузумда ҳам бирданига анъанавий жамият вужудга келиб қолмайди. Қадимги Юнонистонда анъанавий жамият унсурлари Александр Макдунийдан кейин, қадимги Римда император Августдан кейин кучая бошлади.

Ислом Шарқида анъанавий жамият XVI асрда узилкесил қарор топди.

Ижтимоий нотенглик ёки у ўрнатилмаган жойларда (Октябрь инқилобигача Россиянинг баъзи худудларида сақланиб қолган дехконлар жамоаси, рус казак қўшинлари яшаган худудлар) жамоавийлик тамойлиниг етакчилиги боис анъанавий тафаккур шахс эркинлигини, индивидуал манфаатларни максимал даражада инкор қиласи ёки улар билан етарлича ҳисоблашмайди. Ишлаб чиқаришда ва турмуш тарзида патриархал муносабатлар қолдиқларининг авторитар таъсири маънавий ҳаётда черков ва диннинг авторитаризми билан қўшилиб тафаккур анъанавийлигини белгилайди. Айрим қолок урф-одатларнинг яшовчанлиги, кексалар ва оқсоқолларнинг, маҳалланинг баъзи бир анахроник (тарихан эскирган) даъволари, уринишлари негизида ҳам патриархал муносабатлар қолдиғидан озиқланувчи авторитаризм туради.

Анъанавий тафаккур зиддияти шундан иборатки, у ижтимоий нотенгликни асослаш билан бир қаторда («беш бармөк бир хил эмас» қабилида нақлларни эс-

ланг), эгалитаризмни (исломда – тавдилия) – барча бандалар Худо олдида тенгdir деган табиий ҳуқуқни ҳамда иқтисодий тақсимотдаги текисчилик тамойилини ёқлади. Эгалитаризм диний жиҳатдан эмас, иқтисодий-ижтимоий жиҳатдан қаралса, турли динларга эътиқод қилувчи шарқ мамлакатларида, сугориладиган дехқончилик миңтақаларида ердан жамоа бўлиб фойдаланиш маҳсулидир. Европа мамлакатларида эса эгалитаризм христиан жамоасининг ижтимоий тенглик идеали сифатида вужудга келган.

Демак, ижтимоий-иқтисодий ва диний эгалитаризм анъанавий тафаккурнинг хос белгиларидан биридир. Эгалитаризмни иқтисодиётда қўллашга ҳаракат қилиш ижобий натижа бермайди. Аксинча, жамиятни турғунликка, инқирозга маҳкум этади. Иқтисодиётда уни тўла рўёбга чиқариш – хом хаёл. Эгалитаризм фақат адлия соҳасида амалга оширилиши мумкин ва жоиз: қонун ҳаммага нисбатан бирдай қўлланилмоғи, ҳар бир шахснинг келиб чиқиши, жамиятдаги мавқеи, жинси ва эътиқодидан қатъи назар, ҳуқуқларини кафолатлагоми лозим.

5. Диний қарашлар таъсирида амалий тафаккур ва назарий тафаккур ўртасидаги чегара аниқ белгиланмаган (асотирий тафаккурда бу чегара умуман йўқ. Амалий ва ўзига хос умумлашган «назарий» тафаккур – мифологик модель сифатида фақат қутбий ҳодисалар кўринишида мавжуд). Анъанавий тафаккур амалий масалаларда пухта иш тутади, рационал мазмунга эга, аммо назарий масалаларда у иррационал ва рационал қарашларни қориштириб юборади, схоластика ва мистикага мойиллик кўрсатади.

Эркинликнинг анъанавий тафаккур даражасида на-
моён бўлиши анча баҳсли ва мураккаб масаладир. Уму-
ман олганда, анъанавий тафаккур догматизмга, андо-

зага, эклектика ва иррационализмга мойиллиги туфайли тафаккур эркинлигини инкор этади. Лекин, иккинчидан, юқорида айтилганидек, янги бир ахлоқий, диний меъёр, илмий хулоса, бадиий образ анъанага, догматик андозага айлангунча анча вақт ўтади. Бу тафаккурниң маълум конкрет мавзу ёки йўналишда у ёки бу даражада эркин изланиш олиб боришига имкон яратади. Учинчидан, атоқли мутафаккирлар, ижодкорлар жамиятдаги мавқеидан фойдаланиб (анъана бўйича) айрим илғор ёки ноанъанавий ғояларни нафақат олға суришлари, ҳатто анча кенг тарқатишлари ҳам мумкин.

Ижтимоий нотенглик, мулкий низолар, тахтталашлар, диний мазхаблар ўртасидаги курашлар, урушлар, турли ғалаёнлар анъанавий жамият ва унинг тафаккур тарзини ларзага солиб турган. Натижада баъзи янги нисбатан илғор ғоялар тарқалган. Барқарорлик ўрнатилганда, доим ҳам рекацион кучлар ҳокимият тепасига келмаган. Бундай ҳолларда илм-фан, санъат, ҳунармандчилик, дехкончилик, савдо-сотик рафбатлантирилган. Айрим ҳолларда эса янги ҳукмдорлар аввали ги ҳукмдор пайтидаги мухолиф қарашлар вакиллари га суюнган, уларни қўллаб-кувватлаган.

Тўртингидан, индивидуал онгнинг, тафаккурниң муҳторийлиги ва ижтимоий онгга таъсирини ҳам унумаслик керак.

Лекин умуман олганда, анъанавий жамиятда тафаккур эркинлиги нисбий характер касб этиб, узлуксиз ва жуда узоқ муддат давом этмаган. У янги динлар, эътиқодлар ёки ҳокимият тепасига илғор фикрли ҳукмдорлар келганда ривожланган. Аммо доимо шундай бўлавермаган. Масалан, ислом дини вужудга келганда, у тафаккур эркин ривожланиши учун жуда кўп шарт-шароит яратди ва қўллаб-кувватлади. Аммо тас-

вирий санъатда, мусиқа ва театр санъатида катта чекланишлар юз берди. Христиан дини эса энг бошданоқ Галилей замонигача табиий-илмий тафаккурни, санъатнинг бевосита черковга хизмат қилмайдиган турла-рини чеклади.

Темурийлар, айниқса Улугбек илм-фанни ривожлантирди, жаҳолатга қарши курашди. Ҳатто айрим сайдоздаларни мутаассиблиги, реакцион фаолияти учун қаттиқ жазолади. Унинг отаси Шоҳруҳ эса табиий-илмий тадқиқотларни унчалик рағбатлантирмади. Тафаккур эркинлигини факат гуманитар билимлар, адабиёт ва санъат доирасида ривожланишига шароит яратди. Алишер Навоий «Мажолисун нафоис» асарида Ҳусайн Хоразмий билан боғлиқ шундай воқеани келтиради: «Ва Мавлоно Шоҳруҳ Мирзо замонида бир ғазал учун такfir қилиб, Хоразмдан Ҳиротга келтурдилар. Чун донишманд ва истилоҳ билур киши эрди, ҳеч нима собит қила олмадилар. Қайтиб яна ўз мулкига кетти. Ва ул ғазалнинг матлаи будурким:

Эй, дар ҳамин олам пинхон туву пайдо ту,
Ҳам дарди дили ошиқ, ҳам асли мудово ту¹.

Таржимаси:

Эй, бу оламда яширин ҳам, ошкора ҳам ўзингсан,
Ошиқ юрагининг дарди ҳам, давоси ҳам ўзингсан.

Ҳусайн Хоразмий нафакат шоир, шунингдек зоҳир ва ботин илмида ўз замонасининг машҳур кишиларидан бўлган, жуда нозик фикрлаган. Шу боис ҳиротлик муллалар унга мушриклик айбини қўя олмаганлар.

Таъкидлаш жоизки, Шоҳруҳ ва Ҳусайн Бойқаро

¹ Алишер Навоий. Мукаммал асарлар тўплами. XIII т., Т.: – 1997, 13–14-бетлар.

замонида Хурсонда ҳали анъанавий жамият узил-кесил ғалаба қозонмаган, Темур даврида бошланган уйғониш, юксалиш давом этаётган эди. Лекин анъанавийлик кайфияти ва меъёрлари ҳам зимдан кучайиб бораётган эди. Анъанавий тафаккур ижтимоий-сиёсий, иқтисодий барқарорлик шароитида муттасил тадрижий ўсишни эмас, балки турғунликни келтириб чиқарди. Шоҳруҳ ва Ҳусайн Бойқаро даври нисбатан ижтимоий-сиёсий, иқтисодий барқарорлик даври бўлди, аммо ўша даврда турғунликни келтириб чиқарувчи омиллар етила бошлади. Ҳусайн Хоразмий билан юз берган воқеа анъанавийлик мустаҳкамлана бошлаганини, ғоявий назорат кучайганини, ҳукмрон мафкурага зид ғоялар учун таъқиб қилиш шаклланаётганини кўрсатади.

Кўплаб мисоллар далолат берадики, анъанавий жамиятда тафаккур эркинлиги умумқабул қилинган мафкуравий меъёрлар даражасидагина намоён бўлади. Шу боис анъанавий жамиятда ижодда эпигонлик кенг тарқалган. Ҳатто буюк даҳо ижодкорлар ҳам, агар янги оқимнинг бошланиш даврида яшамаган бўлсалар, янги образларни, янги ғояларни анъанавий мавзулар, анъанавий сюжетлар доирасида анъанавий шаклларда яратишга, ифодалашга мажбур эдилар. Мисол сифатида хамсачилик анъаналарини эслаш кифоя қиласи, деб ўйлаймиз.

Анъанавий тафаккур хусусиятлари ҳақидаги фикрларни якунлаб, қуйидаги дастлабки ҳулосаларга келиш мумкин:

1. Анъанавий тафаккур масъулиятдан, мустақил қарор қабул қилишдан чўчиди, ташаббус кўрсатишдан қочади, туб янгиликларни инкор қиласи.

2. Унга етакчи, йўлбошли керак. У обрўли фикр кетидан кўр-кўрона эргашгиси келади, шу боис унга

андазабозлик, доҳийпарастлик, оқсоқолпарастлик хос.

3. Анъанавий тафаккурда воқеликка рационал ва иррационал ёндашувлар, реал ва хаёлпарастлик муносабатлари механик тарзда қоришиб кетади.

4. Анъанавий тафаккур мутаассибликка, жамиятни тоталитар идрок этишга мойиллик кўрсатади, маълум шароитларда (назорат воситалари ва имкониятлари кенгайиши жараёнида) тоталитар мафкура вужудга келишига замин яратади.

Тафаккурнинг энг сермаҳсул, бунёдкор, ижодкорликка мойил шакли демократик эркин тафаккурдир. Бу ҳақда сухбатлашишдан аввал рационал ва иррационал тафаккур тарзи тўғрисида баъзи мулоҳазаларни билдириш лозим.

РАЦИОНАЛ ВА ИРРАЦИОНАЛ ТАФАККУР

Тафаккурнинг тарихий шаклларидан тафаккур тарзини фарқлаш керак. Тафаккур тарзи, одатда воқеликни идрок этиш ва унга муносабатга кўра, рационал (ақлга, мантиқка асосланган) ва иррационал (ақл ва мантиқ доирасидан чиқадиган, уларга зид ёки ботиний ишончга, файришуурый, мистик омилларга таянадиган) бўлади. Бундан ташқари, тафаккур тарзи, аниқроғи, услуби, воқеликни таҳлил қилишига ва умумлаштиришига кўра, метафизик ва диалектик бўлиши мумкин. Воқеликни акс эттириш воситасига кўра эса конкрет-образли (шу жумладан бадиий) ёки мавхумтушунчавий (шу жумладан илмий) тафаккур хилларини ажратиш мумкин.

Назарий тафаккур хақида гап кетганда, рационал тафаккур кўпроқ Фарбга, иррационал тафаккур кўпроқ Шарққа хос деган қарашлар анча кенг тарқалган. Бундай қарашларга эътибор бермаслик ҳам мумкин эди. Лекин ўқувчиларда иррационализм Шарқ тафаккурнинг хос белгиси экан, шундай бўлиб қолади, ахир маънавияти талай масалаларда инқирозни бошдан кечираётган Фарб ҳам Шарқ қадриятларига, хусусан мистик таълимотларига қизиқмоқда-ку, деган фикр вуждуга келиши эҳтимолдан холи эмас.

Ҳақиқатан Фарбда Шарқ маънавий қадриятларига ёки ўз маънавий қадриятлари доирасида турли мис-

тик таълимотларга қизиқиш ортмокда. Рационализм инқирози тўғрисида Фарбнинг кўп олимлари, масалан, атоқли мутафаккир А. Швейцер ҳам ёзган. Фарб рационализми инқирози сабаблари анча-мунча таҳлил этилган. Аммо инқирозга учраган рационализмга хозирги замон шароитида иррационализм муқобил бўла олмайди. А. Швейцер тўғри таъкидлаганидек, эски рационализм ўрнини унга нисбатан теранроқ, янги рационализм эгаллаши керак, иррационализм эмас. Мана шуни эсдан чиқармаслигимиз керак.

Ўзбекистоннинг мустақил тараққиёти энг олий мақсадларни кўзлайди, биз илм-фан ва техникани, юксак технологияларни, маънавий маданиятни ривожлантириб, ҳақиқий бозор муносабатларини қарор топтиримоқдамиз, жаҳон ҳамжамиятига интеграция бўлмоқдамиз. Инсон камолоти ва эркинлиги учун барча зарур шарт-шароитларни, шу жумладан, интеллектуал имкониятларни яратмоқчимиз. Олдимизга қўйган мақсадларга эса фақат теран ақл ва чуқур мантиқка таянган тафаккур ёрдамидагина эришиш мумкин.

Аслини олганда рационал ва иррационал тафаккур тарзи шарқий ва фарбий тамаддуналар, маданиятлар моҳиятидан, географик омиллар ёки динлар хусусиятидан келиб чиқмайди. Эътироф этилган омилларнинг барчаси тафаккурга маълум даражада таъсир кўрсатиши мумкин, холос. Европа мамлакатларида, VI–VIII асрларни қўя турайлик, IX–XIV асрларда ҳам Уйғониш даври (Ренессанс) гача иррационализм ҳукмрон эди.

Аксинча, IX–XII асрларда ислом дунёсида назарий тафаккурда рационализм устун эди. Ҳатто ислом илохиёти – қалом ҳам рационализмга таянар эди. Ислом оламида Чингиз истилосидан кейин маънавиятда, рационал тафаккурда чуқур инқироз бошланди.

Лекин шунда ҳам XV аср ўрталаригача рационал тафаккур таъсири иррационал мистик тафаккурдан кам эмас эди.

Фарб рационализмига ислом, айниқса Ибн Рушд таълимоти жуда кучли таъсир кўрсатган. Ислом илмфани, адабиёти, маданиятининг Европага кириб келувчи асосий дарбозаси Испания бўлган. Чунки испанлар 650 йил араблар хукмронлигида яшаган, нафақат ўқимишли испан руҳонийлари, киборлари ва аслзодалари, савдогарлари, шунингдек, анча кенг қатлам испанлар ҳам араб тилини билишган. Испаниялик маҳаллий муаллифлардан бири X аср охирида шундай сўзларни ёзиб қолдирган: «Энг машҳур ёш христианлар араб адабиёти ва тилидан бошқа адабиёт ва тилни билишмайди: улар тиришқоқлик билан арабча китобларни ўқиб ўрганадилар; катта пул ҳисобига улардан бутун кутубхоналар тузишга шошадилар ва ҳар жойда араб фанини мақтайдилар. Бошқа тарафдан, христиан китоблари эслатилган заҳотиёқ, беписандлик билан бундай асарлар дикқат қилишга арзийдиган қимматга эга эмас, дейдилар»¹.

Бошқа бир испан руҳонийсининг юқорида келтирилганга ўхшаш фикрини И. Крачковский ҳам таржима қилган. Унда ошиқ-маъшуқлар бир-бирларига она тилида эмас, араб тилида ҳатлар ёзиши, зодагон испанлар орасида маҳбубларига араб тилида ғазаллар ёзиш одатга киргани, улар ҳатто она тилларини яхши билмасликлари айтилади. (Ушбу муносабат билан XVIII–XIX асрларда рус киборларининг француз тилида сўзлашиб, ёзишмалар олиб борганини, ўз она тилларида жуда ғализ гапирганини эсланг.)

¹ Иктибос С. Н. Григорян. «Средневековая философия народов Ближнего и Среднего Востока» М., 1966, 252-б. китоби бўйича келтирилмоқда.

Шундай қилиб, Испания мусулмон ва христиан маданиятлари ўрта асрларда бевосита яқиндан алоқа қилган мамлакат бўлган. Араб тилидан илмий асарларни лотин тилига асосан испан руҳонийлари ва испан яхудийлари таржима қилган. Арабчадан қилинган таржималар Европада Уйғониш даври (Ренессанс) бошланишига табиий-илмий турткilarдан бири вазифасини бажарган. Аммо Европа Ренессанси Испанияда эмас, балки Италияда бошланди. Нега ижтимоий-иктисадий, сиёсий ва маънавий-маданий сабаблар йигиндиси Италияда Испанияга нисбатан Ренессанс учун баракали келди?

Ҳамма омилларни таҳлил қилиш имконига эга эмасмиз. Мавзуумиздан келиб чиқиб фақат биттаси ҳақида тўхталиб ўтмоқчимиз. Европа олимларига XII асрдан бошлаб Ибн Рушд (Аверроэс) асарлари таъсири жуда кучли эди. Ибн Рушд фалсафаси теварагида черков ва илм-фан ўртасида қаттиқ баҳслар олиб борилди. Ҳатто Рим католик черкови Фома Аквинат талқинидаги анча-мунча соҳталаштириб Аристотель ва Ибн Рушд таълимотини ўзига хос тарзда «қонунлаштирган» эди. (Томизм – Фома Аквинат таълимоти, католицизмдаги биринчи рационалистик оқим. Бугунги кунда томизмнинг замонавий шакли – неотомизм Рим католик черковининг расмий фалсафий таълимотидир).

Ибн Рушд вафотидан кейин ҳатто фарб фалсафасида аверроизм деб аталувчи изчил рационализмга асосланган оқим вужудга келади. Аммо Реконкистадан кейин (испанларнинг араб ҳукмдорлигига чек кўйиб, уларни Испаниядан ҳайдаб юбориши) испанларда исломий қадриятларга нисбатан салбий муносабат, кескин миллатчилик қарор топади. Оқибатда испан аверроистлари, христиан бўлишларига қарамасдан, мамлакатдан кувғин қилинади. Улар Испанияга чегарадош жану-

бий Францияга жойлашиб оладилар ва ўша ерда ўз ижодларини, фарб маънавий ҳаётига таъсирини давом эттирадилар.

Бу даврга келиб Испания Европанинг иқтисодий ва ҳарбий жиҳатдан энг қудратли давлатига айланган, айникса испан флоти дунёда тенги йўқ ҳисобланар эди. Испан кироли французлардан аверроистларни Франциядан ҳайдашни талаб қилади. Испания қудратидан чўчиган француз кироли аверроистларни мамлакатдан чиқариб юборади. Улар Франциядан Италияга кўчиб, ижодий фаолиятларини давом эттиради. Бундан Италия ижтимоий фикри, илм-фани ва санъати жуда катта фойда кўрди, мистика ва иррационализмдан рационализм томон ривожлана бошлади, черков доктринаси ҳар соҳада, аввало, ахлоқий, эстетик ва табиий-илмий масалаларда шубҳа остига олина бошлади. Аверроизм оқими XVI асрнгача яшади. У Италияда ва сўнгра бутун Европада Ренессанс бошланишига самарали таъсир кўрсатди, рационал тафаккурнинг диний мистика ва иррационализмдан устун келиши учун илмий-интеллектуал асослардан бири бўлди. Атоқли файласуф Роже Бэкон, машхур Брабантлик Сигер, Дунс Скот Ибн Рушд издошлари эди. Айникса Италияда XIV – XVI асрларда, яъни Ренессанс арафаси ва даврида Помпони, Ванини, Икиллини, Цабарелла, Кремонини каби аверроистлар етишиб чиққани бежиз эмас.

Католик черковининг инквизиция суди қийноклари ва хавфи, Жордано Бруно каби олимларнинг тириклайн гулханда ёқиб юборилиши ҳам рационал тафаккурнинг ғолиб одимларини тўхтатиб қололмади. Европада янги тафаккур элчилари, дастлаб Рене Декарт ва Бенедикт Спиноза, кейин маърифатпарварлик вакиллари – инглиз ва француз рационалист-файла-

суфлари (материалист ёки идеалист бўлишидан қатъи назар) етишиб чиқди. Айнан худди шу даврда (XVI–XVII аср) Хоразмий, Фарғоний, Ар-Розий, Форобий, Ал-Киндий, Беруний, Ибн Сино, Умар Хайём, Ибн Туфайл, Ибн Бажжа, Ибн Рушд, Улугбек, Али Қушчи ва рационал тафаккурнинг бошқа даҳоларини етиштириб берган ислом мамлакатларида рационализм инқирози чуқурлашган, мистика устунлиги бошланган эди.

Фарб Ренессансининг сабаби факат аверроизм ёки умуман рационализм эмас. Биз бундай қатъий фикрни олға суришдан йироқмиз. Ренессанс кенг миқёсда – Фарб ижтимоий тараққиётининг маҳсули. Уни вужудга келтирган омиллар орасида нафақат илмий, маданий, шунингдек, ижтимоий-иктисодий омиллар бор. Энг аввало товар муносабатларининг қарор топа бошлаганини, шаҳарлар, мануфактуралар ва цехларнинг тез ривожланганини кўрсатиш керак. Аммо аверроизмнинг Farbda рационал тафаккур шаклланишига ва Ренессанс бошланишига хиссаси салмокли ва муносиб бўлганига шубҳа йўқ. Афсуски, ушбу масала на европалик, на ислом мамлакатлари олимлари томонидан алоҳида ўрганилган.

Шарқ тараққиётида илмий-интеллектуал юксалишдан, турли сабабларга кўра, иқтисодий юксалиш ортда қола бошлади. Оқибатда табиатшунослик ва илмий-техникавий кашфиётларга, тадқиқотларга талаб сусайиб кетди. Бу ўз навбатида рационал тафаккурнинг илмий-интеллектуал асослари заифлашувига олиб келди. Боз устига ислом бағрида иррационализм ва рационализм ўртасида давом этаётган курашда иррационализм мавқеи йилдан-йил мустаҳкамланиб борди. Тасаввуфнинг янги тариқатлари вужудга кела бошлади ва улар таъсири кучая борди.

Иррационализмга мурожаат этиш баъзи ҳолларда ўзига хос равишда тафаккур эркинлигига интилиш билан тушунтирилади. Бу қисман тӯғри. Илк иррационалистик қарашлар соҳиблари ўз даврининг ортодоксал таълимотлари доирасида қатъий қоида, ўзгармас андозаларга айланиб қолган баъзи бир доктриник фикрларни четлаб ўтиш, очиқча ёки пинҳона уларга мос келмайдиган мулоҳазаларни билдириш учун мажозий усуллардан, мистик қарашлардан фойдаланганлар.

Лекин иррационализм ва тафаккур эркинлиги масаласи аслида анча мураккаб масаладир.

Каломда янги мактаб яратган диний рационализмнинг буюк намояндаси Абу Мансур Мотуридий эътиқод масаласида ақл ва нақлга таяниб иш тутиш лозимлигини уқтирганда, диний таълимот ва амалиётдаги анъаналарнинг (нақлнинг) инсон тафаккури тӯғри, ўзи эса ҳақиқий мўмин, эркин бўлишига таъсирини эътироф этган.

Мотуридий хulosасини нафақат эътиқод ва тақвога нисбатан, балки кенгроқ, бутун ижтимоий ҳаётга нисбатан ҳам кўллаш мумкин. Агар шундай қилинса, Мотуридий хulosасидан эркинлик ақлга таяниб иш тутиш билан бир қаторда ўзини анъаналарга, яъни жамиятда шаклланган, қабул қилинган қадриятлар тизимига мос тутиш ҳам эканлиги келиб чиқади.

Калом диний рационализмга асосланган эди. Куръонни тафсир қилиш илмига – илм ат-тафсирга ҳам илм бор мұтазилийлар (калом таълимоти асосчилари ва ундағы тарихий биринчи йирик оқим) асос солғанлар (гап бу ерда аниқ тизимга келтирилган диний илм ҳакида кетяпти). Оламни тушунишда унга оқилона муносабатда бўлиш, ақл тарозисидан, таҳлилдан ўтказиш лозимлиги каломнинг асосий тамойилларидан биридир.

Калом ислом тарихида анча самарали роль ўйнади. У ўзининг юксалиш даврида тафаккур эркинлигига таянди (албатта, ислом доирасида) ва уни қўллаб-куватлади. Ислом цивилизацияси айнан калом устунлик ва етакчилик қилган даврда ижтимоий тараққиётда, маданиятда, фалсафа ва илм-фанда, хусусан математика, астрономия, тиббиёт ва табиатшуносликнинг бошқа соҳаларида энг буюк ютуқларни қўлга киритди (IX–XII асрлар). Лекин калом таълимотининг мавхум-тушунчавий мулоҳазалари кенг жамоа англаб олиши учун оғирлик қилди. Ўқимишли муллаларнинг ўзлари орасида ҳам ягона фикр йўқ эди. Бир томондан, калом бағрида ҳар хил қарашлар, ўзаро мухолиф мафкуралар, фирмалар пайдо бўла бошлади. Иккинчи томондан, дорматизм кучайди. Оқибатда каломнинг концептуал-методологик ички муштараклиги заифлашди. У аста-секин ўз ўрнини иррационал қарашларга бўшатиб берди. Табиатшунослик ва дунёвий илм-фан қўлга киритган ютуқлар расмий диний таълимотларга зид кела бошлади. Ижтимоий ҳаётдаги зиддиятлар ҳам йилдан-йил кўпайиб борди.

Ислом олға сурган тавдиия (тeng тақсимот) ва бошқа баъзи бир тамойилларни амалиётга жорий қилиш кийин кечди. Ислом жамоаси ичida ижтимоий табакаланиш кучайган сайин, эркинлик, тенглик, адолат тўғрисидаги илк исломий тасаввурлар амалий ҳаётга унча мос эмаслиги аёнлаша борди. Калом доирасидаги талқинлар жамиятни қониқтиrmай қўйди. Энди бу тасаввурларни янгилаш, яъни асосий тамойилларни бошқача талқин қилиш лозим эди. Шундай қилиб, иррационализмга эҳтиёж ортди. Иррационал талқин вазиятга қараб турлича товланиб кетаверади, унга эклектика хос. Каломга ички ривожланиш, такомиллашиш салоҳияти, даврнинг, ҳаётнинг янги талабларига

жавоб бера олиш учун қайишқоқлик етишмади. Иррационализм ўзининг ички ижодий салоҳияти, мулоҳазаларининг қайишқоқлиги туфайли эмас, балки эклектик табиатига кўра ҳаётга мослашувчанроқ эканлигини намойиш қилди.

Рационализм мавжуд ҳолатни таҳлил этиб, камчиликларни танқид қиласди, ўз баҳосини далиллар ёрдамида асослайди. Иррационализм эса камчиликларни метафизик инкор қиласди – қуфр, беъманилик, адолатсизлик ёки анъанааларга, миллий менталитетга ёт деб эълон қиласди. Иррационализм баҳо беришдан кўра, кўпроқ «ёрлик» ёпишириди. Ўз хулосаларини, зарур бўлса, «спекулятив» далиллар ёрдамида «асослайди». Жамият турғунлиги ва инқирози даврида айнан шундай далилларга эҳтиёж пайдо бўлади.

Каломдан кейин маънавий ҳаётда тасаввуф етакчилик қила бошлиди. Тасаввуф инсон эркинлиги масаласини уни фоний дунё билан боғлаб турувчи, бокий дунёдаги қисматига таъсир кўрсатувчи нафсадан кутулиш, ўзликдан тўла воз кечиб, фанолик орқали Ҳақ васлига етишиш деб талқин қилди. Тасаввуф Оллоҳни ақлан билиш мумкин эмаслигини, рационал тафаккур имкониятлари чекланганлигини тўғри таъкидлади. Аммо у рационализм ва умуман тафаккур имкониятларини анча-мунча паст баҳолаб, кўпроқ иррационал туйғу, ишқ завқи, иррационал ишончга устунлик беради. Қуръон тафсири ва дин, шариат асосларини тушунтиришда мажозий талқинга ортиқча мойиллик кўрсатди.

Калом илми нега тасаввуфга етакчиликни бериб қўйди? Нега нисбатан рационалистик диний таълимот очиқласига диний-мистик таълимотга нисбатан заифлик қилди, деган савол туғилиши табиий. Бу иррационализмнинг потенциал тарзда рационализмга нис-

батан устунлигининг намоён бўлиши эдими, ёки бошқа омиллар таъсирида бундай ҳолат юз бердими? Аслида тафаккурда, айниқса, илм-фанда рационализм мантиқий асос вазифасини бажаради. Иррационалистик унсурлар, аксинча, кўп ҳолларда илмий назарияга, хуносаларга турли хатоликлар, ноаниқликлар кириб қолишига сабаб бўлади.

Диний таълимотларда эса рационалистик ва иррационалистик қарашлар ёнма-ён ёки қоришиқ ҳолда келади. Дин ўз табиатига кўра иррационализмга яқин. Шу боис диний таълимотнинг рационализм доирасида ривожланиш имкониятлари чегараланган. Эртами-кечми ислом таълимот тизими рационал тафаккур билан зиддиятга келиши табиий эди. Ҳадис илми, фикҳ ва адаб (ахлоқ), Қуръон тафсири, ислом илоҳиёти ва шариат асослари шаклланиши ва илк ривожланиш даврида барчага тушунарли бўлиши, ғайридинлар ва жоҳилларни исломга жалб қилиши лозим эди. Ҳар қандай илм, айниқса янги илм – дунёвий ёки диний бўладими, қатъи назар – аниқ ва оқилона асосларга, мантиққа, барча томонидан тўғри ва мумкин қадар бир хил тушуниладиган атамаларга, қоидалар ва талқинларга эга бўлиши шарт. Шу боис ўша давр исломи ақлирасоликка, мантиққа, рационал тафаккурга таяниши зарурат эди. Аммо фикҳ мактаблари – мазҳаблар, шариат асослари шаклланиб бўлгач, исломда ҳатто чегараланган рационализмга эҳтиёж сусая бошлади.

Каломнинг иккинчи тарихий босқичи – ашъария ва мотуридияда – бу қисман сезилади. Масалан, мотуридияда нафакат аклга, шунингдек, нақлга таяниб иш тутиш лозимлиги билvosита иррационализмга ён босишидир. Чунки нақл (ривоят шаклидаги анъана) замон талабига жавоб бермаслиги, ҳаётдан ортда қолиши, ривоятда эса баъзи бир нореал унсурлар арала-

шиб қолган бўлиши мумкин. Ҳар қандай накл ҳам ақлга мос келавермайди.

Калом учун Оллоҳ борлиқнинг ягона ва мутлоқ манбай, яратувчиси ва белгиловчиси. У ягона ва бўлинмас, моддий хусусиятларга эга эмас. Шу сабабдан инсон тасаввурларига мос келмайди. Оллоҳ, сифатлари га кўра, нафакат – Раҳмон ва Раҳим, у, шунингдек, Жаббор ва Каҳҳор. Инсон Оллоҳ йўлидан бориши лозим ва мажбур. Унинг тақдири азалдан белгиланган. Аммо инсон бу дунёда фақат чегараланган танлаш имкониятига эга (увол ва савоб, ҳаром ва ҳалол, куфр ва мўминлик, яхшилик ва ёмонлик ўртасида). Оллоҳни инсондан тубсизлик ажратиб туради.

Калом тадқиқот ва қизиқиш доирасида инсон руҳининг эркинлиги ва абадийлиги масаласига эътиборни сусайтирди.

Тасаввуф, каломдан фарқли, Оллоҳ васлига етишиш (восил бўлиш) масаласини қўйди ва ўзича уни ижобий ҳал қилди. Энди Оллоҳ нафакат универсал асос ва манба, шунингдек, инсоннинг яшашдан мақсадининг бирдан-бир мазмунига ҳам айланди. Тасаввуф инсон ва Оллоҳ ўртасидаги трансцендент тубсизликни енгиб ўтишга имкон туғдирди.

«Мистикларни мудом имманентизмда, яъни Худонинг ва қалбдаги илоҳийликнинг имманентлигини (ички ажралмас, туфма хислатлигини – А.Э.) тан олишда айблаб келишди. Ҳақиқатан, мистика Худо ва инсон ўртасидаги трансцендент тубсизликни енгиб ўтади. Расмий теология (илоҳиёт илми – А.Э.) ўзини холис [ilm] хисоблар ва мистиканинг субъективлигига қарама-қарши қўяр эди. Мистик тажрибада трансцендентлик имманентликка айланади»¹. Бу фикр ай-

¹ Алексеев П. В., Панин Н. В. Философия. М., 1997, 68-бет.

нан тасаввуфга ҳам тааллуқли. Тасаввуф Оллоҳни инсон миясидаги мавхум, аниқ тасаввур этиш мумкин бўлмаган тушунчадан инсон қалбининг ишқига, завқига айлантириди. Оллоҳ инсон билан, инсон Оллоҳ билан бирлашиш имкониятига эга бўлди.

Оллоҳни на ақлан билиш, на физиологик ҳис этиш мумкин. Уни фақат қалбан ҳис этиш, мистик туйғуда у билан бирлашиб кетиш мумкин. Масалага бундай ёндашув бандаларнинг ибодатига ҳам, кундалик диний мажбуриятларни, мўминликни адо этишига ҳам теранроқ мазмун ва аниқ мақсад, рағбат бағишилади: Оллоҳ васлига восил бўлиш мумкин, бу банданинг ўзига боғлиқ. Калом Оллоҳ васлини мўмин бандасига фақат нариги, боқий дунёда ваъда қилса, тасаввуф фоний дунёда ҳам маълум шарт-шароитда унга етишиш мумкинлигини ваъда қилди ва каломдан ташаббусни олиб қўйди.

Тасаввуф рух эркинлигига эришиш йўллари хақида мулоҳаза юритди. У ақлни ожиз, хиссиётни (ишқни) Оллоҳга етказувчи восита, деб эълон қилди. Албатта, каломнинг тасаввуфга етакчиликни бўшатиб беришининг бошқа ички метафизик (фалсафий) сабаблари ҳам бор. Улар орасида калом доирасида бир-бирига зид турли заиф мактаблар ва фирмаларнинг кўпайиб кетганлиги, баъзилари анча мутаассибликка мойил бўлганини назарда тутиш керак.

Ижтимоий тараққиёт, илм-фан, мамлакат ривожи, фаровонлиги эркин ва рационал тафаккур юритишга кўп жиҳатдан боғлиқ. Иррационал тафаккур, мавхум хилқатга интилиш, хәёлпарастлик алоҳида шахсни ўз наздида, субъектив тасавvuрида эркин ва бахтиёр қилиши мумкинdir, аммо жамиятни эмас. Инсоннинг қалб кечинмалари, эътиқодий туйғуси, руҳиятида ақл доирасига сиғмайдиган иррационал жиҳатлар, ботиний

шуур, қисқача айтганда, трансцендентлик тафаккурдан кам аҳамиятга эга эмаслигини кашф этиш ва кўрсатиш тасаввуфнинг улкан ютуғидир. Аммо фаноликка интилишда тафаккурни иррационал кечинмаларнинг тобесига айлантириб қўйиш ҳам бундай мураккаб масалага бир томонлама ёндашувдир.

Шундай қилиб, тасаввуф инсон эркинлигини ижтимоий амалиётдан, тафаккур эркинлигини жамият ва табиатни конкрет илмий тадқиқ этиш ва билишдан ажратиб, кўпроқ рухият, эътиқод, ишқ ва фано масалалари томон йўналтириди. Инсон қалбидаги Оллоҳни кашф этиб, у билан бирлашиб кетгандагина, ҳақиқий ўзлигини қайта топади, онги, тафаккури эркинликка кўтарилади. Тасаввуф рухият эркинлигини инсоннинг ўз имкониятларини юзага чиқариши ва унинг шахсияти юксалиши билан боғлаб эмас, балки Оллоҳни трансцендент кашф этиши ва факат руҳоний камолоти билан боғлаб тушунтиради.

Инсон эркинлиги унинг ҳаёт муаммоларидан ўз фикри-зиқрини, амалий фаолиятини имкон қадар ха-лос этиб, ўзини эркин ҳис этишда намоён бўлмайди. Инсон эркинлиги унинг факт субъектив кайфиятидан, ҳатто эътиқодидангина иборат эмас. Нари борса, субъектив кайфият ва эътиқод инсон эркинлигининг бир кўринишидир, баъзан реал мазмундан кўра, хаёлий мазмунга эга. Ҳаётнинг реал муаммоларидан, ўзини ўраб турган муҳит ва вазиятдан юз ўгирган, узоқлашган киши ўз экзистенциал ҳолатини ва эҳтиёжларини, уларни юзага чиқаришнинг объектив имкониятларини яхши англаб олмайди. Бинобарин, у холис ва ҳар томонлама фикр-мулоҳаза юрита олмайди, яъни эркин тафаккурга эга эмас.

Тасаввуфнинг етакчи позицияга чиқишида ижти-моий-сиёсий омиллар таъсири ҳам катта бўлганини таъ-

кидлаш жоиз. Айниқса, мӯғул истилоси, мӯғулларга қарши курашдаги бир неча авлод хаёти давомидаги муваффақиятсизликлар, зиддиятлар, кейинги тожтахт талашишлар, бу даврда ҳалқ оммасинийг ўта қашшоқлашиб кетиши, одамларнинг чорасизликдан ҳар хил мӯъжизаларга, хаёлий-мистик йўл билан ўзини овутишга интилиши ва ҳ.к.лар тасаввуф кенг тарқалишига ижтимоий негиз яратди. Юқорида таъкидланганидек, илк ислом олға сурган идеалларнинг ҳаётда юзага чиқмаганлиги, улар талқинининг одамларни қаноатлантирмай қўйганлиги, уларни иррационал, мажозий талқин қилиб, умматлар кўнглида янги умидлар уйғотиш эҳтиёжи ҳам тасаввуфга йўл очди.

Ҳар бир тарихий даврда иррационализмни озиқлантирувчи ижтимоий сабаблар етарли бўлади. Масалан, ҳозирги замон ғарб рационализми инқизори сабаблари орасида геополитик, сиёсий, ижтимоий-сиёсий сабаблар, XX асрда юз берган жаҳон урушлари ва янги термоядро уруши хавфи, ўша пайтлардаги икки тузум ўртасидаги зиддият ва бошқа шу каби сабаблар, демографик ва экологик муаммолар, илмий-техника тараққиёти вужудга келтирган жамият ва табиат, инсон ва жамият (ўзаро бегоналашувнинг ва айни пайтда боғлиқликнинг кучайиши) ўртасида зиддиятлар ҳам бор.

Юқорида қайд этилган сабабларни ички ва ташқи сабабларга бўлиш мумкин. Уларнинг ҳар бирини алоҳида таҳлил қилиш кўп вақтни олган бўлур эди. Биз бу ерда кейинги йилларда пайдо бўлиб, кучайиб бораётган икки ҳолат тўғрисида батафсилроқ тўхталишни лозим топдик.

Биринчидан, замонавий ғарб мамлакатлари қанчалик юксак ривожланиб, аҳоли турмуш даражасини оширмасин, тузумини «ҳалқ капитализми»га айлан-

тирмасин, барибир ички зиддиятларни, жамиятдаги бегоналашишни тўла бартараф эта олмади. Бу зиддиятлар бошқа бир кўринишда мудом юзага чиқмоқда. Демографик вазиятнинг кескинлашуви, аввало туб аҳоли ўртасида туғилишнинг кескин камайиб кетиши оқибатида ғарб мамлакатлари таркибида кексалар ва нафақаҳўрлар улушининг муттасил ошиб бораётгани ижтимоий тўловларни таъминлашда жиддий потенциал муаммолар туғдирмоқда. Шу ва бошқа сабаблардан ғарб мамлакатлари ўз иқтисодиётларига кўплаб муҳожирларни жалб қилишга мажбур бўлмоқдалар. Бу меҳнат ва капитал ўртасида зиддиятларни, бегоналашишни янгича шаклда юзага чиқармоқда. Бир тарафдан, муҳожирлар маҳаллий ахолига нисбатан меҳнат ва ижтимоий муҳофазада камроқ хукукка эга (нелегал муҳожирлар кўпинча умуман хеч қандай муҳофаза хукуқига эга эмас). Бу уларнинг турли даражадаги норозилигини келтириб чиқармоқда, келажакда йирик ижтимоий ларзаларга сабаб бўлиши эҳтимолдан холи эмас. 2005 йил охирида Париж шахри чеккалари ва остонасида африкалик муҳожирларнинг тартибсизликлари бундан далолат бермоқда. Бошқа тарафдан, муҳожирлар ва маҳаллий ишчилар ўртасидаги ракобат, маҳаллий ишчилар норозилиги, улар орасида миллатчилик ва шовинизм кайфиятининг кучайиши потенциал тарзда ижтимоий барқарорликка хавф туғдиради. Ўз иш ўрнини йўқотишдан, бинобарин, муносиб кун кечириш манбаидан маҳрум бўлишдан кўркиш ғарбнинг айрим оддий фуқароларида умидсизлик, келгиндиларга нисбатан нафрат кайфиятини озиқлантириб, уларни турли радикал, шу жумладан, ўта шовинистик ва неофашистик ташкилотларга киришига туртки бўлаётир. Бундай кайфият тафаккур тарзига иррационал унсурлар, миллатчилик васвасалари кириб кели-

шига ва ўрнашиб қолишига психологик шарт-шароит яратади.

Фарб мамлакатларида ижтимоий бегоналашининг янги шакллари вужудга келди ва тез суръатларда кескинлашмоқда. Масалан, мухожирлар ва маҳаллий аҳоли ўртасида, мухожирлар ва маҳаллий капитал, мухожирлар ва уларни қабул қилган мамлакатнинг давлат институтлари, давлат бошқаруви, фуқаролик жамияти институтлари, мухожирлар ва туб аҳоли менталитети, майший ва умуман миллий маданияти ўртасида ва ҳ.к. зиддиятлар ва бегоналashiш кучаймоқда. Бу рўйхатни узоқ давом эттириш мумкин.

Бегоналашувнинг ҳар қандай шакли мавжуд тузум тартибларига, институтларига, қадриятлари ва меъёрларига, уларнинг зарурлигига ва ҳаётга тўғри, оқилона жорий қилинганига нисбатан озми-кўпми ишончсизликни келтириб чиқаради. Бу эса мазкур тартиблар, қоидалар, қадриятлар, меъёрлар, институтлар санарадорлигини пасайтириб юборади. Бегоналашув, худди кўркув каби, иложсизликдан, чорасизликдан турли мўъжизаларга, сохта ғояларга, иррационал најжот усуллари ва йўлларига интилишни рафбатлантиради. Жамиятда ўғирликлар, жиноятлар, шаҳватпарастлик ва фаҳшга, алкоголизм ва наркоманияга ружу ошади. Фундаментал ахлоқий, эстетик меъёрлар, миллий анъаналар ва қадриятлар, жамиятнинг бирламчи асоси – оила инқирозга томон юз тута бошлайди.

Мазкур омиллар, бир томондан, фарб рационализми инқирозининг оқибати бўлса, иккинчи томондан – бу инқирозни озиқлантирувчи ва кучайтирувчи, унинг янги шаклларини келтириб чиқарувчи сабабдир, ижтимоий ва маънавий омилдир.

Бундай шароитда фарбнинг баъзи бир фундаментал ижтимоий-сиёсий, маънавий-маданий қадриятла-

ри, айтайлик, демократия ва инсон хукуклари, эътиқод ва сўз эркинлиги ҳам деформацияга учрамоқда. Мамлакат иқтисодий ва ижтимоий ҳаётида салмоқли ўринни эгаллайдиган мухожирлар, агар фуқароликни қабул қилмаган бўлса, давлат бошқарувида қатнашмайди (сайлаш ва сайланиш хукуқига эга эмас), юкорида эътироф этилганидек, ижтимоий муҳофазанинг кўпчилик турларидан маҳрумдирлар. Бошқача айтганда, ғарб мамлакатларида демократия ва инсон хукуқлари факат туб аҳоли учун мавжуд бўлиб қолмоқда. Эътиқод ва сўз эркинлиги эса баъзи ҳолларда жамиятнинг бирлашувига, консолидациясига эмас, балки диний ва этно-маданий жиҳатдан бўлинишига ҳам хизмат қилмоқда. Рационал, оқилона тузилган ғарб давлати тартиблари ҳозирги шароит талабларига ушбу масалада жавоб берга олмаётir.

Иккинчидан, дунёнинг икки қутбли бўлиниши туғаб, жаҳон ҳамжамияти таркибида чуқур ўзгаришлар юз бериши натижасида ғарб мамлакатларининг интеграциялашуви ва АҚШнинг дунё миқёсидаги гегемонлиги кучайди. Европа Иттифоқига, НАТОга янги аъзолар қабул қилинди, АҚШ томонидан дунёнинг турли минтақаларида анча-мунча агрессив сиёsat олиб борилмоқда. Янги худудлар АҚШ учун ҳаётий муҳим минтақалар деб эълон қилиниб, уларнинг ички ишларига турли баҳоналарда аралашибга, уларга тазийқ ўтказишга харакат бўлмоқда. Бундан ташқари, АҚШ, Европа мамлакатлари дунёнинг бошқа мамлакатларига ўзлари тушунчасидаги демократия ва бошқарув моделини, инсон хукуклари ва эркинликлари меъёрларини, ғарб турмуш тарзи ва анъаналарига мос фуқаролик жамияти институтларини турли йўллар билан тикиширишга уринмоқда. Ғарб демократияси, инсон хукуклари, фуқаролик жамияти институтларида, шуб-

ҳасиз, умуминсоний аҳамиятга эга бўлган, ўрганса арзийдиган жиҳатлар борлигини эътироф этган ҳолда, уларнинг барча халқлар, мамлакатларнинг тарихий хусусиятларига, маданияти ва замонавий ҳаётига, халқининг менталитетига тўлиқ мос келадиган универсал модели йўқлигини, бўлиши мумкин эмаслигини таъкидлаш зарур. Фарбнинг очиқчасига ёки ниқобланган зўравонлик сиёсати халқларни бир-биридан узоклаштиrmоқда, ривожланаётган мамлакатларда аксилгарбий кайфиятларни, маҳаллий миллатчиларни, реакцион кучларни фаоллаштиrmоқда, экстремизм ва терроризмнинг ижтимоий заминини кенгайтиrmоқда. Мўътадил, оқилона сиёsat юритиш, маданиятни, маърифатни юксалтириш тарафдорларининг ахоли ўртасида таъсири пасайшига, жамият тафаккурида муросасизликка мойиллик ортишига сабаб бўлмоқда.

Инсоният ҳаёти, ижтимоий тараққиёт маданиятлар ранг-баранглиги, ижтимоий тажрибалар, фикрлар, қарашлар, қадриятлар бойлиги билан истиқболли, казармача бир хиллик билан эмас. Бу казармача бир хиллик коммунистик ақидапарастликка асосланадими ёки Бушга ўхшаш фарб сиёsatчилари томонидан соҳталаштирилган, нотўғри талқин қилинган либерализмга асосланадими – бунинг аҳамияти йўқ. Халқаро алоқаларда мувозанатнинг бузилиши, АҚШ гегемонлиги ва ҳатто ўзининг энг яқин иттифоқчилари билан тобора кам ҳисоблашаётгани (гап Бушнинг нозик сиёsatга нўноқлиги ва иттифоқчиларини менсимаслигига эмас, балки вужудга келган тенденцияда), Европа Иттифоқининг, НАТО нинг кенгайиши фарб мамлакатлари ўзларининг ўртасидаги зиддиятларни кўпайтиrmоқда. Бошқа томондан эса, фарб мамлакатлари ва ривожланаётган мамлакатлар ўртасидаги зиддиятларни кучайтиrmоқда. Фарб сиёсий ва иқтисо-

дий экспансиясининг, тазиқининг авж олаётгани ҳамда Иккинчи жаҳон урушидан кейин вужудга келган мінтақавий муаммоларнинг ечилмасдан келаётгани (Ҳиндистон–Покистон, араб мамлакатлари – Исроил, Шимолий ва Жанубий Кореялар, XX аср охири ва XXI аср бошида пайдо бўлган Афғонистон ва Ироқдаги ички қарама-қаршиликлар, Африка қитъасидаги этник-миллий ва мінтақавий можаролар) қатор давлатларнинг ядро қуролини яратишига сабаб бўлди, баъзи бирларини бунга унダメмоқда. Мінтақавий ва ички этник тўқнашувлар, можаролар қурол-яроғ билан ноконуний савдо-сотикни авж олдирди. Бу эса ҳам иқтисодий ночор мамлакатлар ахолисининг турмуш даражаси ўсишига жиддий зарар етказмоқда.

Ҳокимияга интилаётган турли ўзаро душман кучлар, доиралар қурол-яроғ харид қилиш учун яширинча наркотиклар сотишни, ички ва халқаро терроризми зиддан қўллаб-куватламоқда.

Ҳозирги замон халқаро терроризми ҳамда ислом мамлакатларида диний экстремизмнинг ривожланишида АҚШ ва гарб давлатларининг ноқилона неоколониалистик сиёсати, ўзларига маъқул бўлмаган режимларга қарши курашда ҳар қандай ички «оппозицион» кучларни, шу жумладан, террористик ва бошқа сиёсий радикал гурухларни қўллаб-куватлагани ҳам маълум роль ўйнагани шубҳасиз. Ўз вақтида АҚШ ва собиқ СССРнинг, икки ижтимоий-сиёсий тизимнинг қарама-қаршилиги ва кураши жараёнida жаҳон миқёсида ҳар икки томон кўплаб халқаро террористларни ва ўта радикал гурухларни тайёрлаган эдилар. Эндилика бундан бутун инсоният азият чекмоқда.

Бугунги кунда мінтақавий можаролар, халқаро терроризм, диний экстремизм халқлар, мамлакатлар ўртасида ўзаро ишонч мустаҳкамланишига халақит бериб

қолмасдан, баъзи ҳолларда иқтисодий, маданий алоқаларни, ҳамкорликни издан чиқармоқда, оддий кишилар кўнглига фулғула, кўркув солмоқда.

Ишончсизлик, шубҳа, кўркув, хавфсизликка таҳдид, ҳалқаро меҳнат тақсимотида ва савдо-сотиқдаги адолатсизлик, неоколониалистик хавф, турли мамлакатларга муносабатларини белгилашда АҚШ ва айрим ғарб давлатлари томонидан қўлланилаётган икки хил стандартларга асосланган ёндашувлар баъзи ривожланаётган давлатларда ички демократия чекланишига, бошқарувда авторитаризм кучайишига хизмат қилмоқда. Буни у ёки бу даражада ҳалқаро иқтисодий санкцияларга мубтало бўлган давлатларнинг барчасида кузатиш мумкин. Бинобарин, собиқ социалистик мамлакатлар мустақил демократик тараққиёт йўлига ўтиб олгач, уларда гўёки ўзгаришлар суръатларидан, инсон хуқуклари таъминланиши борасидаги ишлардан, аслида эса уларнинг нисбатан мустақил ички ва ташкиси ёки сиёсатидан қониқмаган ғарб доиралари турли билвосита усуllibар билан (жамоат ташкилотлар орқали) «рангли инқилобларни» ўюнтиридилар ва қўллабкуватладилар. Шу каби хатти-харакатлар, шубҳасиз, мамлакатлар ва ҳалқлар ўртасида ўзаро ишончга салбий таъсир қилмоқда. Айни пайтда қайд этилган муаммолар, нохуш омиллар ғарб қадриятларидан, ғарб рацонализмидан нафақат ноғарбий мамлакатлар ахолисининг, шунингдек, ғарб ахолисининг салмоқли қисмининг юз ўгиришига, иррационал ва турли хил радикал ғояларнинг, шу жумладан экстремистик, террористик ғояларнинг, мафкуравий мутаассибликнинг тарқалишига маълум даражада сабаб бўлмоқда.

Юқоридаги сабаблар қаторига, шунингдек, қашшоқ мамлакатларда очарчилик, эпидемиялар, барча мамлакатларда тез ўсиб бораётган ОИТС, гиёхванд-

лик, ичкилиқбозлик, иқлиминг глобал исиб кетиш хавфи ва йилдан-йил кўпайиб бораётган табиий оғатлар, иссиқ миңтақаларда қурғоқчилик, мўътадил миңтақаларда сув тошқинларини қўшсак, хозирги замон кишисининг тафаккури қай даражада салбий омиллар босимига дуч келаётганини англаймиз. Булар, албатта, тафаккурнинг иррационал йўналиш томон бурилишига туртки бўлади.

Иррационализмнинг оламни билиш билан боғлиқ сабаблари эса ҳеч қачон тугамайди. Улар орасида бош сабаб – инсон ақли ва билимларининг тарихан чегараланганидир. Коинот, табиат, жамият, инсон ички дунёсидаги ва руҳий кечинмаларидағи турли ҳолатлар, ҳодисалар борки, уларни инсон тафаккури, мавжуд билимлари охиригача тўлиқ тушунтириб беролмайди. Лекин инсон тафаккури шундай тузилганки, оламни яхлит, тугал манзарасини яратишга ҳаракат килади. Натижада у етишмаган билим ва тасаввурлар ҳалқасини турли фаразлар, эҳтимоллар, ўзи ўйлаб топган фантастик тасаввурлар ёрдамида тўлдиради. Бу фаразлар баъзан иррационал, мистик мазмун касб этади. Айниқса, инсонга сирли, мўъжизали бўлиб туялган нарсалар моҳияти, сабаблари ҳақида мулоҳаза юритилганда, иррационализмга, мистикага мойиллик кўпроқ юзага чиқади.

Инсон онгига, тафаккурига хос яна бир муҳим мойилликни таъкидлаш жоиз. Инсон ўлим билан, ўз умрининг ўткинчилиги, вақтинчалиги билан келиша олмайди. Жисмоний ўлим билан инсон ҳаётининг тўлиқ барҳам топиши, унинг назарида, ҳаётини оқибат мақсаддан, маънидан жудо қилади. Дин бу зиддиятни енгиб ўтишда инсонга ёрдам беради. Руҳнинг абадийлиги, нариги дунёда уни ердаги ҳаётидаги ишлари, хулқ-автори туфайли мукофот ёки жазо кутиб тури-

ши (хиндуизмда инкарнация – бошқа шаклда давом этадиган ҳаёти қандай бўлиши) инсоннинг ердаги ҳаётига мақсад ва маъни бағишлайди. Лекин инсон ҳаётининг мақсади ва маъниси ҳақида фикр юритувчи шундай кишилар борки, уларни диний таълимотлар тўлиқ қаноатлантирумайди. Улар масаланинг моҳиятига янада чуқурроқ кириб боришга интиладилар. Натижада гўёки диндан ҳам устун турган, илм-фан ва диндан ҳам ҳақиқатга яқинроқ теософик қарашлар, мўъжизавий Шамбалага ишониш каби туйғулар вужудга келади.

Иrrационализмга ва мистикага мойиллик инсон табиятига хос мўъжизага интилишдан, бир хилликдан, турмуш тарзидаги андоза ва қолиплардан, жилла курса, ҳаёлан қутулиш, ўз фантазияларига, орзу ва ҳавасларига эркинлик бериш истагидан ҳам келиб чиқади. Бу айниқса бадиий ижод билан шуғулланувчи шахсларда ёрқинроқ намоён бўлади.

Жамиятда кескин бурилишлар юз берадиганда теософик, парапсихологик, спиритуалистик «мўъжизаларга», уйдирмаларга қизиқиш ҳатто айрим ўқимишли зиёли кишиларда жонланади. Улар сидқидилдан, самимий равишда бундай «мўъжизаларга», уйдирмаларга ишона бошлайдилар. Ўзларини оқлаш (аниқроғи, юпатиш) учун эса «далил» тайёр: «Ахир биз билмайдиган нарсалар бор-ку! Биз дунёнинг барча сирларини кашф этиб тугатганимиз йўқ-ку. Бизга афсона, мўъжиза бўлиб туюлган нарса, авлодларимиз учун оддий ҳодисага айланар...» ва ҳ.к.

Тарихий бурилиш даврида аслида рационализмга объектив зарурат кучаяди, чунки аввалги тузум қадриятлари қайта баҳоланиши, камчиликлари танқид қилиниши лозим. Аммо амалда кўп ҳолларда индивидуал онг даражасида бу зарурат яхши англаш олин-

майди. Маданий мероснинг унчалик кенг ўрганилмаган ёки маълум сабабларга кўра (масалан, ғоявий жиҳатдан аввалги тузумга, сулолага маънавий-маданий ҳаётдаги, мафкурадаги хукмрон оқимга, тариқатга тўғри келмаган), етарлича тарғиб этилмаган қисмига, тақиқланган асарларига, таълимотларига қизиқиш ошади. Улар кенг тарғиб этила бошлайди, уларнинг аҳамияти баъзан ортиқча баҳоланиб юборилади, ҳархолда, уларга нисбатан изчил ва холис танқидий муносабат доимо ҳам кузатилавермайди. Бутун маданий меросга ўтиш давридаги муносабат ҳақида ҳам шундай дейиш мумкин. Унинг айрим асарлари, ғоя ва тамойиллари аҳамияти оширилиб юборилиши, айримлариники (одатда, ўзгартирилган тузум даврида пайдо бўлганлари) пасайтириб юборилиши, ҳатто инкор қилиниши мумкин. Тарихий бурилиш даврида келаҗакка доир режаларда баъзан «романтик» кайфиятлар намоён бўлиб қолади. Тузумнинг ўзгариши гўёки барча муаммоларнинг осон ҳал қилинишига олиб келади. Аввалги тузум исканжасидан қутулган ҳалқ гўёки ўз-ўзидан улкан бунёдкорлик салоҳиятини, куч-файратини – ақл заковатини, омилкорлигини, меҳнатсеварлиги-ю ташаббускорлигини намоён этади. Теварак-атрофдаги аксарият қўшнилар ва бошқа давлатлардан хайриҳоҳлик ва амалий ёрдам келиши кутилади. Ички қийинчиликлар, эски кучларнинг зимдан ёки ошкора қаршилиги, аксарият омманинг ижтимоий инертилиги, бефарқлиги эсдан чиқарилади ёки яхши ҳисобга олинмайди. Эйфория (ғалабадан мастилик) улкан, оламшумул, жозибадор лойиҳаларни олға суришга туртки беради. Лекин янги ҳокимият кўпинча бу лойиҳаларни моддий ва молиявий ресурслар, амалга оширадиган мутахассислар ва кадрлар билан таъминлаш, жамиятнинг иқтисодий организми ҳамда

омманинг онги бу янгиликни қабул қилишга тайёр эканлигини тўлиқ ҳисоб-китоб қилмайди. Ахир романтик кайфиятнинг кўтаринкилиги, рухий парвози олдида ердаги ҳаётнинг «зерикарли прозаси», муаммоларга тўла кўримсиз реализми кимга хам керак?! Эйфория маълум даражада иррационал унсурларни туғдиради.

Тафаккурнинг иррационал мазмун касб этишига жуда кўп бошқа сиёсий ва ижтимоий омиллар хам таъсир кўрсатади. Ижтимоий зўравонлик, зулм, ижтимоий қўркув, улар натижасида ҳосил бўлган номукаммаллик туйғуси (шу жумладан колониализм, миллий қарамлик шароитида миллий номукаммаллик туйғуси), ижтимоий турғунлик, хукмрон мафкуранинг мавжудлиги ва доктринализмга, мутаассибликка асосланиши, ишлаб чиқариш ва иқтисодиётни бошқаришда волюнтаризмга, адолатсизликка йўл қўйиш ва шу каби омиллар иррационализмни озиқлантиради.

II

Иррационализм ёки рационализмнинг тафаккурда етакчилик қилишига таъсир кўрсатувчи сабабларнинг айримлари тўғрисида батафсилроқ гапириш мақсадга мувофиқ.

Рационализм ривожланишида иқтисодий ҳаётдаги ўзгаришлар туфайли амалий тафаккурнинг мазмунан ва шаклан бойиши катта роль ўйнаган. Амалий тафаккур энг қадим замонларданоқ инсоннинг яшаш учун кураши заруратидан келиб чиқиб ривожланган. Аввалио меҳнат қуроллари ясаш ва такомиллаштириш, овқилиш, озиқ-овқат учун яроқли ўсимликларни топиш, ўзини ҳимоя қилиш қадимги аждодларимиздан ақл билан иш тутишни талаб қилган. Инсон тараққиёти-

нинг турли босқичларида амалий тафаккурда рационал унсурлар кўпайиб бораверган.

Рационал тафаккур ривожланишини тақозо этган ижтимоий-тариҳий омилларнинг энг қудратлиларидан бири – бу шаҳарларнинг вужудга келиши эди. Нисбатан тор жойда турли маҳаллаларнинг жойлашуви одамлар ўртасидаги муносабатларни қатъий қоида ва меъёрлар ёрдамида тартибга солишни, аҳолининг хавфсизлигини таъминлашни, юқумли касалликлар тарқалишининг, ичимлик суви ифлосланиши ва очликнинг олдини олишни талаб қилас. Эди.

Булар шаҳарни мудофаа девори билан ўраб олинишига, шаҳарни бошқарувчи ҳоким ва унинг маъмуриятини сайлашга (тайинлашга), қатъий қоида ва меъёрлар кодекси (қонунлар) яратиб, улар асосида маҳаллалар, касб-хунарлар, фуқаролар ўртасидаги алоқаларни, майший турмушни оқилона ташкил этишга ҳамда шаҳарнинг ташқи савдо ва бошқа алоқаларини тартибга солишга олиб келди. Аҳоли ихтиёрий равиша белгиланган қоидаларга, қабул қилинган қонунларга риоя этган. Кимки истамаса, шаҳарни ташлаб кетишига мажбур бўлган ёки қувғин қилинган, жазоланган. Бундан ташқари, ҳар бир фуқаро, оила, шаҳар олдида маълум мажбуриятларни адo этган: шаҳар деворларини таъмирлашда ҳашарда қатнашган ёки моддий жиҳатдан қўллаб-кувватлаган, ёв ҳужум қилганда мудофаада қатнашган, шаҳар маъмуриятини, доимий қўриқчиларни, ибодатхонани ва руҳонийларини сақлаш учун солик тўлаган ва ҳ.к. Шаҳарда сувдан (кудуқдан, ховуздан, ариқдан) фойдаланишнинг қатъий қоидалари ўрнатилган. Улар орасида санитария қоидалари мухим ўрин эгаллаган. Илк давлатлар катта худудларда эмас, айнан шаҳарларда «шаҳар-давлат» шаклида пайдо бўлди. Чунки бирданига катта худудда яшовчи турли

уруг ва қабилаларни ягона қонун-қоидалар асосида бирлаштириш, давлат идораси ва қонунига бўйсундирин қийин эди.

Шахар ахолиси эса турли тажовузлардан сақла-ниш, ишлаб чиқарилган хунармандчилик, қисман дех-қончилик ва бошқа маҳсулотларни келишилган қатъий нархларда сотиш, умуман оиласи ҳаётини таъминлаш учун ўзининг умумий манфаатини тезроқ англаб олиш имконига эга эди.

Давлатнинг вужудга келиши қонунчиликни, ҳарбий илмни, давлат мафкурасини, амалдорлар, зиёлилар, ақлий меҳнат билан шуғулланувчилар қатлами-ни вужудга келтирди. Аҳолини шаҳарнинг қонун-қоидаларига, талабларига, умумий диний эътиқодига ўрга-тиш зарурати профессионал руҳонийлар, тарбиботчи-лар, судьялар бўлишини тақозо этди. Амалдорларни, судьяларни, қонунчиларни ўқитиши, тарбиялаш керак эди. Бу ҳамда хунармандларни ҳом ашё билан таъминлаш, тайёр маҳсулотларни сотиш масаласи ҳам тегишли мутахассисларга эҳтиёж туғдирди. Давлатга бошқарувчилар, амалдорлар, ҳарбийлар, қурувчилар, меъморлар, олимлар, ўқитувчилар, санъаткорлар керак эди. Давлат бўлажак мутахассисларни етиштириш ва ўз шаҳрига, халқига содиклик руҳида тарбиялаш учун маҳсус ўқитиши тизимини яратди.

Натижада таълим-тарбия соҳаси, илм-фан, медицина, санъат, адабиёт, фалсафа ва илоҳиёт ижтимоий фаолиятнинг алоҳида шакли сифатида вужудга келди ва ривожланди. Назарий тафаккур амалий тафаккурдан ажралиб чиқди.

Тафаккур тараққиётининг кейинги босқичларида ҳам аҳолининг зичлиги, ўзаро ички муносабатлари интенсивлиги, турмуш тарзининг шахар турмуш тарзи-га яқинлиги унда рационал ва иррационал унсурлар

нисбатига, ривожланишига таъсир кўрсатиб турди. Масалан, Европада XVI–XVII асрлардан шаҳарлар тез ривожланиши, ахоли зичлиги ўзаро муносабатларни тартибга солишда қонун меъёрлари ролини кучайтириди, ахоли тафаккурида рационал унсурлар кўпайишига хизмат қилди. Табиий иқлим шароити дехқончиликка ёки яйлов чорвачилигига унчалик қулай бўлмаган Европа ҳудудларида меҳнат қуролларини такомиллаштиришга, ҳунармандчиликни ривожлантиришга эҳтиёжни кучайтириди. Бу борада амалий ва назарий изланишлар олиб борилдики, рационал тафаккур ўсишининг омиллари мустаҳкамланди. Лекин бу омилни жўн тушунмаслик керак. Иқлим дехқончиликка, ишлаб чиқаришни ривожлантиришга умуман нокулай бўлса (масалан, Чекка Шимол ва унга яқин ҳудудлар), у ерда ахоли сони ҳам ўсмайди, шаҳарлар ва йирик қишлоклар ҳам вужудга келмайди. Сийрак ахоли овчилик ва чорвачилик билан машғул бўлиб қолаверади. Иқлим шароити дехқончиликка анча қулай ҳудудларда эса, маълум бир даражага эришилгач, изланишлар сусайиб кетди. Шарқ ва Фарб таракқиёти ва тафаккуридаги тафовутларнинг жузъий сабабларидан бири географик омилdir.

Жамият юксалиши жараёнида тафаккур тарзига иқтисодий омиллар ишлаб чиқариш, тақсимот, алмашув ва ҳ.к. таъсири ортиб борди. Меҳнат қуролларини, ишлаб чиқариш технологияларини такомиллаштириш зарурати табиатшуносликни, техникани ривожлантиришни, улардан унумли ва оқилона фойдаланишни тақозо этади. Бу ўз навбатида рационал тафаккур ривожланиши учун объектив заруратни туғдиради. Лекин ишлаб чиқарилган маҳсулотлар адолатли ва объектив мезонлар асосида тақсимланмаса, савдо-со-тиқ (алмашув) адолатсиз бўлса, тафаккурда иррацио-

нал унсурлар сакланиб қолади, ҳатто кўпаяди. Одамлардаadolat ва ҳақиқат қарор топиши мумкинлиги га ишонмаслик,adolatli қаттиққўл доҳийга интилиш (доҳийпарастлик), шахсга сифинишга мойиллик ортади. Тақсимотда, савдо-сотикда қатъий тартиблар ўрнатилмаса, айтайлик, жамият бир иқтисодий тузумдан иккинчисига ўтаётган бўлса, эски тартибларга одамлар риоя қилмай қўйса, янгилари ҳам кучсиз бўлса, жамият аъзоларининг баъзи бир қисми психологиясида ҳар қандай йўл билан бойлик орттириш – «олтинга малъун эҳтирос» авж олади ва мустаҳкамланади.

Европада крепостной тузум хукм сурганда, таксимотда тенгсизлик омма онгида иррационализмни, жаҳолатни озиқлантириб турди. Дастребки капитални жамғариш ва «ёввойи капитализм» даврида мижозларини ва шерикларини алдаш хисобига ортиқча фойда олишга ҳаракат килганлар анча-мунча бўлган. Умуман бойликка хирс ва қаллоблик барча жамиятларда ҳам маълум кишилар учун хос бўлса-да, жамиятда иқтисодий тузум ўзгараётганда, эски тартиблар, қоидалар, муносабатлар бузилиб, янгилари ўрнатаётганда осонлик билан бойлик орттириш йўллари пайдо бўлади. Бундан кимдир қонуний фойдаланса, кимдир ноқонуний фойдаланади, яъни қаллоблар сони анча кўпаяди. Янги тузумда, янги шароитда бой бўлиб қолишни истаганлар ва шунга интилганлар сони эса сезиларли ортади. Ўтиш даври фукароларнинг бир қисмида иқтисодий фаолликни рағбатлантиради.

Феодализмдан капитализмга ўтиш даврида бундай ҳолат деярли барча мамлакатларда кузатилган, бугун эса хусусий мулкчиликни ривожлантираётган, бозор иқтисодиётини жорий қилаётган собиқ социалистик

мамлакатларда ҳам учрамоқда. Аммо аҳолининг ҳам, тадбиркорларнинг ҳам аксарияти учун ҳеч қачон бойлика ноқонуний интилиш, фойда олиш хирсига мукасидан кетиш хос бўлмаган.

Европада тафаккур рационаллашувига рақобат ҳам кучли таъсир кўрсатди. Энг аввало бу борада ишлаб чиқариш харажат ва даромадларини калькуляция қилиш заруратини эслаш керак. Маҳсулот ишлаб чиқаришга сарфланадиган харажат: хом ашё, бутловчи қисмлар, ёнилғи, транспорт хизмати, иш ҳақи (агар четдан ишчи ёлланса) ва ҳ.к. ҳамда солик ва тўловларга кетадиган харажат маҳсулот баҳосида тўла қопланиб, хунарманд оиласи эҳтиёжларини қоплаши зарур. Натурал ва яримнатурал хўжалик юритадиган деҳқон ёки бошқа касб эгалари учун ишлаб чиқаришни аниқ калькуляция қилиш, уни муттасил рационаллаштириш шарт эмас. Аммо факат биргина касби орқали рўзгорни боқадиган, бошқа қўшимча даромад манбаи бўлмагай шаҳарлик хунарманд учун бу жуда муҳим. Ёлланма ишчи учун эса рўзгор харажатларини аниқ ҳисоб-китоб қилиш, тежамкорликка интилиш – ҳаётий зарурат.

Рақобат шароитида мануфактуралар, кейинчалик цехлар ва фабрикалар пайдо бўлиши ишлаб чиқаришда калькуляция аҳамиятини, сарф-харажатларни камайтириб, технологияни, ишлаб чиқаришни узлуксиз такомиллаштириш эҳтиёжини оширади. Айнан худди шу омил оқибатда илм-фан ва инженер-техник зиёлилар капиталистик халқ хўжалигининг муҳим таркибий қисмига айланишига олиб келди. Мазкур омил назарий тафаккурда ҳам рационализм мавқеи мустахкамланишида қўшимча ижтимоий-иктисодий замин вазифасини ўтади, умумтаълим ва мутахассислар тайёрлаш тизимини муттасил такомиллаштириб борди.

Шундай қилиб XVII–XVIII асрларда товар ишлаб чиқариш ва шаклланаётган эркин бозор талаблари, рақобат, шу жумладан, ишчи ва мутахассислар ўтасидаги рақобат ғарб аҳолисининг амалий тафаккурини аста-секин рационаллаштириб юборди. Ўз навбатида рационал тафаккур товар ишлаб чиқаришнинг ва ғарб иқтисодиёти ривожланиши учун интеллектуал замин вазифасини ўтади. Ғарб маърифатпарварлари ва ишбилармонлари, арбоблари буни тез англаб олдилар ва ҳётга, меҳнатга рационал ёндашувни тарғиб этдилар.

Далил сифатида АҚШнинг дастлабки маърифатпарварларидан, миллат асосчиларидан бири Бенжамин Франклин асарларидан бир неча парча келтирмоқчимиз:

«Унутма, вақт пулдир»... «Агар сен ақлли ва ҳалол киши сифатида танилсанггина, йиллик 6 фунт фоиз хисобига фойдаланиш учун 100 фунт қарз олишинг мумкин. Кимdir кунига 4 пенс чақани бекор сарфласа, у бир йилда бесамар 6 фунтни йўқотади, бу эса 100 фунтдан фойдаланиш хукуқининг баҳосидир. Кимdir кунига 4 пенс қийматидаги вақтини йўқотса, майли у бор-йўғи бир неча минутни ташкил этсин, у жами кунлар йиғиндисида бир йилда 100 фунтдан фойдаланиш имкониятини бой беради».

«Унутма, кредит пулдир»... «Мақолни эсда тут: кимки вақтида тўласа, унга бошқаларнинг ҳамёни очикдир. Белгиланган муддатда аниқ ҳисоб-китоб қиласидан киши дўстларидан истаган пайтда уларга зарурлиги сезилмай турган пулларини қарзга олиши мумкин». «Шу боис олган қарзингини белгиланган муддатдан бир соат ҳам ортиқча кечиктирма». «Қўлингдаги барча нарсани ўзингники деб билишдан ва шунга мувофиқ яшашдан эҳтиёт бўл. Кредит манбай бор кўпчилик

кишилар ўз-ўзини алдаш тузоғига тушади. Буни чет-
лаб ўтиш учун ўз ҳаражатларинг ва даромадларингни
аниқ ҳисоблаб бор...»

Халол ва меҳнатсевар бўлишни дин ҳам одамлар-
дан талаб қилган. Халоллик ва меҳнатсеварлик – са-
воб, Худога маъқул. Ноҳалоллик ва текинхўрлик –
увол, гуноҳ. Диний тарбия негизида потенциал тарзда
қўрқитиш яширин (гуноҳкорларнинг ўрни – дўзах).
Аммо инсоният бутун умри давомида қўрқувда яша-
ши ва меҳнат қилиши мумкин эмас. Қўрқув оқибатда
хаётга, меҳнатга иррационал муносабатни шакллан-
тиради. Бенжамин Франклин халоллик – фойдали,
яхши яшашинг, кредит олишинг, бойишинг учун
меҳнатсеварлик қаторида энг зарур фазилат деб ҳисоб-
лайди. Ноҳалоллик – зарар. Ҳеч ким сенга ишонмай-
ди, кредит бермайди. Бундай ёндашувда қўрқувга на
бевосита, на билвосита ўрин бор. Тарбия асосига хаётга
ва меҳнатга рационал муносабат қўйилган.

Шарқ мамлакатларининг XVI–XIX асрларда та-
ракқиётда ортда қолиб кетишининг ижтимоий-икти-
содий ривожланиш тақозо этадиган дунёкараси билан,
хусусан рационал тафаккур юритишнинг ортда қоли-
ши билан боғлиқ томонларини жамият хаётининг ҳар
бир соҳаси бўйича таҳлил қилиш ва ишонарли далил-
лар келтириш мумкин. Лекин М. Вебердан биттагина
иктибос келтирил билан чекланамиз: «Турфа хил олий
ўкув муассасалари, жумладан, бизнинг университет-
ларимиз ва академияларимизни шаклан эслатувчила-
ри ҳам турли ҳалқларда мавжуд бўлган (Хитой, ислом
мамлакатлари). Лекин замонавий ўзига хос мазмун-
даги рационал ва систематик, яъни профессионал ил-
мий фаолият ва мутахассис олимлар факат гарбдаги-
на маълумки, уларнинг мутахассис-хизматчи сифати-
да мазкур маданиятда ҳукмрон мавқеи, энг аввало,

замонавий ғарб давлати ва замонавий ғарб иқтисодиётининг таянчи бўлиши кўзда тутилади»¹.

Вебер ижтимоий ҳаётнинг бошқа соҳаларига ҳам шунга ўхшаш ҳолат хос бўлганини таъкидлайди.

Фарбда ижтимоий муносабатлар шу даражада рацоналлашган ва объективлашганки, улар алоҳида шахс, жамоа ҳоҳиш-иродасидан, кайфияти ва мойилликларидан, дидидан, урф-одатлардан, майший мазмундаги одамгарчиликдан устун туради. Масалан, хизмат бурчини бажараётган давлат амалдори фақат ўзининг хизмат Низомига, қонунга, юқори мансабдор берган буйруқقا (бу ҳам низомда белгиланган) бўйсунади. Унинг хизмат бурчини бажаришида ҳар қандай таниш-билишчиликка, кўнгилчанликка йўл қўйиши тақиқланади. Унинг хизмат обрўси кўпроқ шахсий фазилатлари билан эмас, балки йўриқнома ва низомга биноан аниқ ва тез ҳаракат қила олиши, шахсий хисэхтиросдан устун бўла олиши билан белгиланади, яъни унинг функционал (хизматчилик) хислатлари инсонийлик фазилатларидан устун ҳисобланади.

Жамиятнинг давлат хизматчиларига бундай талаб қўйиши турли ўзбошимчаликларнинг, нуфузли амалдор ва шахслар илтимоси, талаби ёки турли найранглари жамиятдаги қонунлар ва тартиблардан устун бўлиб кетишининг, субъективизм ва волюнтаризмнинг олдини олишда фойдалиdir. Лекин яйни пайтда мансабни сунистъемол қилишнинг, бирократизмнинг, бегоналашишнинг кучайишига хизмат қиласи (Шарқда бунга тескари манзарани бъязан, ҳозир ҳам кузатиш мумкин). Хизмат вазифасини ўтаётган кишига «ҳа, энди ўзингиздан қолар гап йўқ, мумкин бўлмаса ҳам,

¹ Вебер М. Избранные произведения. М., «Прогресс», 1990 г., с. 46.

бир иложини топинг» қабилида мурожаат этаётгандар учраб туради. Бунинг сабабларидан бири Шарқда узок вақт амалдор ва лавозим, амалдорнинг хизмат вазифалари (бурчи) ва уни бажариш борасидаги хатти-харакати бир-биридан ажратилмаган, яъни объективлашмаган. Лавозим ва давлат хизмати персонификациялаштирилган. Омма онгида «бу нарса мумкин, чунки қонуний, буниси ноконуний, демак мумкин эмас» деган тушунча эмас, «амалдор истаган нарса қонуний, мумкин, истамаган нарса ноконуний» деган тушунча ўрнашиб қолган). Бюрократлашиш ва бегоналашишга қарамасдан, рационаллашиш ва объективлашиш ривожланган ғарб мамлакатларида оқибат натижада ҳукуқ ва давлат бошқарувини барча синфлар, табакалар ва қатламлардан ҳам, алоҳида шахсдан ҳам устун қилиб қўйди ва фуқаровий жамият асосларини шакллантирди.

Бизда эса мустамлакачилик давригача ўрта асрларда қарор топган эски қоидалар ўзгармай турди, чунки саноат ишлаб чиқариши оиласвий хунармандчилик дарражасида қолиб кетди, шу сабаб мануфактуралар, йирик цехлар, фабрика, заводлар вужудга келмади. Инженер-техник ходимлар, бошқарувчи ва ҳисоб-китоб юритувчи бухгалтерлар, шу каби мутахассислар иқтисодиёт, ишлаб чиқариш тақозо этадиган алоҳида ижтимоий қатлам сифатида шаклланмади.

XI асрда Хоразмдаги Маъмун академиясидаги, XV асрда Самарқанддаги Улуғбек мадрасаси (университети) ва расадхонасидаги олимлар профессионал илмифан билан шуғулланувчи кишилар эдилар. Лекин улар ижтимоий қатлам сифатида мамлакат ҳалқ ҳўжалигининг зарурий таркибий тузилмасига айланмаган, уларнинг ўрни ва ижтимоий функцияси иқтисодий тузумнинг хусусиятидан келиб чиқмас эди. Маърифатпар-

вар подшоҳ таҳтга чиқса, бундай тузилма пайдо бўлиб қолар, подшоҳ таҳтдан тушса, издошлари унинг бу борадаги ишини давом эттирмаса, профессионал илмий тадқиқот аста-секин унутиларди.

Бугунги кунда жамиятимизнинг таркиби тузилмаси, давлат бошқаруви тизими, ишлаб чиқаришни, ижтимоий ҳаётни, илм-фанни, ҳалқ таълимини, оммавий ахборот воситаларини ва ҳ.к.ларни ташкил этиш шакллари замонавий, яъни рационал ва объектив. Албатта, ўзининг ички хусусиятларига, миллий ўзига хос жиҳатларига, бошқалардан бироз фарқ қиласидан баҳоларига, меъёrlарига, идеалларига ва бошқа қадриятларига эга. Аммо бу фарқлар, ўзига хослик хам рационал мазмун касб этган. Халқимизнинг саводхонлиги, билим даражаси ва маданий савияси, ижодкорлик, бунёдкорлик салоҳияти фарб мамлакатлари халқлариники билан кўп жиҳатдан таққослаши мумкин.

Лекин биз кўлга киритилган ютукларни, салоҳиятни пасайтириб юбормаслигимиз, аксинча, янада ривожлантишимиз шарт. Табиийки, мустақиллик туфайли аввалги қадриятлар қайта баҳоланмоқда. Мана шу жараёнда жуда эҳтиёткорлик билан иш тутиш лозим. Чунки дунёқараш, эътиқод масаласи – ўта нозик масала. Биз авлодларнинг табиий алмашуви жараёнида ёшлар онгига миллий маҳдудлик, мафкуравий мутаассиблик унсурлари, иррационалистик қарашлар, хурофот иллатлари, консерватив, қолоқ анъанавийлик меъёrlари, тамойиллари илашиб, кириб қолиши хавфининг олдини олишимиз зарур. Баъзан қўринишдан безарап, ҳатто одамгарчиликнинг бир белгиси бўлиб туюладиган айрим ҳоллардаги бозордаги оддий хизматчининг кўнгилчанлиги, кимнингдир илтимосига ён босиб, ўзини тартиб-коидаларнинг бузилишини кўриб

кўрмаганга солиши жамиятга, бошқа кишиларга қанча зарар етазиши мумкин. Биз одамгарчиликни эъзозлаган ҳолда, қонунга, тартибга қатъий амал қилиб яшашни, сохта одамгарчиликдан кўнгилчанлик қилиб, кимнингдир ҳожатини чиқариб, бошқаларга зарар етказишдан ҳақиқий одамгарчиликни фарқлашимиз керак.

Рационал тафаккурни ўстириш катта авлоднинг аксариятига хос миллий номукаммаллик туйғусидан халос бўлишни, ёш авлодда у ҳеч қандай кўринишда ва шаклда қайта вужудга келмаслигига эришишни тақозо этади. Бунинг учун биринчи навбатда биз ривожланган мамлакатлар қаторига кўтарилишимиз, колоқлик ва қашшоқликни бартараф этиб, ҳеч кимдан амалда кам бўлмасликни таъминлашимиз керак. Ҳар бир соҳада эришган ютуқларимиз замон талабларига мос бўлиб, одамларимизда ҳаққоний миллий фурур ўсишига хизмат қилмори лозим. Худди шундай катта авлодга хос ижтимоий қўрқув бартараф этилиши ва у ёш авлодда тикланмаслигининг барча иқтисодий, сиёсий, хуқуқий, ижтимоий-психологик ва маданий-маърифий чоралари кўрилмоғи шарт.

Ҳалолликка ва адолатга асосланган ҳақиқий бозор иқтисодиётини шакллантириш, иқтисодиётни эркинлаштириш, ишлаб чиқаришни ва меҳнатни оқилона ташкил этиб, ёлловчи ва ёлланувчи ўртасидаги муносабатларни ўзаро масъулият ва қонуний меъёрларга қатъий риоя қилган ҳолда ташкил этиш зарур. Тадбиркор ва ишчи-хизматчининг ҳуқуқлари амалда кафолатланиши керак. Шу боис Ўзбекистонда давлат ҳокимиятининг ҳар учала бўғини тадбиркорликка ва меҳнат муҳофазасига оид қонунчиликни мунтазам тақомиллаштириб, бойитиб, улар ижросини таъминлаш ва назорат этиш механизмини кучайтириб бормоқда.

Хўжалик масалалари бўйича ихтисослашган маҳсус суд тармоғи вужудга келди. Мамлакатимизда шундай шарт-шароит ва ижтимоий-маънавий мухит қарор толиши ва мустаҳкамланиши зарурки, ҳар бир киши биринчи навбатда ҳалол меҳнат қилиб, изланиши, ўз ақли ва фаросатини ишга солиши эвазига жамиятда кўзлаган ижобий мақсадига эришиши мумкинлигига қаттиқ ишонмоғи, ўзи ва бошқалар мисолида бунга амин бўлмоғи лозим.

Бу нафақат иқтисодий шарт-шароитларни, шунингдек, сиёсий бошқарувнинг янада либераллашувини, демократия ривожланишини, фуқаролик жамияти асослари мустаҳкамланишини ҳамда ҳар бир фуқарода сиёсий ва ҳуқуқий маданият ўсишини, дунёқараши кенг ва теран, тафаккури эркин бўлишини ҳам тақозо этади.

ТАФАККУР ЭРКИНЛИГИ МЕЗОНЛАРИ

Демократик ва эркин жамият қуришнинг муҳим фундаментал шартларидан бири тафаккур эркинлигига кенг йўл очишидир.

Эркин тафаккурнинг асосий белгиларидан бири ижобий маънодаги фаоллик ва мустақиллик (Э. Фромм). Лекин бунга эришиш ҳеч бир даврда осон кечмаган. Чунки ҳар бир давр тафаккурга ўзи бериши мумкин бўлган даражадан ортиқ эркинлик беролмайди. Ҳар бир даврда муайян мағкуравий клишелар, қолиплар, меъёрлар асосида фикрлашнинг барқарор стереотиплари вужудга келади.

Ижтимоий тараққиёт даражаси ва сиёсий тузум хусусиятлари тафаккур эркинлигининг имкониятларини, намоён бўлиш шаклларини белгилайди. Баъзи тарихий даврларда тафаккур эркинлиги ҳатто мистик шаклларда юзага чиқиши мумкин.

Европада илк капитализм шаклланиши жараёнида тафаккур эркинлиги хурфикрлилик сифатида вужудга келган ва ривожланган. Ўшанда хурфикрлилик тафаккурни черков дорматикасидан, илм-фаннинг диндан мустақил ривожланишини, бошқача айтганда, тафаккурнинг дунёвийлашишини англатган. Хурфикрлилик нигизини жамиятнинг асосий институтлари – давлат, иқтисодиёт, ҳукуқ, маориф ва илм-фан, соғлиқни саклаш ва ш.к.ларнинг секуляризация

бўлиши, яъни черков таъсиридан мустақил бўлиши ташкил этади.

Фарбда секуляризация жамиятнинг, айниқса илмфан ва тафаккурнинг табиий-тарихий ривожланиши маҳсулидир. У пишиб етилган объектив ҳодиса сифатида вужудга келди. Европада хурфикрлилик сунъий равишда зўравонлик билан ҳалқ онгига сингдирилмади. Черков ва дин ҳам таъқиб этилмади. Лекин черковга нисбатан танқид кучая борди. Замон талабларига жавоб бермай қолган католицизм бағрида дастлаб протестантизм оқими пайдо бўлди. Сўнгра маърифатпарварлар ва илк капитализм назариётчилари томонидан черков ва дин қаттиқ танқид қилинди. Айниқса бу борада француз маърифатпарварлари – энциклопедист олимлари ва Вольтер сингари файласуф-адиблари ижодий фаолияти тараққиётга катта таъсир кўрсатди. Охир-оқибатда католик черков ўзининг бা�ъзи даъволарини қайта кўриб чиқишига, давлат ишларига аралашишдан воз кечишига мажбур бўлди (янгитдан пайдо бўлган оқимга мансуб черковлар ҳам).

Тўғри, протестантизм ва католицизм ўртасида узок давом этган қонли тўқнашувлар юз берди, буржуазия сиёсий ҳокимият тепасига айрим ҳолларда инқилобий урушлар натижасида келди (Нидерландия, Буюк Британия, Франциядаги инқилобларни эсланг). Лекин мазкур ҳодисалар объектив ижтимоий тараққиёт натижалари, капитализмнинг ва янгила тафаккурнинг кураш воситасида ўзига йўл очиши эди. Капитализм илмфан, маданият, технология ва ишлаб чиқариш ривожланишига қурдатли имконият яратди. Илмий-техника тараққиёти ва табиатшунослик билан боғлиқ фанлар аста-секин ҳалқ ҳўжалигининг, иқтисодиётнинг узвий, таркибий тузилмавий бўлагига, қисмига айланди. Бу тафаккурнинг рационал йўналишда ривожланишига ул-

кан таъсир кўрсатди. Бундан ташқари, айниқса шафқатсиз ракобат жамият тафаккурини кескин рационаллаштириди, кўнгилчанликка, сентиментализмга, ҳавоий орзу-ҳавасга деярли ўрин қолдирмади. Мақсадга мувофиқлик биринчи ўринга чиқди. Анъанавий қадриятларга, маданий меросга муносабат аста-секин беписандлик томон ўзгарди.

Мақсадга мувофиқлик тамойили билан бир қаторда капиталистик иктисолиёт вужудга келтирган ракобат, бозор талаблари, ишлаб чиқариш ва технологиядаги сифат ўзгаришлари кўп жиҳатдан тафаккур эркин ривожланишига хизмат қилган бўлса-да, аммо пировардида унинг инқирозга учрашига ҳам ҳисса кўшиб турди. Масалан, технократик қарашлар аста-секин ҳукмрон бўла бошлади. Жамиятдá дегуманизация жараёни кучайди. Фарб рационализмининг XX аср иккинчи ярмидаги инқирози, турли-туман мўътадил ва тажовузкор диний секталар, мистик, теософик, спиритуалистик, парapsихологик таълимотларнинг ҳаддан ташқари кўпайиб кетганлиги, теленурожа шу мавзудаги ҳамда зўравонлик ва фаҳшни очиқ кўрсатувчи фильмлар салмоқли ўрин эгаллагани бунга далилдир. Оила ва никоҳ институтлари ҳам қаттиқ деформацияга учради. Бир жинслилар ўртасида никоҳга рухсат берувчи мамлакатлар сони йилдан-йил кўпайиб бормоқда.

Лекин фарбликлар менталитетида инсон ҳуқуқлари, тенглик, либерализм, мустақил фикрлаш ва фаол изланиш, ўзга қарашларга хурмат чукур ўрнашганки, бу улар тафаккурига муайян даражада эркинлик бағишилайди. Бугунги фарб тафаккури капитализм ва сектуляризация маҳсулидир, лекин зинхор атеистик сиёсат маҳсули эмас. Фарбда фикрлар кураши, баҳси Ренессанс ва Маърифатпарварлик давридан бошлаб анча

авж олган, хатто айрим олимлар ва адиллар томонидан атеистик руҳдаги асарлар ёзилган, тарғибот олиб борилган. Аммо давлат томонидан атеистик сиёсат юритилмаган.

Чор Россиясида ижтимоий тараққиёт такозо этган секуляризация анча ортда қолган эди. Чунки капитализм тўлиқ шаклланишга улгурмаган, ахолининг аксарияти саводсиз эди. Совет даврида эса секуляризация зўравонлик билан олиб борилган давлат атеистик сиёсати натижаси бўлди. Бироқ у нотабиий секуляризация эди, кўпроқ шаклан қарор топган, моҳиятан тўлиқ юз бермаганди. Диний ақидалар коммунистик ақидалар билан алмаштирилганди, холос, Шу боис ҳақиқий тафаккур эркинлиги шаклланмаган, унинг муҳим таркибий унсурлари чала бўлиб қолган ёки деформацияга учраган эди.

Колониализмни бошдан кечирган, сўнгра капитализмни четлаб ўтган халқларда эса бу жараён янада мураккаброқ, зиддиятлироқ кечди. Чунки етарли дарражада рационализм унсурлари, ташаббускорлик, тандидий рух ривожланмади, обрўли фикрни нотанқидий қабул қилишга мойиллик жуда секин камайиб борди. Чоризмга қарамлик даврида идора усуллари ва айрим ижтимоий институтлар секуляризациялашган бўйса-да, ахолига ислом динининг таъсири пасаймади. Аксинча, ахоли ҳаққоний равишда ўша шароитда исломга миллатни, миллий маданиятни ассимиляциядан сақлаб қолувчи омил сифатида қарай бошлади.

Халқимизнинг чоризм асоратига тушиб қолган қисми учун ислом миллий ўзликнинг айният тимсолларидан бирига айланди. Шу сабабдан халқимизнинг Бухоро амирлиги худудида яшаган, расман мустақиллигини сақлаб қолган қисмига нисбатан Туркистон генерал-губернаторлиги худудида яшаган қисми бугун

ҳам динга кўпроқ мойиллик кўрсатади. Ваҳоланки, Бухоро ислом динининг марказларидан бири бўлган, анъанавий ислом ақидалари, унинг консерватив меъёрлари қаттиқ ҳимоя қилинган. Ижтимоий институтлар ва идора усулларининг секуляризацияси ҳақида эса гапириб ўтиришнинг ўзи ортиқча. Шунга қарамасдан, аҳоли онгига дин таъсири собиқ Кўқон хонлиги худудига нисбатан камроқ. Бугунги кунда баъзи ёшларда диний экстремизмга мойиллик масаласида ҳам икки худуд ўртасида сезиларли фарқ бор. Ўзбек театри тарихини чуқур ўрганган М. Раҳмонов Бухоро амирлиги ва Кўқон хонлиги худудида фаолият юритган ҳалқ театрлари, дорбозлар, масхарабозлар, қўғирчоқбозлар XIX асрда кўрсатган айрим томошалар, интермедиялар ҳақида сўз юритади. Сюжет мазмунини баён қиласди, матнларидан парчалар келтиради. Тадқиқотчи гувоҳлик беришича, Кўқон хонлиги санъаткорлари ҳатто хон хузурида кўрсатадиган томошаларида баъзан кескин ижтимоий-сатирик лавҳаларни, амалдорлар ва руҳонийларни танқид қиласдиган саҳналарни кўрсатганлар. Бухоро амирлиги санъаткорлари эса ижтимоий сатирадан, танқиддан мутлақо йироқ, кўпроқ кўнгилочар томошалар кўрсатганлар, латифалар, сўз ўйинлари асосида енгил ҳажвий лавҳаларни саҳналаштирганлар. Динга, қолоқ анъаналар ва руҳонийларга, амалдорларга нисбатан танқидий фикр билдириш у ёқда турсин, ҳатто асқия ва қочириқ қилишга ҳам журъат этолмаганлар. Муллалар, қозилар, диний идоралар томонидан одамлар онги, фикри-зикри қаттиқ назорат қилинган. Сатира унсурлари узок, чекка жойлардаги томошаларда кўрсатилган¹.

¹ **Мамаджон Рахманов.** Узбекский театр с древнейших времен до 1917 года., Т., 1981 г. 191–201-б.

Қўқон хонлигига Бухоро амириларига нисбатан тафкур эркинлиги кўпроқ, диннинг маънавий ва сиёсий назорати бўшроқ бўлган. Аҳоли дин таъсирига муккасидан тушиб қолмаган. Ўша даврдаги бундай ҳолат майший маданиятга, маънавий ҳаётнинг баъзи томонларига ҳам таъсир кўрсатган. Амирлик аҳолиси орасида асиябозлик Қўқон хонлиги аҳолиси орасидагига нисбатан камроқ тарқалган. Бу ҳатто ҳозир ҳам сезилади. Амалдорлар орасида эса Бухорода асиябозлик умуман удум бўлмаган. Юсуфжон қизиқ Шакаржоновнинг эсласича, 1897 йили Бухоро амири Туркистон генерал-губернаторига хат ёзиб, фарғоналик санъаткорларни чақиртиради. Амир томошаларда қози ва уламоларни танқид қиласиган асарларни кўрсатишга розилик бермайди. Шунда улар фарғонача асиялар қила бошлишади, лекин ҳеч ким кулмайди. Амир теварагидаги амалдорлар асияни тушунмайди¹.

Лекин мустамлакачилик даврида Қўқон хонлиги худудида ислом динига муносабат ва диннинг омма оннинг сиёсий таъсири кучая бошлади. Гап шундаки, чоризм даврида хонлик худудида дин, биринчидан, миллий ўзликни сақловчи, миллий урф-одатларни, турмуш тарзини, миллий онгни ҳимоя қилувчи маънавий-эътиқодий, маданий омилга айланди. Иккинчидан, ҳалқни миллий озодлик учун колониал ҳокимиятга қарши курашиш йўлида бирлаштирувчи сиёсий мафкура вазифасини бажарди. Фарғона водийсида яшовчи аҳолининг тарихий хотирасида, онгости даражасида динга сиёсий омил, ҳокимият учун кураш воситаси сифатида қараш сақланиб қолган. Бугун у ташқи таъсирлар туфайли, деформациялашиб ва сохталаштирилиб, бир гурух тажрибасиз ёшларни, афсуски, чал-

¹ Ўша манба, 200-б.

ғитмокда, уларнинг айримлари диний экстремизмга кўл урмоқда. Мамлакатимизнинг бошқа худудларида диний экстремизм таъсири Фарғона водийсига нисбатан сезиларли даражада паст. Аммо бу огоҳликни бошқа вилоятларда сусайтиришга сабаб бўлолмайди, албатта. Диний экстремизмга қарши курашни ташкил қилишда, маънавий-маърифий тарғиботда Фарғона водийсида ҳам, Хоразм ва республиканизмнинг бошқа вилоятларида ҳам диндан сиёсий омил сифатида фойдаланишга интилаёттан гурӯхларнинг асл мақсадини оқиллик ва қатъият билан фош этиш зарур.

Совет давлатида қарор топган авторитар, маъмурий-буйруқбозликка асосланган бошқарув, дохийпарастлик, догматик коммунистик мафкуранинг якка ҳукмронлиги тафаккурдаги иррационалистик унсурларни озиқлантириб турди ва аста-секин тоталитар тафаккур унсурларини шакллантириди. Совет даврида қарор топган тафаккур хусусиятлари таҳлилидан келиб чиқиб, тоталитар тафаккур ҳақида қўйидагиларни қайд этиш мумкин.

Тоталитар тафаккур давлат бошқарув машинаси, назорат ва ташвиқот-тарғибот усуслари, оммавий ахборот воситалари анча ривожланган мамлакатларда репрессив авторитар бошқарув шароитида вужудга келади (Сталин, Гитлер, Франко ва бошқа диктатурулар). Чунки бундай диктатура режимларида мутаассиб мафкура ҳукмронлик қиласи.

Мутаассиб мафкура умуммиллий, ҳатто умумбашарий манфаатлар, порлок келажакни яратиш учун бугун қийинчиликларга чидаш, ҳатто, керак бўлса, ўзни фидо қилиш лозим, деган тушунчалар билан чайковчилик қиласи. У маъмурий усуслар, оммавий ахборот воситалари, турли митинглар ёрдамида жамиятда оммавий психозни, кўрқувни вужудга келтиради. Қатъ-

ий интизом ўрнатиб, ишлаб чиқаришда ҳам вақтинчалик суръатларни оширишга эришади. Давлат машинасини, айниқса унинг репрессив механизмини мустаҳкамлашни «асослайди», турли ички ва ташқи душманларни, таҳдидларни ўйлаб топади ёки ҳақиқий таҳдидларни жуда кўпиртиради.

Тоталитар мафкура реал ёки ўйлаб топилган таҳдидлар ҳавои утопик олий миллий мақсад теварагида қисқа давр мобайнида оммада ташаббус уйғотиши, халқни маълум даражада бирлаштириши мумкин. Буни яна Сталин ва Гитлер давридаги собиқ СССР ва Германия мисоли тасдиқлади.

Карл Поппернинг қўйидаги фикрида жон бор: «Қадимги ва янги тоталитар ҳаракатларнинг кучи – биз уларга қанчалик ёмон муносабатда бўлмайлик – шунга асосланганки, улар анчайин реал ижтимоий эҳтиёжларга жавоб беришга уринадилар». Тоталитар тафаккур воқеликни ноадекват, яъни бузиб, ноҳаққоний акс эттиради. У, биринчидан, воқеликка тор синфиийлик ва партиявийлик ойнаги орқали қарайди. Ижтимоий воқеа ва ҳодисаларга, жамият аъзолари хатти-харатларига, шахслар фаолиятига сиёсий ва мафкуравий тус беради, уларни ҳукмрон мафкура ва расмий сиёсат нуқтаи назаридан баҳолайди. Лекин унга мудом сиёсий холислик ва илмийлик етишмайди. У жамият ҳёти казармача бир хил, одамларнинг фикрларни эса бир чизиқли бўлишига интилади. Қарашлар, фикрлар плюрализмини-ку қўя турайлик, хатто ўз мафкураси доирасида ҳам бир вариантиликка, бир чизиқликка интилади. Шу боис большевиклар фракционликка қарши тиш-тирноғи билан курашган. Айрим тоталитар давлатларда расман бир неча партия фаолият юритиши мумкин. Аслида эса улар ўртасида ҳақиқий тенгҳукуқлиликка, очиқ сиёсий ва мафкуравий курашга

йўл кўйилмайди. Ҳар хил кўзбўямачиликлар, жамоатчилик фикрини чалғитиш орқали гўёки партиялар кураши ҳақида тасаввур ҳосил қилинади.

Иккинчидан, тоталитар тафаккур муроса нималигини билмайди, тажовузкорликка мойил. Масалан, жанговар атеизмда ва сиёсий, мафкуравий мухолифларини таъкиб қилишда юкорида қайд этилган хусусиятлар яққол намоён бўлади. У ўз қарашларини жамиятга, кишилар онгига зўравонлик билан мажбуrlаб сингдиришга йнтилади. (Тоталитар тафаккур коммунистик, атеистик мафкурага эмас, диний мафкурага асосланиши мумкин. Унда баъзи бир ҳолатлар шаклан тескари намоён бўлса-да, моҳияти ўзгармайди. Масалан, улар ҳам ўз мафкураларини, қарашларини зўравонлик, тазийқ билан сингдиришга, вазиятга қараб, оммавий зўравонликларни, репрессияларни (ёки терорчиликни) амалга оширишдан қайтмайди (Эронда 1978–80-йиллар, Афғонистонда толибонлар, фарб мамлакатларида тоталитар диний секталар). Тоталитар тафаккур ЖАР ва Собиқ Жанубий Родезияда аввалги тузум давридагидек ашаддий ирқчиликка, апартеидга ёки баъзи бир мамлакатларда бўлганидек фашистик мафкурага асосланиши мумкин. Унда ҳам моҳият ўшаёталигича қолади.)

Учинчидан, тоталитар тафаккур раҳбар фикрларига кўр-кўрона итоат этади. Уларни танқидий қабул қилишга мутлақо ожиз. Бу борада унга нафақат мустақиллик, шунингдек, ирода ҳам етишмайди.

Бошқа томондан, тоталитар тафаккур ташувчиси ўзига нисбатан хизмат поғонасида паст турган киши фикрини тўлиқ инкор этиши, ҳеч иккиласдан бу фикр устидан, унинг тўғри ёки нотўғрилигидан қатъи назар, кулиши, масхара қилиши мумкин.

Тоталитар тафаккур учун давлат ёки черков цен-

зураси ва назоратидан ташқари шахснинг «ички цензори», ички тақиқ ва ўзини ўзи назорат қилишнинг ўта кучлилиги хос. Ўзини ўзи назорат этиш шунчалик кучлики, шахснинг ҳар қандай ташаббусини бўғиб, иродасини фалаж қилиб қўяди. Чунки тоталитар тафаккур туғилиши замирида ижтимоий қўрқув ва репрессия хавфи ётибди. Инсонга хос ўз жонини сақлаш инстинкти репрессив тоталитар тузум шароитида, Э. Фромм тўғри таъкидлаганидек, расмий қарашларга зид келадиган ҳар қандай муқобил ғояни онгости қатламига сиқиб чиқариб юборади.

Тоталитар тафаккур соҳиблари давлатга, мавжуд тузумга, раҳбарларга содиклигини кўрсатишга зўр бериб уринадилар. Улар шарафига, имкон топилиб колса, юксак минбарлардан туриб, ёки ОАВ орқали мадхиябозлик қиласидар. Тоталитар тафаккур соҳибларининг айримлари ғоявий муросасизликлари, ўзга қарашларга тоқат қилолмасликлари туфайли ҳамда тузумга, давлатга содикликларини намоён қилиш мақсадида бошқача ўйлайдиган, гўёки расмий мафкура ва сиёsatдан норози кишилар тўғрисида тегишли идораларга «сигнал» бериб туради, ихтиёрий айғоқчилик қиласидар. Буни фашистик Германия ва большевистик Россиянинг (Собиқ СССРнинг) сон-саноқсиз фожиали мисоллари кўрсатиб турибди. Аслида «юмалоқ хат» ёзиш, сиёсий чақимчилик ҳам жонини сақлаб қолиш инстинктининг ўзига хос тарзда намоён бўлишидир.

Тўртинчидан, тоталитар тафаккур мазмунан ўзига хос «синкретик» тафаккурдир. Сиёсий ва мафкуравий якдиллик, синфийлик, партиявиyilik ва жанговар атеизм унинг ички «муштараклигини» ва бўлинмаслигини таъминлайди, танқиддан, «ревизионистик» ва «оппортунистик» унсурлар аралашиб қолишидан ҳимоя

қилади (агар у диний тоталитар бўлса, гўёки ширк ва куфрдан ва х.к.).

Лекин, шунга қарамасдан, у эклектик тафаккур тарзидир. Чунки унда рационализм ва иррационализм, илмийлик ва волюнтаризм, коллегиал фикрлаш ва авторитаризм унсурлари механик тарзда коришиб кетган. Ўта кескин жанговар атеизм эса, диалектик қонуниятларга кўра, ўзининг тескарисига – бошқача дин шаклига айланган. Ҳақиқатан, доҳийлар шахсига сифиниш илоҳийлаштиришнинг, пайғамбарлаштиришнинг шаклан нодиний, аммо мазмунан ундан кам фарқ қиладиган кўринишидир. Коммунистик келажакни бутун инсониятнинг тақдири, эртами-кечми барча ҳалқлар коммунизмга келади деб ҳисоблаш «тақдири азал» гоясининг нодиний шаклда ифодаланишидан бошқа нарса эмас.

Муросасизлик, ўзгача фикрловчилар билан келиша олмаслик тоталитар тафаккурни тажовузкорликка (агрессивликка), мухолифларини таъқиб қилишга ундейди. Шу сабабдан жамиятда ёппасига сиёсий ва мафкуравий назорат ўрнатилади. Айнан шу кейинги икки ҳолат тоталитар тузумнинг моҳиятини ифодалайди. Тоталитар тафаккур негизида кўркув ётади. Зиёлиларнинг аксарияти ва оддий кишилар тузум уни ёт фикрловчи кишилар қаторига қўшмасин деб, садоқатини ошкора намойиш қилишга интилишининг, ҳукмрон мафкурага нисбатан маддоҳлик (мадхиябозлик) қилиб, турли мажлисларда сохта фаоллик кўрсатишининг ҳам сабаби аслида ижтимоий кўркувдир. Агар тоталитар жамиятда диний мафкура ҳукмронлик қиласа, фуқаролар белгиланган тартибда ибодатга қатнашади, диний урф-одатларни оғишмай ижро этади. Тоталитар жамиятда иерархлашган қатъий маъмурний-буйруқбозлик тизими ўрнатилади. Турли поғонадаги

мустабид авторитар бошликлар фаолият юритади. Улар ҳам доимий қўрқувда яшайди ва лавозимидан ажралишдан қўрқади. Чунки лавозимидан бирор салбий иши учун кетса, давлат томонидан жазоланишдан қўрқади. Бошқа ҳолат учун лавозимдан кетса, мендан аламзадалар, ҳасадгўйлар ўч оладилар, устимдан куладилар, деб ўйлайди. Мансаб тоталитар тузумда амалдорни муҳофаза этувчи кафолатдир. Шу боис у юкори бошлиқнинг ҳар қандай инжиқликлари ва ҳақоратларига чидайди. Қисқаси, тоталитар тузумда эркин фикрловчи мустақил шахснинг ўзи бўлмайди. Инсон қадркиммати чуқур деформацияга учрайди.

Тафаккур эркинлигига интилаётган бизнинг жамиятимиз оммавий онгдаги, тафаккурдаги анъанавийликнинг айрим қолоқ унсурларидан ҳам, тоталитаризмнинг қолдиқ иллатларидан ҳам холос бўлмоғи лозим. Бунга янги жамият қуриш, ўтиш даврининг қийинчиликларини бартараф этиб, янги авлодни тарбиялаш жараёнида эришилади. Лекин бу ўз-ўзидан содир бўлмайди. Тафаккур эркинлигини таъминлаш учун янгича дунёқараш ва фикрлаш тарзи шакллантирилиши зарур. Чунки тафаккур ижтимоий борлиқнинг механик инъикоси эмас ва ўз-ўзидан борлиқ томонидан белгиланиб, шакллантирилиб қолмайди. Бир томондан, унга ижодий фантазия ва трансцендентлик хос. Иккинчи томондан, у инерция кучига эга. Шу боис анъанавий, авторитар ва қолоқ консерватив тафаккур унсурлари демократик тамойиллар ўрнатилган эркин жамиятларда ҳам авом онгида сезиларли ўрин эгаллаши мумкин. Бошқача айтганда, ижтимоий борлиқ ўзгариши билан унга муносиб равища ижтимоий онг, тафаккур бирданига ўзгариб қолмайди.

Янгича дунёқарашнинг мазмуни дунёвий ва та-

раққийпарвар бўлмоғи керак. Дунёвийлик ҳар қандай кўринишдаги ақидапарастликни (фашистик, коммунистик, шовинистик (миллатчилик), расистик (ирқчилик), диний, диний-мазҳабий ва ш.к.) инкор этиб, тафаккурнинг холисликка, рационализмга, илмийликка таяниши орқали таъминланади. Таракқийпарварларлик эса фикрий турғунликни, доктриналарни, миллий маҳдудликни ва нигилизмни инкор этишдан келиб чиқади. Таракқийпарварларликнинг муҳим шартларидан бири – шахснинг ўз мулоҳазалари ва хуносаларига нисбатан масъулиятли бўлиши, муайян ғояни, шу жумладан, гўёки энг «замонавий» ва «фойдали» ғояларни ҳам инсон манбаатлари ва камолотига қай даражада хизмат қила олиши нуқтаи назаридан баҳолашдир. Масъулият етишмаган тафаккур ҳеч қачон фаол ва мустақил бўлолмайди.

Ўтиш даврининг мукаррар объектив ва субъектив қийинчиликлари ижтимоий онг инерцияси билан биргаликда тафаккур эркинлигини ривожлантириш йўлида муайян тўсиклар ҳосил қилмоқда. Улар орасида биринчи навбатда катта ёшдаги аҳоли онгининг ўзига хос маргиналлигини ажратиб кўрсатиш керак. Маргиналлик ўзбек модели имкониятлари тўлароқ юзага чиқишига қўшимча ғов бўлмоқда.

Психологияси ва тафаккури совет даврида шаклланган кишилар онгида, бир томондан, катта ўзгаришлар юз берди. Улар коммунистик тушунча ва меъёрларнинг аксариятидан воз кечди, аҳолининг сиёсий, иқтисодий, ахлоқий, диний ва ш.к. қарашлари, қадриятлар мезони сезиларли даражада ўзгарди. Аммо айни чоғда, иккинчи томондан, янги қарашларни, янги қадриятларни тўлиқ ўзлаштириш, яъни уларни ўз эътиқодига, фаолият ва яшаш меъёрига айлантириш оқсамоқда. Совет даврида шаклланган катта ёшдаги

кишилар онги, тафаккури эндиликда эскича ҳам эмас, тўлиқ янгиланган ҳам эмас – оралиқ, маргинал ҳолатда. Ахолининг ушбу қатлами онгида маргиналлик аста-секин камайиб боради. Бироқ тўла бартараф этилмайди.

Фақат янги шароитда вояга етган авлод онги маргиналликдан халос бўлади. Авлодларнинг табиий-тарихий алмашинуви жараёнида янги шароитда шаклланган авлоднинг нисбий улуши корхона, ташкилот, муассасаларда, умуман ҳалқ ҳўжалигида, айниқса бошқарувнинг турли бўғинларида маргинал онг сохибларига нисбатан устунлик қиласа, ўзбек модели имкониятлари юзага чиқиши, хақиқий бозор муносабатларининг қарор топиши, жамият ҳаётини демократлаштириш тезлашади, шахс ва ҳокимият, амалдор шахси ва давлат вазифасини бажариш бир деб ҳисоблаш, чалкаштириш, персонификациялаш камаяди.

Катта авлод онгининг маргиналлиги маълум даражада ёшлар онгига ҳам таъсир кўрсатади. Бу таъсир баъзи бир ҳолларда ниҳоятда мураккаб, зиддиятли тус олиши мумкин. Дунёқараш ва ижтимоий баҳолашнинг аввалги тизимини йўқотган, янги событ тизимга эга бўлолмаган катта авлоднинг айрим вакиллари фарзандлари ва тарбияланувчиларида, қўл остидаги ёш мутахassisслар ва ишчи ёшларда аниқ ижтимоий мўлжалларни шакллантиришда, уларни маънавий-эътиқодий йўналтиришда қийналиб қоладилар. Натижада оиласда, ўқишда ва ишда аниқ ҳаётий йўл-йўриқ, маслаҳат ололмаган бола, ёш йигит ва қиз дунёқараш ва эътиқод масалаларида чалғиб, сохта қадриятларга мойиллик кўрсатиши ҳеч гап эмас. Буни кейинги йилларда юз берган нохуш воқеалар, айрим ёшларнинг диний экстремизм таъсирига тушаётгани кўрсатиб турибди. Аслини олганда, бу жуда мураккаб масала. Бола маъ-

лум ёшда ота-онасидан мустакилликка интилади. Лекин ижтимоий ва аксиологик мўлжаллар, идеаллар аслида асосан ёшлиқда оилада ва мактабда шаклланади. Оилада ва мактабда бола тарбиясида камчиликларга йўл қўйилса, бу камчиликларни кўча «тўлдирди». Кўчанинг таъсири эса доим ҳам ижобий бўлавермайди.

Маргиналлик кўп ҳолларда ижтимоий пассивликини, баъзан лоқайдликни ва жамият ҳаётида вужудга келган қийинчиликлар олдида эсанкираб қолишни келтириб чиқаради, шу жумладан, тарбия борасида ҳам. Биз меҳнат ва касб тарбиясини, меҳнат бозори талабларига мослашишни, ишбилармонлик билан шуғулланиш кўникмаларига ўргатишдан тортиб, то сиёсий ва хукукий маданиятни ўстиришгача бўлган тарбиянинг барча йўналишларини назарда тутмоқдамиз.

Тарбия орқали шаклланадиган иқтисодий, сиёсий тафаккур, касбий ва ижтимоий фаоллик тараққиёт модели салоҳиятига бевосита таъсир кўрсатувчи субъектив омиллардир. Айнан тарбия борасида катта авлод (тарбиячи)нинг маргиналлиги – пассивлиги, лоқайдлиги ёш авлод тарбияси эҳтиёжларини қондира олмаслиги, ҳатто баъзи масалаларда чалфитиши мумкин.

Маргинал тафаккурнинг яна бир камчилиги – унда эклектик тарзда ўзаро бир-бирини инкор қилувчи таомилларнинг, меъёрларнинг қоришиб кетиши эҳтимолидир. Бундай ҳолларда эклектик тафаккур эгаси қарама-қарши томонларга оғиб туради, турли ғаразли чақириқлар, сохта ғоялар ортидан эргашиши мумкин. Айниқса сайлов кампанияларида ёки ҳокимият идораларига ноқонуний талаблар билан тазийк ўтказишга уринишда ушбу ҳолатдан ҳамда маҳаллийчилик, уруғ-аймоқчилик иллатларидан баъзи ғаразгўй ким-

салар ва ташқи кучлар маккорона фойдаланишга интилаётганини пайқаш қийин эмас.

Тафаккур маргиналлиги жамиятни демократлаштиришга халақит берувчи субъектив омиллардан биридир. Чунки демократия фақат илғор қонунлар тизимидан ва жамиятнинг тегишли институтларидангина иборат эмас. У кенг маънода жамиятнинг сиёсий эътиқоди ва ижтимоий-сиёсий турмуш тарзи ҳамdir. Демократиянинг қонунчилик базасини тез яратиш катта қийинчилик туғдирмайди. Давлатнинг эски идоралари ва жамият институтларини ислоҳ қилиб, янгитдан ташкил қилиш жуда узок вакт талаб этмаслиги мумкин. Жамият аъзоларининг психологияси ва тафаккурини уларга мутаносиб равишда ўзгартириш эса ниҳоятда қийин. Омма психологияси ва тафаккурида ўзгариш тезда содир бўлмайди. У нисбатан узок давом этадиган маънавий-маърифий, сиёсий, ҳуқуқий тарбияни ҳамда ижтимоий муҳит ва турмуш тарзи ўзгариб, жамият аъзоларининг уларга одатланиб қолишини тақозо этади.

Ўзбекистонда замонавий демократик тараққиёт талаб этадиган ҳуқуқий база яратилди ва мустаҳкаммалиниб, чуқурлашиб бораётир. Институционал ўзгаришлар ҳам жадал давом этаётир. Аммо жамиятнинг демократлашви суръатлари айрим доираларни, айниқса чет элларда қониқтиrmаялти. Гўёки ҳокимият идоралари бу жараённи сунъий секинлаштиришга уринмоқда. Жойлардаги баъзи бир бюрократик тўсиқларни, хато ва камчиликларни инкор этмаган ҳолда, эътиборни бошқа бир муҳим жиҳатга, жамият онги, тафаккури ўзгаришлари хусусиятига қаратиш лозим.

Конунларга риоя қиладиган, ўз ҳақ-ҳуқуқини юзага чиқарадиган, янги институтлар фаолиятига нисбатан ижтимоий талабни ҳосил қиладиганлар фукаро-

лардир. Уларнинг онгли фаолияти оқибат-натижада амалга оширилаётган ҳар қандай ислохотларнинг, жумладан, жамиятни демократлаштиришнинг самара-дорлигини белгилайди. Шу боис бъзи гарб сиёсатчилари ва доираларининг Ўзбекистонда ва бошқа янги мустақил давлатларда демократлаштириш оқсаётганинг сабабларини факат раҳбарият ва ҳокимият фаолиятидан излаши ўта бирёкламаликдир.

Матбуот ва сўз эркинлиги масаласидаги кўпчилик камчиликлар илдизи ҳам маргиналликка бориб тақалади. Цензура бекор қилинганига қарамасдан, аксарият журналистлар, муҳаррирлар «ички тақиқни», ички ҳадиксирашни жуда секин енгиб ўтаётирлар.

Эски қадриятлар тизимининг емирилиши жамиятнинг айрим аъзоларининг ўз қарашларини кескин ва қарама-қарши томонга ўзгартиришига олиб келади. Масалан, атеист диндорга, коммунистик ғоя тарғиботчиси унинг ашаддий танқидчисига айланиб қолади. Маргиналликнинг шаклан тескариси – эътиқодда радикал позицияга кўр-кўрона ўтишдир. Буни шартли равишда «неофитлик радикализми» деб аташ мумкин (неофит — янги динни қабул қилган киши).

Неофитлик учун биринчи хос белги – бу мутаассиблиқ, муросани тан олмасликдир. Неофит ҳеч қачон хато қилдим, демайди. У янги динга ўтгунча иккиланиши мумкин. Аммо кейин ўзининг ҳақ эканлигини тишиш-тирноғи билан ҳимоя қилади. Неофитликнинг иккинчи белгиси – унинг соҳибидаги янги эътиқод бўйича билимларнинг етишмаслиги, мулоҳазаларнинг саёзлиги, амалий тажрибанинг эса мутлақо йўқлигидир. Шу сабабдан неофитлар янги раҳнамоларининг иродасига тўлиқ тобе бўлади, уларга ёқиш ва кўрсатаётган ҳимматларини оқлаш илинжида «жонбозлик» кўрсатади, ўта «ташаббускор» бўлади, аввалги қавм-

ларини ҳеч иккиланмасдан жазолашга тайёр туради. Кўриниб турибдики, аслида биз «неофитлик радикализми» деб атаган ҳодиса тоталитар тафаккурнинг эски қадриятлар емирилиши давридаги деформациялашган кўринишларидан биридир.

Неофитлик радикализмини шартли равишда иккига бўлиш мумкин: демократия никоби остидаги радикализм ва дин никоби остидаги радикализм. Иккаласи ҳам сиёсий ҳокимиятга интилади.

Ўзини демократия ва сўз эркинлиги курашчилари деб ҳисоблайдиган айрим радикал кимсалар тафаккури аслида неофитлик тафаккури намунасиdir. Амалда улар демократия никоби остида ижтимоий-сиёсий баркарорликка хавф туғдириб ҳақиқий демократик жараёнлар тадрижий ривожланишига халақит бераётирлар. Матбуот ва оммавий ахборот воситаларида эса «кора пиар» деб аталмиш ҳодисаларда фаол қатнашишга тайёрдирлар. Ушбу ҳолатни у ёки бу даражада собиқ СССР парчалангандан сўнг пайдо бўлган барча мустақил давлатларда кузатиш мумкин. Ташки кучлар ёрдамида айрим мустақил ёш давлатларда «рангли инқилоб»лар деб аталмиш сиёсий тўнтаришлар содир бўлди. Лекин ҳозирча «рангли инқилоб»лар туфайли ҳокимият тепасига келган янги сиёсий кучлар ўз мамлакатларида на демократия ва инсон ҳукуклари масалаларини, на иқтисодий-ижтимоий муаммоларни ҳал қила олдилар. Кўпроқ мулкни ва лавозимларни қайта тақсимлаш билан чекландилар ва хорижлик ҳомийлари, раҳнамоларининг сиёсий-мафкуравий кўрсатмаларини оғишмай бажариб турishдан бошқа илож топа олмаяптилар.

Диний радикализм тафаккурида мутаассиблик, тарихий тажриба ва анъаналарни билмаслик ва инкор этиш, фикрий саёзлик, жаҳолат, ўз мухолифларига

нисбатан душманлик кайфияти нафақат яққол сезилади, шунингдек, минг афсуски, амалиётга ҳам кўчиб, фожиали воқеаларга сабаб бўлмоқда.

Ўзларини инсон хукуклари ва демократия тарафдорлари деб хисоблайдиган, турли радикалларга ҳомийлик қиласидиган Фарбдаги доиралар, кучлар аслида фаразли геосиёсий мақсадларни қўзлашмокда. Уларни демократия ва инсон хукукларининг универсал модели йўқлигини, етук демократия меъёрларини 10–15 йилда жорий этиб бўлмаслигини билмайди, дейиш ки йин. Ҳар холда Фарбнинг Генри Киссинджер ва Збигнев Бжезинский каби номдор сиёsatчилари ва бошқа олимлари бу ҳақда ўз фикрларини билдиromокдалар.

Ёш мустақил давлатлардаги сиёсий ва диний радикал ташкилотларни очиқча ёки пинҳона қўллаётган хориж доиралари жаҳон жамоатчилигини маҳсус бирёқлама танланган ёки сохталаштирилган ахборотлар ёрдамида чалғитмоқдалар. АҚШ президенти Ж.Буш томонидан эълон қилинган демократияни олға суриш ғояси аслида ҳарбий-саноат мажмуаси ва ёнилғи-энергетика билан боғлиқ доираларнинг геосиёсий манфаатларини қўзлади. Амалда у неоколониализмнинг янги кўринишидир. Буни АҚШнинг Болқон ярим ороли, Кавказ ва Яқин Шарқ, Каспий денгизи минтақаси ва Марказий Осиё мамлакатларига нисбатан юритаётган «икки хил стандартлар»га асосланган сиёсати кўрсатиб турибди. Албатта, бу геосиёсий ўйинда, неоколониалистик сиёсатда АҚШнинг стратегик рақиблари – Россия ва Хитойга қарши пинҳона кураш ҳам эсдан чиқарилган эмас.

Демократия ва инсон хукукларини ҳимоя қилиш ниқоби остида гегемончилик ва неоколониалистик тарғибот ва ташвиқот олиб борилаётганини ҳамюртларимиз яхши тушуниб олишлари, тарқатилаётган ҳар

бир ахборотни танқидий тафаккур элагидан ўтказиб қабул қилишлари керак. Бундай ахборот чет эллик «хайрихоҳларимиз» ёки ички «ватанпарварлар» томонидан тарқатилаётганидан қатъи назар. Эски қадриятлар тизими янгиланаётган шароитда турли шаклан жозибали шиорларга эҳтиётлик билан танқидий ёндашишини ўргатиш тафаккур эркинлигига, ўзбек модели самарадор бўлишига кўмаклашишдир.

Мустақиллик туфайли қадриятлар тизими, уларнинг мезонлари тубдан қайта кўриб чиқилиши табиийдир. Гап фақат ижтимоий-сиёсий, хукукий, мафкуравий баҳолар, мезонлар ва меъёрлар, қарашлар ва назариялар ҳақида кетмаяпти. Гап ахлоқий, эстетик, умуман барча маънавий қадриятлар тизими ҳақида ҳам кетмоқда. Чунки уларнинг барчаси коммунистик ақидаларга мослаштирилган ёки улар орқали талқин қилинган эди. Шу боис биз миллий мустақилликни мустаҳкамлаш, ҳалқимизни энг илфор миллатлар даражасига кўтарилишига кўмаклашиш мақсадларидан келиб чиқиб, бутун қадриятлар тизимини қайта баҳоламоқдамиз, асл маданий меросимизни тўла тиклаб, қайта англаб олмоқдамиз. Бу жараённинг ўзи анча қийин ва қарама-қаршиликларга бой. Аввалги қадриятларни қайта баҳолаш ва талқин қилишда баъзи ўтмиш қадриятларини идеаллаштириш, баъзиларини, аксинча, асоссиз инкор қилиш ҳоллари учраб туради. Фақат вакт – олий ҳакам – аста-секин барчасини ўз жойига қўяди. Аммо энг хатарлиси – қадриятлар тизими қайта баҳоланиб, аввалги мафкурадан воз кечилганда, маълум даражада мафкуравий бўшлиқ пайдо бўлишидир. Мафкуравий бўшлиқ узок давом этиши мумкин эмас. Бу бўшлиқка турли ғоялар кириб келади. Жамият аъзоларининг ҳаммасида ҳам уларни танқидий таҳлил қилиб тўғри баҳолай олиш учун етарлича билим ва

тажриба бўлмайди. Натижада баъзиларнинг сохта қадриятлар, бузғунчи ғоялар томон чалғиб кетишлари кузатилади. Неофитлик радикализми вужудга келишининг сабабларидан бири ҳам шудир.

Тафаккур эркинлигининг (эркин тафаккурнинг) асосий моҳиятли белгиси – инсонпарварлик, жамият ва алоҳида шахс манфаатларини бирдай акс эттиришdir.

Анъанавий тафаккур асосида инсоннинг фақат жамоа бўлиб, кучларни бирлаштириб ҳаётий муаммоларни ҳал қила олиши, оқибатда яшаб қолиши мумкинлигини стихияли англаш ётади. Яшаб қолиш ва минимал турмуш қулайликларини таъминлаб, уларни мутасил кўпайтириб, ўстириб бориш эҳтиёжларига тафаккур тарзи, урф-одатлар, ахлоқий ва бошқа меъёрлар бўйсундирилади. Анъанавий тафаккур шу негизда шаклланади ва жуда секин такомиллашади. Жамиятнинг яхши ривожланмаганилиги, ишлаб чиқаришнинг, ижтимоий инфратузилмаларнинг, соғлиқни сақлаш ва таъминот тизимининг ночорлиги ва ш.к.лар умумий манфаатларни алоҳида шахс манфаатларидан устун қўйишини тақозо ётади.

Анъанавий тафаккурдан фарқли эркин тафаккур нафақат жамиятнинг, балки алоҳида инсоннинг ҳам шахс сифатида эҳтиёжларини ҳисобга олади. Демак, тафаккур эркинлиги замирида жамият ва шахс манфаатларининг уйғунлашуви, мутаносиблиги ва мувозанати ётади.

Жамият ва шахс уйғунлиги тамойили, инсон ҳуқуқларининг давлат ҳуқуқидан устунлиги, инсон шахсий ҳаётининг дахлсизлиги ва мухторийлигини ҳимоя қилиш, эркин танлаш имкониятларини яратиш, ўзгача фикрга ҳурмат, қарашларда плюрализм, бошқарувда демократизм тафаккур эркинлигини вужудга келтирувчи ва таъминловчи омиллардир. Айнан зикр

этилган тамойиллар ва меъёрлар ўз навбатида инсон онгида акс этиб, эркин тафаккурнинг ички белгила-рига айланади. Инсон шахси, унинг манфаатлари ва эркинлигининг ижтимоий ҳаёт марказига қўйилиши ва тараққиётнинг асосий мезонига айлантирилиши жамиятда гуманизм тантанасини таъминлабгина қолмасдан, тафаккурнинг ўзига ҳам гуманистик мазмун ва эркинлик бағишлайди.

Эркин тафаккурнинг яна бир муҳим хусусияти – унинг танқидий ва ижодий руҳидир. Эркин тафаккур ҳар қандай фикрни кўр-кўронга қабул қилмайди. Уни таҳлил элагидан ўтказади, маъқул келмаса, инкор эта-ди. Заиф, бўш, ўз назарида хато ёки бирёқлама жи-хатларини танқид қиласди. У шунчаки ўзга фикрни маъқуллаш ёки танқид қилиш билан чекланиб қолмайди, балки уни ривожлантиришга, ўзини қизиқти-радиган ҳодисалар билан боғлашга ҳаракат қиласди. Айнан шу хусусиятда унинг фаоллиги ва мустақилли-ги намоён бўлади.

Албатта, тафаккур эркинлигига хизмат қилувчи омиллар орасида холислик, илмийлик (назарий тафаккур учун кўпроқ хос), масалага ҳар томонлама ёнда-шув, системавийлик каби негизий талабларни ёддан чиқармаслик керак. Масалага бирёқлама ёки нохолис ёндашиш тафаккурни хато хulosаларга олиб келади, уни ўзга фикрга ёки догматик андозага тобе қилиб кўяди. Илмий далилларни инкор этиш, ҳисобга ол-маслик ҳақида ҳам шундай дейиш мумкин. Формализм нуқтаи назаридан ёндашув кўп ҳолларда мураккаб, зиддиятли ҳодисаларни юзаки тушунишга, пировар-дига хато қилишга сабаб бўлади.

Холислик ва илмийликка интилиш, масалага ҳар томонлама ва системавий ёндашиш, танқидий ва ижодий руҳ тафаккурда тарихийлик ва замонавийлик ўрта-

сидаги уйғунликни ва мувозанатни таъминлайди. Агар тарихийлик ва замонавийлик ҳисобга олинмаса, тафаккур яна бирёклама хulosаларга келиши ҳеч гап эмас. Масалан, айрим ўтмишда қолиб кетган, анахроник турмуш қоидалари ва меъёрларининг ортиқча баҳоланиши, уларни тиклашга ва мустаҳкамлашга беҳуда уринишлар хавфли оқибатларга олиб келиши мумкин.

Диний-экстремистик оқимлар таъсирига тушган айрим кишилар тафаккури ва хатти-харакатларида биз бундай уринишларни кузатмоқдамиз. Ёки, аксинча, замонавий тараққиёт талабларини бирёклама тушуниш мумтоз қадриятларни у ёки бу даражада паст баҳолашга, маданий меросга нисбатан нигилизмга йўл очади, миллатнинг теран тарихий илдизлари билан алоқани заифлаштиради. Биринчи ҳолатда бузғунчи, реакцион диний-экстремистик ёки миллий маҳдудлик фояларига нисбатан мафкуравий иммунитет етарли даражада пайдо бўлмайди. Иккинчи ҳолатда эса миллий нигилистик, сохта демократия фояларини тарғиб этувчи, аслида фаразли геосиёсий мақсадларни кўзловчи мафкурага нисбатан зарур иммунитет вужудга келмайди.

Шу боис тафаккурда тарихийлик ва замонавийлик тамойилларини мутаносиб ривожлантириш зарур. Бунинг учун, бир томондан, мумтоз миллий қадриятларга, маданий меросга, иккинчи томондан, ҳозирги замон қадриятлари инсон хукуқлари, ҳақиқий демократия ва х.к. – илмий техника ютуқларига ва тараққиёт тенденцияларига (глобаллашув ва интеграцияга) холис ва илмий муносабатни шакллантиришга жиддий эътибор қаратмоқ зарур.

Эркин тафаккур кенг маънода оламни, тор маънода конкрет вазиятни адекват, яъни имкон даражасида, тўлалигича, бузмасдан, холис ва объектга мос ра-

вишда акс эттиради. Адекватлик эркин тафаккурнинг муҳим белгиларидан ва мезонларидан биридир. Тафаккур таҳлил этаётган объектига нисбатан, у статик ёки динамик ходиса бўладими, моддий (материал) ёки маънавий (идеал) ходиса онг, рух бўладими, бундан қатъи назар, холис ва мос ёндашиши, илмий усусларга таяниши лозим. Масалан, иқтисодиётни биологик, психологияк ёки тор сиёсий мағкуравий тушунчалар асосида тўғри талқин қилиб бўлмайди. Бошқа илмларга оид тушунчалар ва усуслардан маълум даражада фойдаланиш мумкин, аммо иқтисодиёт энг аввало ва асосан иқтисод илми тушунчалари ва қонуниятлари орқали таҳлил этилиши керак. Худди шундай руҳиятни иқтисодиёт ёки математика илми ёрдамида тушунтириш мумкин эмас.

Адекватлик фақат юқоридагилар билан чегараланмайди. Тафаккур нарса ва ходисаларни адекват акс эттириши учун у теран рационализмга ва диалектикага асосланishi, барча чигалликлар ва қарама-қаршиликларни, ўзгарувчанликни ҳисобга олиши учун қайишқоқ бўлиши, аммо эклектик бўлмаслиги лозим. Тафаккур адекватликка интилиши жараёнида метафизик усуслардан тўла воз кечмайди, зарур ҳолларда улардан ҳамда релятивистик ва синергетик тамойиллардан фойдаланади.

Алоҳида таъкидлаш жоизки, эркин тафаккур рационализмга асосланса-да, иррационализмни, трансцендентликни кўр-кўрона рад қилмайди, улардан ҳам вазиятга қараб фойдаланиши мумкин.

Ҳаётда, айниқса инсоннинг ижодий фаолиятида ақлан тушунтириб бериш мумкин бўлмаган ходисалар талайгина. Масалан, ошиқнинг мажнунлиги ёки ижодкор истеъодининг кашфиёт кудрати, баъзи бир кишиларнинг ғайриоддий қобилиятлари ва ш.к.ларни

биз кўриб, кузатиб, улардан ҳайратланиб юрамиз. Аммо уларнинг моҳияти, сабаблари бизга сирлигича қолади, тўлиқ очилмайди. Инсон ақли уларни охиригача камраб олишга, тахлил этиб, тушунтириб беришга ожиз. Бундай ҳодисалар трансцендент ҳодисалар дейилади. Энг қизифи, тафаккур ва ақлнинг ўзи ҳам трансцендент ҳодисалардир. Ақл ўзини-ўзи тўлиқ камраб ололмайди, бинобарин, тўлиқ тушунтириб беролмайди.

Ақл – ақлдан ташқаридаги ҳодисадир!

Ақлдан ташқаридаги, унинг доирасига сизмайдиган ҳодисаларга дуч келганда, тафаккур боши берк кўчага кириб қолади. Ундан чиқиш учун у турлича йўл тутиши мумкин. Айрим кишилар тушунтиришга ожиз ҳодисанинг ўзини рад этади, гўёки у мавжуд эмасдек. Айримлар фантастик ёки мистик уйдирмалар тўқий бошлайди. Фақат теран тафаккур соҳиблари ноанъанавий мантиқ ёки мистик рационализм, интуиция ва ички ишонч ёрдамида зиддиятни бартараф этади. Булар трансцендентликнинг тафаккурда намоён бўлишидир. «Трансцендентлаштириш, илмий рационализм сингари, муайян ва аниқ билимлар бермас-да, барибир ўрганилаётган борлиқнинг айрим теран хоссаларини илғашга қодир»¹, – деган фикрга қўшилиш лозим.

Трансцендентлаштириш айниқса буюк валий зотлар ижодида кўп учрайди. Баъзи бир мураккаб ҳодисаларни улар нафақат ақл кўзи, шунингдек қалб кўзи билан ҳам кўра олганлар.

Эркин тафаккур факат «яланғоч рационализмга» асосланиши мумкин эмас. У оқилона тарзда транс-

¹ Алексеев П. В., Панин А. В. Философия. М., 1997 г., с. 66–67.

цендентликни ҳам ҳисобга олиши, ақл ва кўнгилни мувозанатга келтириши лозим. Бунинг учун ақлий тарбия, фан асосларини ўрганиш ҳиссий тарбия билан қўшиб олиб борилиши керак. Инсонда инсоний туйғулар (ўзгаларга ҳамдардлик, хайрихохлик, диёнат, бурч, ватанпарварлик, адолат туйғулари, гўзалликка ошуфталиқ, нозик дид, завқ-шавқ ва бошқа юксак туйғулар) етарлича шаклланмаса, у нечоғлик билимли бўлмасин, унинг ҳаётга, одамларга муносабати маълум даражада бир томонлама бўлиб қолаверади.

Азалдан баъзи мулоҳазаларда ақл ва кўнгилни бирбиридан ажратиш, ҳатто қарама қарши қўйиш ҳоллари учрайди. Кўнгилга қараб яшаш керакми ё ақлга, деган баҳслар ҳам бўлиб туради. Кўнгил ва ақл кутбий ҳодисалар эканлигини инкор қилмасдан, шуни таъкидлаш зарурки, аслида қутблар ўртасида хеч қачон аниқ чегара ўтмаган, қутблар бир-биридан ажралиб, мавжудлигини сақлаб қололмайди. Ҳақиқатан, инсон онгининг икки даражаси – ҳиссиёт ва ақл – диалектик бирликни ташкил этади. Кўнгил эса олий ва теран туйғулар, завқ-шавқ ва орзу-умидни туғдирувчи, унга интилувчи нозик ҳиссиёт сифатида ақлга таянади, ўз навбатида унга инсоний фазилатлар бағишлийди. Кўнгилдан ажралган ақл воқеа ва ҳодисаларни бир томонлама баҳолайди, маълум вазиятларда ҳатто ёвузлик ва золимликка, қотилликка қодир. Кўнгилга, виждон ва диёнатга қулоқ тутмаган ақл учун асосий мезон мақсадга мувофиқлик бўлиб қолади. Кўзланган мақсадга эришиш учун у ҳар қандай воситани оқлаши, шу жумладан, ёвузликдан ҳам қайт маслиги мумкин. Кўнгил ақлни салбий ҳатти-харатдан сақлайди. Ақлдан ажралган кўнгил эса нафсга, хирсга айланиши хеч гап эмас. Чунки жиловлан-

маган ҳиссиёт дағаллашади, чегара билмас хошиш-истакка айланиб, инсонда носоғлом эҳтиёжларни, худбинликин вужудга келтиради. Ҳиссиётни жиловлайдиган, эҳтиёжлар соғломлигини текшириб, түғрилаб туратиган ички куч ақлдир. Шу боис тафаккур эркин ва самарали бўлиши учун ақл ва кўнгил мувозанати зарур.

Ўзбекистонда янги жамиятни барпо этиш, баркамол авлодни тарбиялаш жараёнида ижтимоий онгда, миллий тафаккурда жиддий ўзгаришлар содир бўлмоқда. Энг аввало ҳалқимиз инсоннинг тафаккури ва иродасини чеклаб қўядиган ижтимоий қўрқувдан халос бўлди, унинг иллатларини бартараф этмоқда. Лекин тафаккур эркинлигини ривожлантириш, ҳалқимизни бунёдкорлик салоҳиятини тўлароқ юзага чиқариш учун ички ва ташки таҳдидлардан огоҳ бўлиб, ижтимоий қўрқувни туғдирувчи ёки озиқлантирувчи ҳар қандай омилларга қарши фаол курашмоқ, демократияни ва фуқаролик жамияти асосларини мустахкамламоқ зарур. Эртанги кунга ва ўзига ишонч ахоли онгиди ислоҳотлар самараси ошган сайин ўсиб бориши муқаррар. Айнан келажакка ва ўзига ишонч турли хил номукаммаллик туйғуларидан халос бўлишга ёрдам беради. «Биз ҳеч кимдан кам эмасмиз, кам бўлмаймиз» фоясини ёшлилар онгига сингдириш, соғлом миллий фурурни шакллантириш жуда муҳим.

Бозор муносабатлари ва рақобат ривожланиши жараёнида тафаккур тарзи рационаллашиб боради. Чунки тадбиркор ишлаб чиқаришни тўла ва батафсил калькуляция қилишга, харажатлар ва даромадларни аниқ ҳисоб қилишга мажбур бўлади. Ҳар бир оила, рўзгор ҳам харажатлар ва даромадларни аниқ ҳисоблашга ўрганади. Булар тафаккур рационаллашувининг моддий-иктисодий омиллариридир.

Ишлаб чиқаришни оқилона ташкил этиш, унга муттасил замонавий технологик янгиликларни жорий қилиш, бозор талаблари ва конъюнктурасини таҳлил қилиб энг қулай қарорлар қабул қилиш оддий ишчи ва корхона раҳбарларидан тортиб то жамият институтларигача рационал фаолият юритиш заруратини юзага келтиради. Ўз навбатида рационал фикрлаш ва оқилона фаолият юритишга интилиш бозор рақобатига, турмуш талабларига яхшироқ мослашиш имкониятини беради.

Аммо бозор шароитида рақобат одамларнинг ўзаро бегоналашувига, юлгичлик ва бойиш ҳирси авж олишига сабаб бўлмаслиги учун, тарбия тизими янги воқееликка мослаштирилиши зарур. Юлгичлик аслида кенг омма учун, шу жумладан, аксарият тадбиркорлар учун ҳам хос эмас. Аммо ўтиш даврининг зиддиятлари хусусий тадбиркорлик шаклланиши ва оёққа туриб олиши жараёнида илк, ёввойи капитализмнинг айрим иллатлари пайдо бўлишига маълум даражада замин яратди. Хусусий бизнес оёққа туришининг зиддиятли жараёни ва ўтиш даври қийинчиликлари аҳолининг онгини, тафаккурини бузиб юбормаслик чораларини кўриш зарур. Одамларни фақат ҳалол меҳнат ҳамда ўз шериклари, давлат ва қонунлар билан ҳалол муносабатда бўлиш бозор иқтисодиёти шароитида унинг иши ривожланиши учун муҳим шарт ва омил эканлигига ишонтириш керак.

Тафаккурнинг рационаллашуви унинг фаол ва мустақил (эркинликнинг асосий шартларидан бири) бўлишига йўл очади. Ижтимоий ҳаётнинг либераллашуви, демократия ва фуқаролик жамияти асосларини мустаҳкамлаш ҳам, бир томондан, жамият институтлари ва аъзоларининг эркинлик даражасини ошиrsa, иккинчи томондан, ўз ишлари, хатти-ҳаракатлари,

қарорлари учун масъулиятни кучайтиради. Бу яна тафаккур фаол ва мустақил бўлиши, ҳаётий муаммоларни тўғри таҳлил қилиб, тўғри хулосаларга келишининг ижтимоий-сиёсий ва ахлоқий заминини кенгайтиради. Демократия ва фуқаролик жамияти яна шунингдек тафаккур эркинлигига тўсқинлик қилувчи ижтимоий кўркув, миллий номукаммаллик туйғуси қолдиқларини тўлиқ бартараф этишга шароит яратади ва ўзлари ҳам бунга хизмат қиласади.

Демак, демократияни ривожлантириш, фуқаролик жамиятини қарор топтириш тафаккур эркинлигини таъминлашнинг ҳукуқий, сиёсий, ижтимоий шартларидан бири. Демократия ривожланмаган жойда тафаккур масъулиятдан, мустақилликдан кўркиб, обрўли фикрга тобе бўлиб қолаверади.

Демократия ва фуқаролик жамияти ривожланиши даражаси охир-оқибатда тафаккур эркинлиги даражасини белгилайди. Тафаккур эркинлигини шакллантирувчи, юзага чиқарувчи омиллар орасида маънавий-маданий омиллар гурӯхини алоҳида ажратиб кўрсатиш керак. Таълим-тарбия тизими, ёш авлодни ўқитиш, унга зарур замонавий илмий ва касбий билимларни бериш, юксак ахлоқий ва эстетик фазилатларни, соғлом миллий ғурур ва ватанпарварликни шакллантириш, фикрлаш маданиятини ўстириш жамият тараққиётининг ҳам, тафаккур ривожланишининг ҳам асосий шарти ва воситасидир. Таълим-тарбия тизими Ўзбекистоннинг буюк келажагини яратиш, жаҳон ҳам жамиятига интеграция бўлиш, шахсни баркамол этиб тарбиялашнинг барча масалаларини тўла хисобга олиши лозим. У эклектика ва дорматизмдан ҳам, миллий нигилизм ва маҳдудликдан ҳам бирдай холи бўлмоғи шарт.

Юқоридагилардан аён бўладики, тафаккур эркин-

лиги ўзининг ижтимоий мазмунига кўра, гуманизм, демократизм ва тараққийпарварлик тамойилларига таянади. Воқеликка муносабатига кўра, у адекватлика, асосан рационализмга, холистичка интилади, масалага ҳар томонлама ёндашиб, таҳлил ва умумлаштиришнинг илмий усулларидан фойдаланади. Унга масъулият, ижодий ва танқидий рух, фаоллик ва мустақиллик хос.

ХУЛОСА ЎРНИДА

Юқоридаги фикрлар жамланса, қисқача қўйидаги хулосаларга келиш мумкин:

Тафаккур эркинлиги инсон ҳуқуқларини таъминлаш, жамиятни демократлаштириш, баркамол авлодни тарбиялашнинг муҳим маънавий-интелектуал шарти ва воситасидир. Шахс, жамият, умуман турли дарражада уюшган социум эркин тафаккур орқали ўз салоҳиятини тўла намоён этиш имконига эга бўлади. Бу имконият жамиятда қарор топган касб танлаш, ишбилиармонлик, меҳнат фаолияти, ижод ва сўз эркинликлари орқали амалга ошади. Тафаккур эркинлиги, шундай килиб, шахс ва жамият етуклигининг ички мезони, ҳаракатлантирувчи кучи ва ташки воқелиги, амалга ошувидир. Ушбу мулоҳазада гап тафаккур кучи (ақлзаковат даражаси) ҳақида эмас, балки тафаккур эркинлиги ҳақида кетаётганига эътиборни жалб қилиш лозим. Ақлзаковати ниҳоятда юксак киши, яъни нарса ва ҳодисаларнинг моҳиятини, кўздан яширин томонларини, хусусиятларини тез пайқайдиган, таҳлил килиб умумлаштира оладиган – тафаккури кучли кишилар жамият тараққиётининг турли босқичида ҳар хил соҳаларда кўплаб учрайди. Лекин бундай кишиларнинг ижтимоий ахволи, мансаб ваколатлари ёки жамиятдаги ижтимоий-сиёсий ва маънавий мухит (тузумнинг тоталитарлиги, ақидапарастлик ва мутаассиб-

ликнинг кучлилиги ва ҳ.к.) уларга холис хулоса ва мустақил қарор қабул қилишга имкон бермаслиги мумкин. Асосий субъектив омил (бу ерда тафаккур салоҳияти) мавжуд бўлса-да, объектив шарт-шароит (жамиятда қарор топган сиёсий, демократик ва маънавий эркинликлар, плюрализм, иқтисодий ва ижтимоий имкониятлар) ва бошқа субъектив омиллар (жамиятнинг танқидий, муқобил ва ностандарт фикр-мулоҳазаларга, хулоса ва тавсияларга тайёр эканлиги, уларни қабул қила олиш имкониятлари) тафаккур эркинлигини чеклаб кўйиши ҳеч гап эмас. Шу боис тафаккур эркинлиги шахс ва жамият эркинлигининг, ривожланиш даражасининг мужассамлашган (интегратив) кўрсаткичидир. Яъни у фақат шахсни тавсифлаб қолмай, шунингдек, бутун жамият савиясига, унинг очиқлик ва эркинлигига, тараққиёт даражасига ҳам билвосита баҳо беради, бошқача айтганда, жамиятни ҳам тавсифлайди. Мустақил Ўзбекистонда тафаккур эркинлигини карор топтириш ва ривожлантириш таълим-тарбия ва маънавий-маърифий ишларнинг мазмунини ва асосий мақсадларидан бирини ташкил этади. Таълимнинг барча бўғинларида, ижтимоий ва маънавий-маданий ҳаётда ўтказилаётган ислоҳотлар инсон омилини, шу жумладан, унинг тафаккурини ривожлантиришга қаратилгандир.

Ушбу вазифа давлатимиз бошлигининг асарларида, миллий дастурларда ва бошқа хужжатларда, қатор назарий концепцияларда, ислоҳотларнинг амалий йўналишларида батафсил акс этган. Комил инсонни тарбиялаш, ислоҳотларни инсон манфаатларига хизмат қилдириш, жамиятни изчил, босқичма-босқич демократлаштириш, иқтисодиёт ва турмуш фаровонлигини юксалтириш, инсон ҳуқуқларини тўла кафолатлаб, ижтимоий муносабатларни барча даражада (шахс-

лааро, шахс ва жамоа, шахс ва жамият, жамоалара-ро ва ҳ.к.) такомиллаштириш инсон омилини ривожлантириш, тафаккур эркинлигини юзага чиқариш йўлларининг асосий йўналишларидир. «Ислоҳотлар ислоҳот учун эмас, балки инсон учун» ғоясида ва давлатнинг амалий сиёсатида ўз ечимини топаётган бу вазифа халқимизнинг инсонийлик ва адолат ҳақидаги тасаввурларига мос келади.

МУНДАРИЖА

Кириш	3
Тафаккур эркинлиги зарурати	11
Тафаккур эркинлиги	34
1. Умумий мулоҳазалар	34
2. Тафаккурнинг тарихий шакллари	54
Рационал ва иррационал тафаккур	90
Тафаккур эркинлиги мезонлари	126
Хулоса ўрнида	156

Ижтимоий-фалсафий нашр

АБДУРАҲИМ ЭРКАЕВ

ТАФАККУР ЭРКИНЛИГИ

Тошкент «Маънавият» 2007

Мухаррир *У. Қўчқоров*

Мусаввир *Н. Попов*

Техн. мухаррир *Т. Золотилова*

Мусаххих *О. Бозорова*

Компьютерда тайёрловчи *Ш. Соҳибов*

Босишга 23.08.2007 й. да руҳсат этилди. Бичими 84x108/₃₂. Офсет босма усулида босилди. Шартли б. т. 8,40. Нашр т. 9,86. 5000 нусха. Буюртма № 07-739. Нархи шартнома асосида.

«Маънавият» нашриёти. Тошкент, Буюк Турон, 41-үй. Шартнома 52-07.

Ўзбекистон Матбуот ва ахборот агентлигининг «Ўзбекистон» нашриёт-матбаа ижодий уйида чоп этилди. 100129 Тошкент, Навоий кўчаси, 30-үй. 2007.